

تماہی سنگری

اکتوبر-دسمبر جلد: 1، شماره: 1



Quarterly: **SANGRI**
Oct - Dec. 2011. Vol:1.

اکتوبر-دسمبر شماره: 1، جلد: 1

تماہی
سنگری

تمہاى

سنگرى

ايڈيٽر: فيصل جڀا، فياض مگھيانہ، ظهير وٹو

تماہی سنگری

اکتوبر-دسمبر شمارہ: 1، جلد: 1

مُل: ہک سو روپے

درہے کان: ترائے سو روپے

سدا سنگ: پنج ہزار روپے

مکھ چتر: آصف رضا، دکھ: عبدالحفیظ

رابطہ لئی: N-28، عوامی فلیٹ، ریواڑ گارڈن لاہور۔

ای میل: sangri@gmail.com

وجاہت مسعود نے عرفان افضل پرنٹنگ پریس توں چھپوا کے 40-ڈی ماڈل ٹاؤن لاہور توں ٹوریا

ورتاوے:

سانجھ

سارنی

4	وچار	
	لیکھ	
7	بابا فرید دیاں حکمت پُریاں رمزاں	محمد مسعود خالد
24	”بیلے وچ چڑیاں“ تے میں	ریاض احمد
40	پنجواں وید	پروفیسر شارب
57-84	نظمیں	
	مشتاق صوفی، زویا ساجد، مہدی اخوان ثالث/معین نظامی، احمد شاملو/معین نظامی،	
	موہن سنگھ، نسرین انجم بھٹی، ڈاکٹر گربخش سنگھ بھنڈال/آصف رضا،	
	خاقان حیدر غازی، افضل ساحر، آنا آخمتووا/عظمی عزیز	
	کہانیاں	
87	ہک بابا دشاہ	غلام حسین ساجد
99	ست بھرائی	عائشہ اسلم
102	کبوتر، بنیرے تے گلیاں	زبیر احمد
114	سزا	منو بھنڈاری/خالد فرہاد دھاریوال
131-136	غزلاں	
	ڈاکٹر عادل صدیقی، تجمل کلیم، صابر علی صابر، صغیر تبسم	
139-141	بار رنگ	
	مہر ریاض، جاوید سکندر گفام، ملک شفقت عباس شفقت، مزل حسین ناطق	
	قاسم شاہ، طالب حسین طالب	
	تواریخ	
145	توتے بولن باردے تے ونیں جھنگارن مور	منظور اعجاز
151	سورم گتی دی ریت	لال سنگھ گیانی

وچار

پنجاب وچ ماں بولی دے حقاں دی نہ تاں منگ نویں ہے
تے نہ ہی رسالے چھپن دی ریت۔ ہر پیڑھی اپنے سر آئی چھوت
لاہن دا چارا کردی رہی ہے۔ ’سنگری‘ سریوں چھوت لاہن دا ای ہک
آہر ہے۔ بولی نال ہوئے دھروہ پچھے پرائیاں توں ودھ اپنیاں دا ہتھ
ہے۔ جدوں اپنے پرائیاں دی طاقت بندے ہن تاں ٹھلن اوکھا تھی
ویندا ہے۔ ون ٹھلیاں وی گل نہیں بندی۔ ایہو اپنی ہوند دا ثبوت ہے۔
ٹسیں موڈھے نال موڈھا جوڑ کے کھلو وںجوتاں گل کسے بنے لگن دی
آس بجھ سکدی ہے۔



محمد مسعود خالد
ریاض احمد
پروفیسر شارب

اگلے پڑھے نوس و سارن نال بندہ اندروں خالی ہوسکدا ہے تے خالی
پن بندے لئی ہمیش دا دھڑکا ہے۔
مشتاق صوفی

بابا فرید دیاں حکمت پُر پیاں رمزاًں

ادب دی دنیا انسانی تجربے توں دکھ کوئی وجود نہیں رکھدی۔ ایس لئی اوہ بھائی کئی سوئی، گچھلدا رتے وچا روہاری ہووے انسانی تخلیق ای رہندی ہے۔ جے ایس دی عینہ لوکاں دی زندگی دے تجربے توں متردی سچائی تے رکھی ہووے فیر اوہ اپنے ویلے، مقام دی قید توں نکل کے کسے ویلے مقام لئی وی نوں نکورتے سحری ہی رہندی ہے۔ ڈی وچنی نے بڑی کھری گل کیتی ہے کہ اساڈے تجربے نہیں سگوں اساڈے فیصلے گوڑے ہوندے نیں۔ ایہہ اودوں ہوندا ہے جدوں اسیں اپنے تجربات نوں عقل دا سیری نہیں بناوندے۔ اپنے تجربات نوں اگدوں بنھی سوچ دے تابع رکھنا چاہونے ہاں۔ سلیکھ کار اپنی واپری نوں اوہی صورت وچ پیش کردا ہے جیس شکل وچ اوس تے واپردی ہے۔ ایس کم لئی اوہنوں لفظاں دا آسراتاں لینا ای پیندا ہے، پر واپری دے معنیاں نوں، واپری دے معنیاں دے حُسن نوں، رمز دے اوپرے سریر وچ لٹکا دینا اوس دی کلا ہے۔ کیوں جو ادب وچ صورت تے معنی دا سمبندھ سریر تے جند والا ہوندا ہے۔ واپری تے اوس دی رمز شکلوں کو جیہا لگن، نال ای معنی دا ساگی ہوون ای سلیکھ ہے۔ جیویں اسیں پہلی رات دے چن نوں نو نہہ نال تشبیہ دے وی لویے پر نو نہہ چن دی روح نور توں وانجھا ہے۔ ایس لئی سلیکھ کار نوں اجیہیاں رمزاًں دی چون کرنی پوندی ہے، جیہیاں اپنے سریر تے جند دوواں راہیں سلیکھ کار دی واپرکا دے معنیاں دے حُسن نوں قائم رکھن۔ بابا فرید جی دی ساری شاعری رمزاًں نال پُر پی ہوئی ہے تے ایہناں رمزاًں دا گُن ایہہ ہے کہ اوہناں وچ صورت تے معنی دا میل انج دا ہے کہ ایہہ جیوندیاں جاگدیاں رمزاًں بن گئیاں نیں۔

رمزاں اشارے تے سینٹاں اوکھیاں تے ڈونگھیاں گلاں نوں ساڈی سمجھ دی پدھر
تے ساہتکار دی واپری دی پڑھیا رنال سانجھ کراون لئی ورتیاں جاندیاں نیں۔ ایہہ رمزاں ہی
ادب دا روپ سنگھار تے سوہنپ ہوندیاں نیں۔ بابا فرید جی دا دور واہی نیجی دا دور سی۔ واہی
نیجی دے سبھا وچوں سرب ویایاں نوں رمز بنا کے ورتیا ہے۔ کدھرے قدرت دے نظارے
دی شے نوں رمز بنایا نیں کدھرے رسماں نوں، کدھرے پرچلت متھاس نوں، کدھرے ہر
انسان دی سانجھی واپری نوں رمز بنا کے ورتیا ہے۔

ایہہ اجیہیاں تشبیہاں نیں جیہناں دے معنی ایسراں متھے ہوئے نہیں جیویں چن تے
چکور، یاں پھل تے بھورے دے ادب وچ متھے ہوئے نیں تے نہ ای ایہہ تشبیہاں کسے اک
مطلب نال بدھیاں ہوئیاں نیں۔ کسے رمز دے اک توں چوکھے معنی نکلن نوں ساہتکار دی
رچنا دے پسار دا گن سمجھیا جاندا ہے حالانکہ رمزاں توں اجیہے معنی کڈھنا جیہڑے اک دوجے
دی ضد ہوں ساہتکار دی کیتی کرتی نوں ونجاون والی گل ہے۔ سمجھن والی گل ایہہ ہے کہ
ساہتکار دیاں ورتیاں رمزاں وچوں اپنے معنی کیوں نکلدے ہن؟ اوس دی اک وجہ تاں ایہہ
ہے کہ حیاتی بارے ساہتکار دا نظریہ اپنے ولوں اُساریا جاندا ہے۔ فیروں نظریے نوں
موہرے رکھ کے رمزاں تے اپنی مرضی دا اُچھاڑ چاڑھیا جاندا ہے تے آپ دے وچاراں نوں
ساہتکار دے پلے نال بنھ کے ادب دی دنیا وچ ٹور دتا جاندا ہے۔ دوجی وجہ ایہہ ہے کہ
اسیں اک لیہہ متھ لئی ہے کہ جیس بندے دے ناں دے نال صوفی، سنت، درویش لکیا ہووے
اوس دا ایس دنیا تے ایس زندگی نال کوئی سمبندھ نہیں۔ اوس دا کلام تاں ہوندا ای ہے موت
تے اوہدے گروں کیہ ہونا ہے۔ جے کدھرے ایس دنیا، سماج تے لوکاں دا ذکر آوی جاوے
اوہوں موڑ توڑ کے متھی لیہہ دے اندر رکھنا کمال سمجھیا جاندا ہے۔ بابا فرید جی دے کلام نال وی
انج ای ہوندا پیا ہے کہ اوہناں دیاں ہزاراں جیونیاں چھپ رہیاں نیں کسے وچ وی اوہناں
نوں لوکاں نال جُویا نہیں دکھایا گیا۔ چوی سال جنگلاں وچ پھر دے رہے، بارہاں سال کچی
تند نال کھوہ وچ پٹھے لٹکے رہے۔ فیروں جے وچ بند ہو گئے تے اخیر تریا نوے سال دی عمر وچ
ایس دنیا، جیہڑی نظر دا فریب ہے، توں کنارہ کر گئے۔ شادیاں اوہناں دینی فریضہ سمجھ کے
کر لئیاں تے بچے رب نے دے دتے۔ ایہہ ہے جیونیاں راہیں مہان ہستیاں جیہناں

کائنات، سماج تے حیاتی دے سچ نوں اُگھاڑیا، دی اصل تعلیم توں تھڑکا ون دا جتن ہے تے
ایہہ اوس ہستی بارے ہے جیہناں ننڈیا کیتی:

فریدا جنگل جنگل کیا بھویں، ون کنڈا موڑیں
وس رب ہیلینے، جنگل کیا ڈھونڈیں

آپ نے جتا سفر کیتا تعلیم لئی کیتا۔ زبانناں سکھیاں۔ دنیا نوں علم ورتایا۔ لوکائی
نال جڑ کے وسے۔ لوکائی دی بولی نوں مان ستکار دتا۔ چیف جسٹس دا عہدہ ٹھکرایا۔ ایتھوں تیکر
کہ آپ دی مشہوری اک فلسفی ہون کر کے مصر دے شہر اسکندریہ وچ ابن بطوطہ نے سنی تے
جدوں اوہ ہندوستان آیا تے پاکپتن آیا۔ بابا جی اودوں تیکر دنیا تے نہیں سن۔ آپ دی تربیت دا
اثر کہ آپ دا وڈا پتر فوج وچ ملازم سی تے چھوٹا پتر واہی بیچی کرداسی۔ مطلب آپ نے پتر اں
نوں نیناں پراناں دی محنت دی کمائی تے لایا۔ آپ نال اوس ویلے دے مولویاں وی آڈھا
لایا۔ جیویں اج لوکی ووٹاں منگن والیاں کول اپنے مسئلے لے کے جانے نیں، اودوں بابا فرید
جی ہوراں کول آوندے سن تے آپ اوہناں دے کم لئی بادشاہ نوں رقعہ لکھ کے سفارش وی
کردے سن۔ ہن جے کوئی ”سیر الاولیاء“ توں وکھ بابا فرید جی دی جیونی لے آیا ہے تاں
اوسنے سُننا ای ویکھیا ہوسکدا ہے۔ حقیقت تاں اوہناں بیان کردتی جیہناں آپ نوں اکھاں
نال ویکھیا تے اوہناں کولوں سکھیا لئی۔

بابا فرید جی دا کلام زندہ ای تاں کر کے ہے کہ آپ چانن وچار رکھن والے لوک
پریمی طرح لوکائی نال جڑے رہے۔ ادب وسیب دا، اپنے ویلے دے سماجی شعور دا مہاندرا
ہے۔ جیویں مہاندرا بندے دے جذبیاں دا ترجمان ہے ایویں ادب انساناں دے وچاراں
دی جذباتی ترجمانی کردا ہے۔ سماجی شعور دے ایس مہاندرا تے جیہنوں ادب آکھدے نیں
وسیب دے ہر کچھ دی بھانور ہوندی ہے زندگی دے پندھ دیاں اوکڑاں دی بھانور۔ کائنات
دیاں گنجلد ارجھارتاں نہ بچھ سکن تے بے وس چا پن دی تریلی۔ اپنے پلپوں بنائیاں کہانیاں
نال اپنیاں اوکڑاں دے حل دی آس۔ مہین دھرم دا آسرا۔ رزق دی انیائی ونڈ نوں رب دی
رضامن کے بے دوسے مارے جاوون دی کجھی درد دی ٹیس۔ بندے تے بندے داراج نہ منن
دی متھے تے تریوڑی۔ دکھاں توں مکت ہووون توں بے وس ہووون توں نراستا۔ مشتتاں دا

مڑھکا، ایہہ ساریاں بھانوراں رل کے جیہڑا تاثر بناندیاں نیں اوہ ادب دا روپ ہے۔ کوئی وی ادبی رچنا فلسفے دے کھپے تے قنون دا مگر ترجمہ نہیں ہوندا۔ نہ ہی مابعد الطبیعات دیاں پیڈھیاں پائیاں گنڈھاں دا سگھنا بیان ہوندا ہے۔ جیویں مہاند رے دی بھانور واپری دی دس پا دیندی ہے ایویں ادب نوں سمجھن لئی ساہتکار دے پیش کیتے جذباتی مواد دیاں لگراں پھڑ کے اوہدے مڈھ تیکر چکن ہی ساہتکار دا نظریہ سمجھن ہے نہ کہ پہلوں نظریہ بنا کے مگروں کلام نوں آپ دے بنائے نظریے دی نکسال وچ پاونا۔

دنیا تے کوئی جی جماندو خیالات لے کے نہیں آؤندا نہ ہی خیالات دماغ وچ اُگدے نیں۔ دنیا تے انسان دیاں ہڈیں ورتیاں، اکھیں ویکھیاں، کینس سُنیاں، پندھ پیاں تا ٹھار سہیاں، سٹ جریاں، وخت کٹیاں، قضیے جالیاں، درد سمایاں، خوشیاں ورتیاں، بھکھ پرچاپاں، رج کھا دھیاں، تنگ ہنڈھائیاں۔ محتاجی جھاگیاں بے پرواہی بھرماں۔ کسے دے سنگ رلیاں۔ کسے نال ویر پائیاں۔ غلامی تلدیاں فطرت نال بھڑ دیاں۔ بے انت کائنات دی ڈونگھئیائی وچ تاری لاندیاں ترٹھیاں زندگی دا بھیت جانن دی ہرکھ رکھیاں کھنچے ویلے تے پچھوتائیاں۔ من دے اندر جھاتی پائیاں۔ باہر دی دنیا دی کھوج لائیاں بندے تے جو واپری دی ہے ایس واپری دے بیچ نال دماغ دی دھرتی تے سُر ت دا بُوٹا پنگر دا ہے تاں ای آکھیا جاندا ہے کہ سُر ت سماجی ہوند دا سٹا ہے۔ نہیں تاں جے کسے سجائے بچے نوں جنگل وچ چھڈ آؤ۔ کوئی انسان اوس دے متھے نہ لگے تے ویہاں ورھیاں مگروں اوہنوں لئے آؤ۔ اوہ کیہڑی بولی بولے گا؟ اوس دا دھرم کیہ ہووے گا؟ اوس دیاں عاداتاں کیہ ہوون گیاں؟ انج ای جے کسے پنجابی دا سجایا بال انگلینڈ چھڈ آؤ تے ویہاں ورھیاں مگروں موڑ لیاؤ اوہ کیہڑی بولی بولے گا؟ اوس دا دھرم کیہ ہووے گا؟ اوس دیاں عاداتاں کیہ ہوون گیاں؟

سُر ت دی پدھر دا فرق واپریاں تے اوہناں بارے کیتے ساڈے فیصلیاں دے فرق تے ادھارت ہے۔ جیویں واپریاں دے بیچ نال خیال دا بُوٹا پنگر دا ہے تے وادھے پیا رہندا ہے خیال دے ایس بولے نوں چھاگن سودھن سوارن دا کم سماج وچ پرچلت خیالات کردے رہندے نیں۔ پر سماج اک تھاں نکلیا ہو یا نہیں ایہہ وی وادھے پیا رہندا ہے تے خیالات وی وادھے وچ رہندے نیں ایہہ دو پاسا عمل ہے۔ سو جھوان دے خیالات سماج نوں

اگانہہ ودھاندے نیں تے سماج مڑ کے لوکاں دی سرت دی پدھرنوں اُچیرا کر دیندا ہے۔
 مکدی ایہہ کہ دماغ دی دھرتی تے واپریاں دے بیج نال جو بُٹا پنگردا ہے اوس
 بُٹے تے لگے پھلاں دی مہک داناں ادب ہے۔ پھل تہانوں نہ وی نظر آوندے پئے
 ہوون اوہناں دی مہک آپے دس پادیندی ہے کہ کیہڑے پھل دی مہک ہے۔ گلاب دی ہے
 یاں موئیے دی۔

مہک دی پھل نال، پھل دی بُٹے نال، بُٹے دی دھرتی نال جو جُوت ہے سو
 ای جُوت جذبے دی خیال نال، خیال دی سرت تے شعور نال۔ شعور دی سماجی زندگی نال تے
 سماجی زندگی دی مادی حالات نال ہے۔ کھرا ادب اوہ ای ہے جیس دیاں لگراں داپسار بھاویں
 اسماناں تیکر جُج جاوے اوس دیاں جڑھاں وسیب دے اندر ہی ہوون۔ ادب دا ایہہ سارا روپ
 رنگ بابا فرید جی دے کلام وچوں اُگھڑا ہے۔ انج ہی اوہناں دیاں ورتیاں رمزاں وچوں
 سانوں اجیہی سچائی لبھدی ہے جیہڑی دنیا دے کسے وی علم دی کسوٹی تے پرکھی جاسکدی ہے۔
 ایہناں رمزاں وچ اوہ حکمت پُر پی ہے جیہنوں اسیں پنجابی فلسفے دا سوما آکھ سکے ہاں۔

ندی تے بیڑا

لمی لمی ندی وے، کندھی کیرے ہیئت
 بیڑے نوں کپڑ کیا کرے، جے پاتن رہے سُجیت

جے باہروں منگ نہ پائیے تے شلوک دے آپدے آسے تے رمزنوں جان دی
 کوشش کریے تاں دو چار گلاں دا نکھیرا کرن نال ای حقیقت اگھڑ کے سامنے آ جاندی ہے۔
 ایہہ کہ آپ نے لمی نوں دوواری آکھ کے زور کیوں پایا ندی تاں ہوندی ہی لمی ہے۔ بابا فرید
 جی دے دور دے انسان دے وسیلیاں موجب ندی دا آدے انت جانن وسوں باہر اسی۔ ندی
 انسان دی بنائی ہوئی شے وی نہیں۔ ایس لئی ایہہ کسے اجیہی شے لئی رمز ہے جیس دا آدے
 انت کوئی نہیں۔ جیہڑی شے وہن وچ ہے استھر نہیں۔ کندھی کیرن اک ناقابلِ واپسی تبدیلی
 (IRREVERSIBLE CHANGE) ہے۔ ایہناں ناقابلِ واپسی تبدیلیاں نال ای ویلے دا
 تصور اُبھر دا ہے۔ جے آئیاں تبدیلیاں واپس موڑیاں جاسکدیاں تے فیروقت دا کوئی سنکپ
 نہیں سی بننا۔ ندی وہن نال کندھی دے کرن دا عمل فطرت دا عمل ہے۔ ایس لئی ندی ساڈے

ذہن توں باہر اپنا آزاد وجود رکھن والی مادی کائنات لئی رمز ہے۔ بیڑا سماج لئی رمز ہے۔ مادی دنیا وچ ہوون والیاں تبدیلیاں انسان دے وسوں باہر نہیں اوس وچ انسان دا کوئی عمل دخل نہیں۔ پر سماج وچ ہوون والیاں تبدیلیاں وچ انسان دا عمل دخل ہے سماج نوں ٹورن والا میل یا بیڑے نوں ٹھیلن والی ڈھانی بے سچیت ہے اچھا سماج تباہ نہیں ہو سکدا۔ ندی دے وہن نال کھماں دا ڈگن تے اگوں نویاں کھماں دا ندی نوں سمیٹن اٹل ہے۔ اتھے ندی دی تباہی دا لفظ نہیں ورتیا۔ تباہی دا لفظ سماج لئی ورتیا ہے، پر تباہی اٹل کر کے نہیں ورتیا تے شرط نری پاتن دے ہوون نال نہیں بخھی سگوں پاتن دے سچیت ہوون نال بخھی ہے۔

پاتن بیڑے دا رکھا ہے، بیڑے دے پورا رکھا ہے، وہن دا جانو ہے، بیڑے نوں وچ رکھن دا جانو ہے۔ مطلب سماج دی رکھی دی ساری ذمے واری نہ تے وہن دے رحم و کرم تے ہے نہ پاتن تے ہے۔ پاتن دے سچیت رہن تے ہے۔ پاتن دا وسیب نوں وادھے تے ٹورن والے قنوناں نوں جان کے اوہناں موجب بیڑے نوں ٹھیلن ہے، ہیر یقیطس نے آکھیا سی ”تسین اک ای ندی وچ دو واری قدم نہیں رکھ سکدے کیوں جو ہر پل نوں پانی آوند رهندا ہے۔“ اوس دی ایس گل توں سوچو ناں نتیجہ کڈھیا کہ کائنات دی ہر شے وٹیا جن ہار ہے۔ کوئی شے یاں کوئی وجود دوویلیاں وچ اکو حالت تے نہیں رهندا۔ اک ویلے جیس حالت تے ہوندا ہے دو جے ویلے اوویں نہیں ہوندا وٹاندا ازلی سچ ہے۔ بابا فرید جی نے ندی دی رمز ورت کے فطرت دے اندر ہر ویلے تبدیلی دے عمل دا پک کروایا۔ مادی دنیا کائنات تے فطرت وی استھر نہیں ایہہ وی پینڈے پئی ٹری جاندی ہے۔ سماج انسان دی بنائی دنیا ہے ایہہ وی استھر نہیں۔ سماج دا وادھے پین فطرت نال انج ای بدھج ہے جیویں بیڑے ٹھیلن ندی نال بدھج ہے۔ بیڑے نوں ندی توں وجوگ کے ٹھل تاں سکدے او ٹھلنا نہیں رکھ سکدے۔ مادی دنیا وچ تبدیلیاں انسانی عمل توں باہر نہیں جدوں کہ سماج وچ تبدیلی انسانی عمل دخل دے اندر ہے۔ کیہ مادی دنیا وچ آون والیاں تبدیلیاں بے مہاریاں نیں؟ ایس نوں اک ہورا شلوک راہیں سمجھنے آں۔

کندھی، وہن نہ ڈھاہ، تو بھی لیکھا دیونا

جدھر رب رضاء، وہن تداؤں گو کرے

ہن جے رب دی رضا نوں بادشاہی دے دور وچ لیکے گئے رب دے نقشے موجب
 ویکھیں تاں گراہ پے جاواں گے۔ ایس لئی بابا فرید جی دا رب کیہ ہے؟ تے اوس دی رضا دا کیہ
 مطلب ہے؟ اجو کے سماجی علماں موجب آکھیا ایہہ جاند اے کہ تسیں دسو کہ کوئی قوم کہو جیہ
 رب نوں مندی ہے اسیں تہا نوں اوس پورے وسیب دا نقشہ لیک دیواں گے۔ کسے قوم دے
 رب دے تصور دا اثر اک وسیب دے خیال دے آپسی تعلقات تیکر ہوندا ہے۔ جگت تے
 بادشاہی دا دور ہزاراں ورھے رہیا ہے۔ اوس دور وچ بادشاہی نوں علماں عقلاں دا نچوڑ،
 وسیب دے ارتقاء دی آخری منزل تے رہت دا تت سمجھیا جاند اسی۔ بادشاہ دے اُتے کسے دا
 حکم نہیں سی چلدا نہ بادشاہ آپ کسے قنون دا پابندی۔ ہاں کدے جی تے آئی تے وزیراں
 دے مشورے من لیند اسی۔ درباری عالماں تے سوجھواناں رب دا نقشہ بادشاہ نوں موہرے
 رکھ کے لیکیا ہویا سی تے ایہہ اوس ویلے دا پرچلت وچاری۔ اوہناں رب دی رضا نوں وی
 بادشاہ دی من موچی طبیعت دے ساگی انسانی جذبیاں دے تابع رکھیا ہویا سی۔ کئی کئی گل تے
 رُسن مینوں، جھٹے جھٹے فیصلے بدلاون، گھڑی پل وچ ہور دا ہور ہو جاو، اپنتے کسے تے مہربان
 ہوو یاں تھڑیوں ڈیگن، کوئی متھاٹیکے تے اوہندے سر لاہ دیون دا حکم دیون تے کسے گاہلاں
 کڈھن والے نوں انعام و کرام دیون ورگیاں بچگانہ خواہشاں دا رب نوں غلام لیکیا ہویا سنے
 ایس لئی کسے تبدیلی مگر قدرت دے اٹل، ان موڑ تے ان تھڑک قنوناں ول اوہناں دا دھیان
 نہیں سی جاند۔ بابا فرید جی بادشاہی دے مخالف سن ایس لئی رب دی رضا نوں بادشاہ دی رضا
 دے ساویں رکھ کے نہیں ویکھ سکدے سن۔ اتھھے وہن تے ڈھاء دو رمزاں ورتیاں گئیاں
 نیں۔ رمزاں موجب ایس دا مطلب ایہہ ہویا کہ وقت دے اگانہہ ودھن نال تبدیلی قدرت دا
 قنون ہے۔ مادی دنیا وچ تبدیلی وقت دے گذرن نال بدھی ہوئی ہے۔ اشلوک دی دوجی تئک
 تاں جواب ہے۔ کس سوال دا؟

کندھی، وہن نہ ڈھاء، تو بھی لیکھا دیونا

انسان اپنے بچنے وچ جدوں فطرت دی جھولی وچوں نکل کے رڑھن جوگا ہویا تے
 اوہ سمجھدا سی کہ چن، تارے، پہاڑ، دریا، رکھ، پتھر، بدل ورگیاں ساریاں شیواں وچ انسان ہار

جند، سرت، جذبے تے احساس ہن۔ ایہہ ساریاں شیواں ساڈے ہار خوش ہوندیاں تے کاوڑ کردیاں نیں۔ جیویں اسیں نیت کر کے کوئی کم کرنے آں انج ای ایہہ شیواں وی نیت کر کے کسے نوں فائدہ یاں نقصان پہنچاندیاں نیں۔ جیویں اج وی کہنے آں فلانی منہر ہر سال بندہ لیدی ہے۔ جمعرات دی جھڑی ہے ست دن وسے گی۔ زلزلہ آون تے آکھنا کہ ایہہ عملاں دی سزا ہے۔ پھل دار بوٹے کول رولا نہ پاؤ کدھرے کچے پھل ای نہ سٹ دیوے۔ جنوراں پاروں وی ایہہ وچار اج تیکر ٹرے آوندے نیں کہ شیر دا غصہ، سپ وچ بدلے دی بھادنا، اٹھ دا کھور، گھوڑے دی اڑی۔ وچار دا ایہہ ڈھنگ کہ مادی شیواں یاں جنوراں وچ انسان ہار سرت تے جذبے نوں روحاں دا مت آکھیا جاندا ہے۔ ایہیے کئی وچار رسماں دے پلے نال، بخہ کے جیوندے رکھے جاندے سن تے ایہہ رسماں کسے نہ کسے مذہب دا حصہ بن جاندیاں سن۔ بابا فرید جی ہوراں دے زمانے وچ وی ایہیے وچار پرچلت سن، اج کل وی ہن۔ بابا فرید جی نے روحاں دے مت دا کھنڈن کرن دا ڈھنگ کیہ ورتیا ہے کہ سوال روحاں دے مت والی دھرتوں ہو کے کیتا نیں تے جواب کورا دتا نیں کہ تبدیلی رب دے متھے قنوناں موجب آونی ہوندی ہے ایہہ عمل ہر ویلے جاری ہے تے بندے دا ایس وچ کوئی عمل دخل نہیں۔ وقت دی رفتار نال تبدیلی دے عمل نوں لیکھے دا بھودے کے روک نہیں سکدے۔

ایہناں چار رمزاں ندی، بیڑا، وہن تے ڈھاء دے ورتارے توں حکمت کیہ پنگری؟ تے فلسفہ کیہ اُگھڑیا؟

- 1- مادی دنیا تے وسیب کوئی وی استھر تے جامد نہیں۔
- 2- ٹٹ بھج، تبدیلی، اک حالت توں دوجی، قدرت دے قنوناں موجب ہے۔
- 3- وسیب دے اگانہہ ودھن، کسے تباہی دے مونہہ آون توں روکن وچ انسان دے سچیت رہن دا عمل دخل ہے۔
- 4- مادی دنیا وچ تبدیلی نوں اساڈیاں چاہواں تے سدھراں نال کوئی سروکار نہیں۔
- 5- مادی دنیا بدھیج ہے قدرت دے قنوناں دی سماج بدھیج ایس حد تیکر ہے جتاں بیڑا ندی دے وہن تے، اگول سماج دی ساری ٹور انسان دے سچیت عمل دے ہتھ ہے۔

ڈوہاگن رب دی

ایہہ وی وسیب لئی رمز ہے۔ ڈوہاگن پھٹڑ ہوندی ہے جیس نوں اوس دے سائیں
چھڈ دتا ہووے۔ ایہہ چھڈن وی کنیاں موجباں کارن ہوندا ہے بے وجہ نہیں ہوندا۔ ڈوہاگن
جدوں سہاگناں وچکار رہندی ہووے فیر اوس دی زندگی جھورے جھرن ہی رہ جاندی ہے۔
ڈوہاگن رب دا اوہ وسیب ہے جیس نوں رب نے چھڈ دتا ہووے تے ایس چھڈن دا کارن
وی تاں کوئی ہووے گا۔ تتی توہ ای ڈوہاگن ہے فرماندے نیں:

تتی توہ نہ پلوے، جے جل ٹھٹی دے

فریدا جو ڈوہاگن رب دی، جھوریدی جھورے

مادی دنیا تے وسیب اُتے قنوناں دی حاکمی ہے تے کھیتی وچوں مثال لے کے
آکھدے نیں کہ جیویں پانی کھیتی نوں ہری بھری کرن دا وسیلہ ہے۔ ایہہ قدرت دا قنون ہے۔
جے کھیتی پانی نہ ملن کر کے سڑ جاوے فیر ہری نہیں ہوندی بھاویں فیر اوس نوں پانی وچ ڈوب
دیو۔ قدرت دے قنون دی اُلنگھنا کر کے جو نتیجہ اُٹل نکل آیا اوس نوں موڑ نہیں سکدے ایہہ
وی قدرت دا قنون ہے۔ کھیتی اوس ویلے ہر بندے دی واپری، اکھیں ویکھی گل سی۔ ایس توں
مثال لے کے وسیب ولے آوندے نیں کہ جیہڑا وسیب رب دے قنوناں دے ورودھ بناوٹی
اسار یا جاندا ہے۔ جیس وچ اک نکی جیہی ڈھانی رزق دے وسیلیاں تے قبضہ کر کے باقی دی
وڈی گنتی نوں دکھاں، مصیبتاں، کشاں وچ پا دیندی ہے۔ اجیہا وسیب رب توں وانجھا ہو
جاندا ہے۔ اوس وچ زندگی دکھاں دا دو جاناں ہوندا ہے۔ بابا فرید جی ہوراں بھانے رب
دے ملن دی نشانی ایہہ ہے کہ وسیب دا ہر جی سکھی وسدا ہووے۔

آپ سنواریں مَیں مَلیں، مَیں مَلیاں سکھ ہووے

فریدا جے تُوں میرا ہووے رہیں، سبھ جگ تیرا ہووے

ایہہ اشلوک رب ولوں ہو کے بولیا گیا ہے۔ سکھ رب دے ملن دی نشانی دی گئی
ہے۔ ہر اک نوں ہر اک وچ رب کدوں دس سکدا ہے؟ سارے جگ وچ رب کدوں وسدا
ہے؟ ایس منزل تیکر اپڑن لئی شرط کیہ بنھی ہے؟ آپ سوارن دی۔

اتھتھے وی بندے دا اختیار منیا گیا ہے۔ سبھ جگ تیرا ہوء۔ کل دی آزادی تے کل دی سانجھ دی منزل ہے، جیہڑی بندے دے آپ کیتے سدھار نال آؤنی ہے۔ ایہہ سوارن کھلے کارے دا نہیں۔ وسیب وچ جگ سوارن دی سنسٹھ نال جڑیا ہویا ہے تے ایہہ صوفی دا وچار ہے۔ شریعت والے کہندے نیں کہ ایتھوں دے دکھ تہاڈی آزمائش ہے، جیہڑا ایتھتھے انیاں، ظلم، مل، دھرو دھگان، محتاجی برداشت کرے گا۔ ایہنوں رب ولوں آئی سمجھ کے مل گیراں، ظالماں، انیاں کرن والیاں نوں کھل کھینڈن دا موقعیا دیوے گا، اوہ اگلے جہان موتیاں دے محل وچ رہوے گا۔ جییں دے آسے پاسے دودھ تے شہد دیاں نہراں وگ رہیاں ہوں گیاں، پر بابا فرید جی دا وچار ایس توں چٹھڑ ہے۔

فریدا تہاں مکھ ڈراونے، جینناں وساریو ناؤں
 ایتھتھے دُکھ گھنیرے آ، اگے ٹھور نہ ٹھاؤں

مکھ ڈراونے توں مطلب ایہہ نہیں کہ اوہ بھنؤ بن جان گے۔ اوہناں دی حالت ویکھ کے لوکیں ڈرن گے۔ ’ڈوہاگن رب دی‘ والا وسیب اپنی حالت دی زبان نال دس رہیا ہووے گا۔ لوکی اوس دی حالت ویکھ کے ڈرن گے۔

اتھتھے تاں دکھ اپنی تباہی ولے لے جان والی طرز زندگی دے کارن بھوگ ہی رہیا ہووے گا اوہ اپنی ایس زندگی توں ہی اندازہ لالوے کہ اگا نہہ اوس نال کیہ ہونی ہے۔ اوس آپ نہ سوارن دی ایتھتھے وی سزا بھگنتی ہے تے اوتھے وی۔ بھلک اج دی کُٹھ وچوں جنم لیندا ہے۔

اک اجیہا بھلیکھا جیہڑا دنیا تے ہر مذہبی وسیب نوں رہیا ہے تے رہوے گاتے ایس دھوکھے وچ رکھن نال ہر مذہب دے پنڈت دی روٹی جڑی ہے تے ایہہ کہ اسیں رب دے بہت نیڑے ہاں۔ ہر مذہب ایہو کہندا ہے کہ اسیں رب نوں سبھ توں پیارے ہاں۔ ایتھتھے بھاویں اوہ غلامی دی زندگی گزار رہے ہوں، پر ہے نیں رب دے لاڈلے۔ بابا فرید جی ہوراں اوہناں نوں کچوکا کیہ لایا ہے۔

سوہرے ڈھوئی نہ لہیں، پچے ناہیں تھاوں
 پر واچڑی نہ چچھ ای، دھن سوہاگن ناؤں

ڈوہاگن رب دی رمز توں حکمت کیہ پتنگری؟ کوئی وسیب آپ دے مونہوں کیڈاوی
 رب پرمتا ہووے اوس دے حالات اجیہی کسوٹی نیں، جیہڑے ایس دعوے دی تصدیق یاں
 تردید کر رہے ہوندے نیں۔ مونہوں رب پرمتا ہووے تے رہ غلامی، غریبی، بے انصافی، ظلم،
 لٹ مار، متھاجی وچ رہیا ہووے تاں اوہ سمجھے کہ رب نے اوس دی راکھی توں ہتھ چک لیا
 ہے۔ جے اوہناں آپ دی ہمت کوشش نال وسیب وچوں انیائی ونڈ مکا کے لوکائی نوں دکھاں
 توں ملتی دولئی ہے اجیہا وسیب رب نوں پیارا ہے اوس وسیب دے ہر اک وچ ہر اک نوں
 رب نظر آون لگ پیندا ہے۔ اوہناں دے ایتھوں دے حالات اوہناں دی اگلی زندگی دا نقشہ
 ہوندے نیں۔

کاٹھ دی روٹی

کاٹھ دی روٹی دی رمز نوں سمجھن لئی پہلاں ایہہ دیکھنا لازمی ہے کہ بابا فرید جی
 ہواں دے ویلے دا وسیب کیہو جیہا سی۔ فرماندے نیں۔

فریدا اکنان آنا اگلا، اکنان ناپیں لون
 اگے گئے سنجاپسن، چوٹاں کھاسی کون

ایہہ دوہڑہ اوہناں دے اپنے ویلے دے سماج دا چتر ہے۔ اشلوک وچ آئے دا
 ذکر ہے سمجھو روٹی دی گل ہے۔ روٹی دی گل ہے تاں سمجھو ایہہ معیشت دا ویروا ہے۔ معیشت دا
 لفظ نکلیا ای عربی دے لفظ عیشہ توں ہے جیس دا مطلب ای روٹی ہے۔ ایہہ اشلوک بغیر کسے
 رمز دے سدھی طبقاتی سماج دی تصویر ہے۔ اک نکی جیہی ڈھانی کول بے حسابا رزق ہے تے
 دو بے پاسے وڈی گنتی اپنی محنت مشقت نال کیتی کمائی تے وی پورا حق نہیں رکھدی۔ ایہہ
 اودوں ای ہوندا ہے جدوں رزق دے وسیلیاں تے مل ماری گئی ہووے تے باقی ساری
 خلقت ایس مل گیری دے کل پُر زے بن کے جیون ہنڈھائی جا رہی ہووے۔ ایہہ ہی ان
 گنت لوکائی دے دکھاں دا کارن ہے۔

سوال ایہہ ہے کہ جے سیکنڈریاں بٹیاں نوں پوجن والے بٹیاں نوں چھڈ کے اک
 رب تے ایمان لے آون۔ وسیب دی معیشت دی ایس کافی ونڈ نوں مکاون دا جتن نہ کرن۔

تاں کیہ اوہ دکھاں توں مکت ہوسکدے نیں؟ ایس لئی بابا جی ہوراں 'اکنناں آٹا اگلا' والی وچار دھارا ولوں ہو کے ایس مسئلے نوں مذہب نال نہیں جوڑیا۔ جیویں اسیں اپنے پچھوکڑ ول دھیان کر کے دیکھیے کہ سینکڑیاں بُتاں دے پجاری جیہناں دھرم دی اُساری ذات پات، چھوت چھات تے کیتی سی تے اوس نوں دھرم دے آسرے قائم رکھیا سی۔ کیہ اوہناں اک رب تے ایمان لیاون توں ہزاراں ورھے مگروں اج تیکر انساناں وچکار ایس نفرت نوں قائم نہیں رکھیا ہویا۔ ایس لئی بابا فرید جی ہوراں نے طبقاتی ونڈ دے مسئلے نوں اسماناں توں لوکاں دے حق وچ ہون والے فیصلے دی اڈیک نال نہیں جوڑیا۔ سگوں اتھے ای آپ سوارن دے معنے اگھر دے نیں۔ تے اگوں چوٹاں دا ذکر ہے جیویں کوئی بھڑپین لگا ہے، لڑائی چھڑن والی ہے۔ اوہ ایس لڑائی وچ آپ کس پاسے نیں۔ آکھدے نیں۔

فریدا روٹی میری کاٹھ دی، لاون میری بھکھ
جیہناں کھا دی چوڑی، گھنے سہن گے دکھ

اوہناں آپ دی سیان 'اکنناں ناہی لون' والیاں والی دھرولوں ہو کے کروائی ہے۔ آپ بندہ جیہڑے پاسے ہووے نت اوس دی خیر منگدا ہے۔ جے کلام نوں اوس ویلے دی لوکاں دی گزاری جا رہی زندگی نال جوڑ کے پڑھیے تاں کاٹھ دی روٹی رمز ہے اک طبقے دے معاشی حالات دی۔ کیونکہ اتھے فیر روٹی دی گل ہے۔ اوہ حالات جیہناں وچ اک دھردی بڑیاں مشکلاں، وختاں، مشقتاں، مختاں نال کیتی کمائی سر دنیا پل سنبھ رہی ہے تے اوس دی آپ دی روٹی اپنی کرڑی ہو گئی ہے کہ اوس دے جیون دا آسرا نہیں بندی پئی تے اوتوں بھکھ دا لاون۔

بابا فرید جی دی حیاتی تے لکھی جاون والی سبھ توں پہلی کتاب "سیرالاولیاء" وچ لکھیا ہے کہ بابا فرید جی شام نوں اک ویلے ای روٹی کھاندے سن۔ فیر اگلے دن شام نوں کھاندے سن۔ بڑھپا کر کے مدھری روٹی تے گھیو وچ گنھی ہوئی روٹی کھاندے سن۔ جیہناں ویاکھیا کاراں ساہت دے تل اُتے ای رہنا ہوندا ہے تے کلام دی روح نوں پروکھا رکھنا ہوندا ہے اوہناں نے تاں لکڑ دی اک روٹی بنا کے شیشے دے صندوق وچ مڑھا کے دربار تے رکھی ہوئی ہے تے اوہدے پاروں مشہوری وی کیتی ہوئی ہے کہ لکڑ دی ایس روٹی نوں دھاگے وچ

پرو کے بابا جی گل وچ پائی رکھدے سن۔ جدوں بھکھ لگدی سی ایہنوں چک مار لیدے سن۔
ایہہ گل اوس ہستی بارے کیتی گئی ہے جیہڑے زندگی دی حقیقت دے اپنے نیڑے سن کہ
جیہناں آکھیا ”روٹی دین دا چھیواں رکن ہے۔“ جیہڑے زندگی دا ایڈا میکا کی تصور رکھدے سن
کہ آکھیا:

ساڈھے ترے من دیہری، چلے پانی ان
جے ایہہ گل حضرت نظام الدینؒ نے آکھیں ڈٹھی کر کے نہ کیتی ہوندی تاں ایس رمز
نوں سمجھن لئی عام بندے لئی بڑے اڑیکے سن۔ ایس اشلوک وچ نرا کاٹھ دی روٹی ای رمز نہیں
سگوں چو پڑی دی رمز ہے دو جیاں دی محنت دا رس چوس کے اپنی زندگی نوں سکھالا بناو
والیاں دی۔ اک طبقے دی چو پڑی دو جے طبقے دی کاٹھ دی روٹی نال جُوی ہوئی ہے۔ ایہو
ایس اشلوک دا مول وچار ہے۔ تھوڑیاں دی چو پڑی گھنیاں دی روٹی نوں کاٹھ دی روٹی
بناوندی ہے۔ جیس وسیب وچ لوکاں دی حالت ایہہ ہووے۔

فریدا ڈکھاں سیتی دینہہ گیا، سولاں سیتی رات

کھڑا پکارے پاتنی، بیڑا کپر وات

جیس دا پل پل بے وسایا تے راکھی توں وانجھے ہوون دے احساس وچ لنگے اوہ
وسودھر وچ ہوندا ہے۔ وسودھر بندے دیاں چاہواں سدھراں نوں ہرکھ حسرت وچ بدل دیندا
ہے۔ ہک ڈاہ کے مقابلہ کرن دی جرات کھوہ لیددا ہے۔ آپ سوارن دی تھاں دو جیاں دی
غلامی وچ وڈیائی سمجھن لگ پیندا ہے۔ حقیقت دا ساہمنا کرن دی تھاں وہماں بھرماں نوں راکھا
بناوندا ہے۔ ان ڈٹھیاں قوتاں دی دہشت دل تے بٹھائی رکھدا ہے۔ اپنے بے وس ہوون
نوں دینہہ بنا کے اُتے اپنا دھرم اُساردا ہے۔ ایس وسودھر نوں دکھاں سیتی دینہہ تے سولاں
سیتی رات آکھیا ہے۔ جیس وسیب دے لوکاں دی ایہہ حالت ہووے اوہ وسیب تباہی ولے جا
رہیا ہے۔ پاتن کوک پکار ایس لئی کر رہیا ہے کہ اوس دی جاچے بیڑے نوں کپر توں بچایا جا
سکدا ہے۔ اتھے دریا وی وگ رہیا ہے تے بیڑا وی ٹھلایا ہویا ہے پر جا کپر ول رہیا ہے۔
حکمت ایس رمز دی ایہہ ہے کہ معاشی انیاں ای دکھاں دا کارن ہے، جیہناں نال ایہہ انیاں ہو
رہیا ہے جے اوہ آپ سوارن گے تاں انیاں کرن والیاں نوں بہت دکھ سہنے پون گے۔ تبدیلی

توڑ ای طبقاتی کشمکش دے نتیجے وچ چڑھدی ہے۔

پھلڑا

سٹا پھل ہوندا ہے تاں ای سٹے نوں نتیجہ وی آ کھنہ ہاں۔ کسے رُکھ نوں پھل لگنا اک لڑی وار گل ہے۔ کرومبلاں توں پھلڑا، پھلڑے توں پھل اک مرحلہ وار نتیجہ وی ہے تے محسوس نتیجہ وی۔ ہر مرحلے دا نتیجہ وکھری وکھری تے محسوس شکل وچ اپنی پورنتا ول ودھدیا ہویا۔ اکھاں موہرے وادھے پیا۔ زندگی وچ کجھ عمل ایسے ہوندے نیں جیہناں دا محسوس نتیجہ اتھتے تہاڈی اکھاں موہرے نہیں ہوندا جیویں عبادت۔ پر سماجی عمل دا نتیجہ محسوس تے لڑی وار ہوندا ہے تے شرط ایہہ ہے کہ جے عمل جاری رہوے تے نتیجہ وی وادھے پیا اپنی پورنتا ول رُیا رہندا ہے۔ جے پھلڑا لگ جاوے تے نسین رُکھ نوں جڑھوں اُکھیر دینو تے اوہ پھلڑا کدی وی پھل نہیں بن سکدا۔ بابا فرید جی سماجی عمل دے محسوس تے لڑی وار نتیجے لئی پھلڑا دی رمز ورتی ہے۔

پہلے پہرے پھلڑا، پھل بھی پچھا رات

جو جاگین لہن سے، سائیں کٹوں دات

ایس اشلوک وچ رات دا پہر ہے۔ ایہہ وی رمز ہے جیہں دے معنی عربی فارسی اردو تے پنجابی شاعری وچ متھے ہوئے نیں۔ رات توں ہمیشہ ظلم، جبر، انیاں، غلامی تے انسان نوں بے وس کرن والی ہر شے مراد لئی جاندی ہے۔ کوئی ایسی لادو شے جیہڑی انسان نوں بے وس رکھن لئی چڑھائی گئی ہے۔ بابا فرید جی دے زمانے دی رات کیہو جیہی سی؟ ایس دور ول جھات پائیے تاں اوہ دھاڑویاں دا راج سی۔ انجیے راجے جدوں مقامی راجیاں نال رل کے راج کردے نیں تے لوکاں دی غلامی دوہری ہو جاندی ہے۔ ایہہ زمانہ وی آقا تے غلام، بادشاہ تے رعایا، حاکم تے محکوم، اُچی تے نیویں ذات، مرد تے عورت دی ونڈ دا ہے۔ اُتوں وکھو وکھ دھرماں دی ونڈ وی ہے۔ پر بابا فرید جی ہوراں کسے ونڈ دا ذکر نہیں کیتا سگوں اوہناں اوس ونڈ دا ذکر کیتا ہے جیہں دی نینہہ تے ایہہ ساریاں ونڈاں اُسریاں ہوئیاں نیں۔ سگوں ایہہ آکھئے کہ جیہں مڈھلی ونڈ توں لوکاں دا دھیان تھڑکاؤن لئی بناوٹی ونڈاں دا چوکھا چرچا

کتنا گیا ہے اوہناں اوسے تے اُنکل رکھی ہے۔ روپ وچ اوہ ونڈ معاشی ہے تے خیال روپ وچ اوہنوں تقدیر، اُچی نیویں نسل، اسمان تے رب دی بادشاہی، دھرم دے رب ہتی ہوون نہ ہوون وچ پیش کتنا گیا ہے۔ بابا فرید جی جیہڑے انیاں دا ذکر کردے نیں جیہڑی رات دی ولہیٹ وچ لوکاں نوں بے وس ویکھ رہے نیں اوہ ہے:

فریدا اکناں آٹا اگلا، اکناں ناہیں لون

ایس معاشی انیاں دی رات وچ جتھے ہرجی دی زندگی دے ڈیوے دی لاٹ آلے دوالے گھلداں ہنیریاں اگے آپ نوں بچاون دی مرضی دی غلام کھلوتی ہووے، اوہ تھے جاگن ان گنت ڈیویاں نال سورج بنا کے سویر کرن اک سماجی عمل ہے۔ (پنتھ سمھال سویرا) صرف ایس شلوک وچ ای نہیں سگوں ہور شلوکاں وچ جاگن دی وڈیائی کیتی گئی ہے۔

فریدا پچھل رات نہ جاگیوں، جیوندڑو مویوں

جے تیں رب وساریا، تاں رب نہ وسریوں

جیہڑا ظلم تے جبر دے دور دے آخری پہر وچ وی نہیں جا گیا اوہ تاں جیوندا ای مر گیا۔ جیوندا مرن کوئی رمز نہیں سدھ پر دھی جیہڑی گل ہے پر ہے ویا کھیا دی بھکھی۔ مادہ بے جان شے ہے۔ ساری کائنات مادی ہے۔ پھیر مادی شے وچ جند پے گئی تے اوہ جاندار شے بن گئی۔ ہر جاندار شے کھکھی، پسو، درند، چرند جیوندیاں شیواں نیں۔ انسان دا بچہ وی اک جند والی شے دی پدھر تے جمدا ہے۔ پھیر جیہڑے ماحول وچ ودھدا بھلدا ہے اوس ماحول وچ اوس دی سُر تے ودھدی ہے۔ تاں ای کہندے نیں سُر تے سماجی ہوند دا سٹا ہے۔ ایہہ سُر تے ای ہے جیہڑی آپ دی، آپ دے آل دوالے دی تے کائنات دی سیہان کردی ہے۔ اپنی ہوند پچھاندی ہے۔ اپنیاں واپریاں راہیں سُر تے نوں منظم کردی ہے۔ کائنات دے بھیت جان کے اوہنوں اپنے وس وچ کرن دا جتن کردی ہے۔ اپنے آل دوالے نوں اپنی مرضی پٹھ تبدیل کرن دا جتن کردی ہے۔ اسیں جند تے سُر تے نوں اکوای شے سمجھنے ہاں۔ حالانکہ سجائے بال وچ جندتاں ہوندی ہے پر سُر تے نہیں یاں زندگی دے کسے حصے وچ کسے حادثے وچ سُر تے گواچ جاوے، پر بندہ جیوندا رہندا ہے۔ ایس لئی سُر تے جند دو دکھو دکھ شیواں نیں۔ انسان توں اڈ دنیا دیاں جند والیاں ساریاں شیواں جاندارتاں ہے نیں پر سُر تے توں وانجھیاں

نیں۔ ایس لئی اوہ نہ تاں اپنے آپ نوں بدل سکدیاں نہیں تے نہ حالات نوں تبدیل کرن تے قدرت رکھدیاں نہیں۔ جے کسے کارناں موجب انسان دی وی ایہہ حالت ہو جاوے کہ نہ تاں اوس نوں آپ وچ تبدیلی لیاوون تے پک ہووے، غلامی وچ ہی زندگی سمجھ رہیا ہووے، تے نہ ہی اوس نوں ایہہ پک ہووے کہ اوہ اپنے آلے دوالے نوں بدل سکدا ہے۔ سماج دی اجیہی حالت نوں بابا فرید جی جیوندا مویا آکھدے نیں۔ ہن جے اشلوک دل پر تینے تاں دوجی بھکھی گل جیس نوں ویاکھیا نال رجاوون دی لوڑ ہے اوہ ہے رب نہ و سربو۔ ایہوں اک مثال نال سمجھو۔ اک داکم ہے ساڑن ایہہ رب دا قنون ہے۔ جے تئیں و سربو کے تھ اگ وچ پا دیوؤ تے اوہنیں تاں ساڑنا ہی ہے۔ تئیں بھاویں بھل گئے ہو، پر اگ ساڑن دا قنون نہیں بھلی ایہہ ہے رب نہ و سربو۔ ہن اشلوک دا مطلب ایہہ ہویا کہ جو انیاں دی ڈھلدی رات ویلے وی نہیں جا گیا اوس تے رب دا اٹل قنون لاگو ہوندا ہے کہ پھیر اوہ جیوندے جی مر یا ہویا ہے۔ اوہندے واسطے سویر دا کوئی مطلب ہی نہیں رہ چاندا۔ جیویں موئے بندے واسطے زندگی دا سارا ہنگامہ بے کار ہوندا ہے۔ رب دے قنون نوں تئیں و ساروی دیوتاں وی اوہ اپنا نتیجہ پیدا کرن توں نہیں تھڑکدا۔

سچیت رہن، جاگن دی اہمیت بابا فرید جی دے کلام وچ تھاوں تھائیں کھلری ہے۔

فریدا رات کٹھوری ونڈیئے، ستیاں ملے نہ بھاؤ

جیہناں نین نیندراوے، تنہاں ملن کواؤ

راتیں کستوری ونڈی ہے پر اوہناں نوں کوئی حصہ نہیں مل سکدا جیہڑے سٹے

ہوئے نیں۔ بابا فرید جی دی پوری شاعری وچ جاگن زندگی تے زندگی وچ ڈھکویں سیر پاوون

دی علامت ہے۔ کھلو تے جیون تے سون نوں اوہناں موت دے معنیاں وچ ورتیا ہے۔

فریدا اٹ سرہانے، بھوئیں سون، کیڑا لڑیو ماس

کیڑیاں جگ واپرے، اکت پیاں پاس

اوہناں دے موجب جاگن دا عمل وی بغیر پرکھ دے نہیں۔ نہ اوہناں اوس عمل

دے نتیجے نوں اگلے جہان نال جوڑیا ہے۔ ایس دا ایہہ مطلب وی نہیں کہ اوہناں کوئی عمل وی

اگلے جہان نال نہیں جوڑیا۔ اوہناں اگلے جہان نال وی عملاں دے سانگے جوڑے نیں

جیویں عمل جو کیتے دنی وچ درگاہ آئے کم اوتھے ایہہ گل بڑی واضح ہے تے اتھے ایہہ گل بڑی اُگھڑویں ہے کہ سماجی عمل دا نتیجہ تہاڈی اکھاں موہرے ایس دنیا وچ کرومبلاں، پھلواتے پھل بن کے تہانوں عمل دی جاگن دی رات کر کے ملدا ہے۔ ایس دا نچوڑ اک اشلوک وچ انج پیش کیتا ہے:

فریدا لوڑے دا کھ بجوڑیاں، بکر بیجے جٹ

ہنڈے اُن کتا نیندا، پیدا لوڑے پٹ

جٹ علامت اے کسے وی پنجابی لئی۔ دا کھ بجوڑیاں پھل ہے۔ نتیجہ منزل ہے۔ جٹ دا اوس منزل تے جُکُن دا۔ نتیجہ حاصل کرن دا راہ کیہ اپنایا ہے کہ بکر بیج دتے سُو۔ منزل ہے ریشم پاؤنا۔ سکھ حاصل کرنا تے اوس مقصد تیکر اپڑن لئی اُن کتا وندا پھر دا ہے۔ ایہہ دُ پھیڑ ہے مقصد تے اوس تیکر اپڑن دی واٹ وچ۔ ایس دُ پھیڑ داخل کیہ اے؟ پھلواتا۔ جے پھلواتا ای نہ لکیتے سگوں سولاں آگنیاں تاں سمجھو واٹ کراہ ہے۔ جیویں بیماری گھلاون والا دارو پوری بیماری گھلاون توں پہلاں اپنا اثر وکھانا شروع کر دیندا ہے تے بیمار دا ایمان بجھ جاندا ہے کہ ایہہ دارو ای امرت ہے۔ جے دارو شروع توں اخیر تیکر اپنا کوئی اثر ای نہ وکھاوے تے بیمار دے دارو تے ایمان نوں اڈول رکھن دا کیہ طریقہ ہے؟ دنیا نوں تبدیل کرن والا سماجی عمل وی اپنا اثر لڑی وار وکھاندا ہے تاں ای پورے نتیجے دی آس عمل دے جُتے وچ ساہ بن کے رات نال بھڑ دی رہندی ہے۔ جے پہلے پہرے پھلواتا نہ ہووے تاں پکھل رات جاگن دی رات پھل دی شکل وچ خلا وچوں نہیں ڈگ پینی۔

(رہندا گلی وار)

”بیلے وچ چڑیاں“ تے میں

اکھے سردار امراؤ سنگھ مجھٹھیہ علامہ اقبال نوں ملن آئے تاں امیاں ای ذرا لکک
کے سوال جڑ دتیونیں "How is the muse?" سوال انگریزی وچ ہا۔ علامہ نے جواب
پنجابی وچ دتا ”ایہہ شاعری پری نہیں۔ اک ڈاڈھا جن اے، جیہدی اک فرمائش پوری کرو
تاں دوجی لے کے چمبز جاند اے۔ میتھوں ایہدے کولوں پچھا چھڈانا اوکھا ہو گیا اے۔“
علامہ نے آکھیا تاں من لٹو، گل ایویں دی ای ہوسی پر قصہ کہانی کہن والے تاں
کچھ ہور ای آکھدے نیں۔ جن توں چند چھڈانا انج اوکھا اے، بھئی جیہڑا وی کم اوہنوں
سونپیا جاوے، اوہ اک چھن وچ اوٹھوں ویہلا ہو کے مُرد آدوالے ہوندا اے ”سئیں کوئی ہور
حکم؟“ دُنیا دے کم بھاویں ڈھیر نیں۔ پر ایہہ ترٹھ تاں ہانہہ دا رُوڑا بنیا رہندا اے بھئی
جے ویلے سر کوئی کم چیتے نہ آیا تاں ایہہ بے سُننا چند دا ویری بن بھسی۔ پر گل، گل وچ وی
فرق ہوندا اے۔ کسے نوں جن پئے جانا ہور گل اے تے کسے دا جن نوں بندی بنا لینا گل
اے کچھ ہور دی ہور۔ شاعری دا جن اسلام توں پہلاں دے عرب قبائلی شاعراں نوں وی
چمبز دا ہا۔ کدی قافیہ دے ٹڈی دَل نوں ٹکدیاں کسے ہور قبیلے نال جا بھڑدا۔ تلوواراں
نکلدیاں تاں قافیاں دی تھان بھناں تے ویریاں دیاں لاشاں وچھ جاندیاں۔ اکھے انج دا
دعاء کل وی پیا ورتیندا اے۔

سُنی سنائی گل تے یقین کر کے کچھ شاعر جدوں ایس جن نوں کیلن دا جتن کردے
نیں تاں اوہناں نوں اوہ سے بھیر نال واہ پمدا اے ”سئیں ہور حکم؟“ پتا نہیں اردو شاعراں
وچوں شیر حسن خاں جوش نے ایس جن نوں کیلیا ہی یا اوہ آپ اوہندے اُتے امدا اے۔ پر

جوش نے جند چھڈاؤن دی راہ چنگی لہ لئی۔ اپنے جن نوں ون پوتیاں ترکیباں گھڑن تے لا چھڈیا۔ اوڑک اک ہندو جوگی توں مہنا سُننا پیا بھئی ”ترکیباں گھڑن دے کم نوں شاعری نہوے آکھدے۔“ راشدنوں دی ہک ایسے جن نال واسطہ پیا ہا، اوہنے ایہنوں لفظاں دی گھن گرج تے تیور سُر اں دی مہانتا نوں گولن وچ لائی رکھیا۔ فیض سیانا ہئی، اوس کوہ اولپیا دی ہک پری نال سمبندھ جوڑیا نہ اوس کوئی جن کیلیا نہ کسے جن نے اوہنوں اکھیاں کیتا۔ رہی پنجابی شاعری تے شاعر جن جن نوں کیلن یا جن جن تے آوے۔ پگول گل اے یاں پگول گل نہیں تاں مزل دے اندر چھل اے۔

غلام حسین ساجد تعلق سنپال قبیلے نال اے۔ گدا اے، ایس قبیلے دا وی کسے جن نال جوڑ پیا ہوسی تے ایس قبیلے دے کسے جلالی بزرگ نے اوہنوں ”سورج گنڈ“ وچ قید کر چھڈیا ہوسی۔ ایہہ جن ہُن وی اپنے سنیں دے قبیلے دے لوکاں نوں پچھاندا اے پر ہے بے بس۔ تاہیں تاں غلام حسین ساجد نوں اوس تے دیا مدی اے۔

مُجھدے جاون محراباں وچ بلدے دیوے
جد دی کھیڑے پئے گئی کوئی کرماں کئی
سورج گنڈ وچ اُڈدیاں ریتیاں چام چڑکاں
مونہہ متھے نوں چمبون ڈاوراں ونھے جالے
پیراں پیٹھوں تِلکے سٹی بھل ویلے دی
میں نسلاں نوں جھاگ کے اج نوں کیکن بگاں
ورھدے کال اگے نہ چلدی واہ کسے دی
سورج گنڈ نوں کھاگئی بھوویں باہ کسے دی

مُلتان وچ پُرانیاں ماڑیاں دی کوئی کمی اے؟ گھنیاں ماڑیاں تے مزار بڑیاں
وڈیاں ہستیاں دا ترکہ نیں۔ پر سبھناں توں مونہہ موڑ کے ساجد دا سورج گنڈ ول رُخ کرنا بے
وجہ تے نہیں! اک ہور پکھوں جا پدا اے بھئی ایس جن وچ جلالی تے جمالی دوویں صفتاں ہن
پر اوہدے جمال اندر وی اک جلالی شان آہی۔ اوہدی چڑھتل من بھوویں ہائی تے ہے:

پتیل ورگی چھاں سی اوہدی
 دھرتی جیہا کھلار
 گلاں ساویں ٹلیاں ہوئیاں
 نپیاں جیہا وہار
 تننی شینہہ دی تننی ورگی
 پل وچ پتوں پار

تھی گل ایہہ اے بھئی میں مہر غلام حسین ساجد سنپال توں بہوں ڈردا آں۔ ڈرن
 والی گل تاں ہے ای بھئی موتی رولن دی کوشش وچ جے میرا ہتھ کسے کچ دے منکے تے جاپیا
 تاں میرا وی حال گجھ انج دا ای ہوئی:

اوہدے ہتھ وچ نسری دا ہک دانہ آہی
 میں جاتا ایہہ نگ اے

.....

اوہ ڈردا سی
 اوڑک بھیت ایہہ کھل جانا اے
 لاہ میں اوہدے ڈھڈ وچ اوہدا پڑ نہ دیواں
 اوہنوں پھڑ کے گئے وانگوں پڑ نہ دیواں
 ...میں نکا جیہا ہاموں پرسی میتھے ڈردا پاہرا

بال پئے وچ ایہہ جیہی چڑھتل ہووے تاں پکئی عمر وچ کیہ رنگ ہوئی؟ بس اللہ دی
 امان منگئے۔ ایہدے کولوں ڈرنا ایویں کیویں نہیں جے۔ بہوں پہلاں دی گل اے۔ سنپال قبیلے دا
 جن غلام حسین ساجد نوں ریل دی پٹری تے بغیر آسرے دے دور تائیں سدھے بھج دے جاون
 دی مشق کراندارہیا اے۔ ایہہ مشق ونج جیہی نہیں۔ سچ سچا تے نیاں۔ ایسے مشق دی دین
 نیں، جو اوڑک پنڈیوں، ذہن ول رک گئے نیں تے شاعروں تخلیقی رستیاں تے دور تائیں بغیر
 ڈولیاں لئی ٹرے جاندے نیں۔ جے میں بھلدا نہیں تاں ریل دی پٹری میرا جی دے نیڑے
 تیرے دی آہی پراوہناں اوس تے ڈولیاں بغیر سبھ ترانیں بھجن دی مشق ناہی کیتی۔ پٹری دے

آس پاس دے جنگلاں تے شمال جنوب (اُتر دھن) دیاں گھاٹیاں وچ رُلدے رہے۔ پرساجد نے پڑی تے دوڑ کے سدھی راہ ٹرن داؤل سکھ لیا۔

ذرا اگے ودھینے تاں رب سبّوں ہک گوروجی مل جاندا ہے نیں۔ اوہ جن نوں رام کرن داؤل جاندا ہے ہن۔ اوہناں سنپال قبیلے دے جن نوں لہندا دے سفر تے گھل دتا تے جن نوں اوہ تھیں کتاباں وچ بند کر دتا گیا۔ مدّت تائیں جن کتاباں وچ کڑیاں رہیا تے موتی رولدا رہیا۔ پروفیسر غلام حسین ساجد دا مطالعہ بہوں اے۔ چڑھدے لہندا دے دیاں فنی رمزاں اوہ دے سامنے ہتھ جوڑ کھلونیاں نیں۔ ایس پروں اوہنوں کوڑی سّچی واہ واہ نال کیلیا نہیں جا سکدا۔ وارث شاہ نے مینوں ایہودس پائی اے، پئی بے علم کامل نہ ہووے تاں سترے ناگ نہ مول جگایے نیں۔ تے انج وی، جدوں جن بھوتریا ہووے۔ اوس ویلے عامل وی اوس توں کئی کترا جاندا ہے نیں۔ میری تے بساط ای کیہ اے۔ نہ تن وچوں نہ تیرھاں وچوں۔ خیر بُجھارتاں چھڈ کے شاعری دے جن دی کہتی کرتی دی سیر کردے آں۔

”بیلے وچ چڑیاں“ وچ گل چھتر (75) نظماں نیں۔ پہلیاں چار نظماں نوں چھڈ کے باقی اکھتر (71) نظماں 8 مارچ 2001ء تائیں، یعنی صرف نو (9) دیہاڑیاں وچ آکھیاں گئیاں نیں۔ ایہناں نو دناں وچ آکھیاں نظماں دی ونڈ انج دی اے۔

8 مارچ دو نظماں، 9 مارچ اٹھارھاں نظماں، 10 مارچ ست نظماں

11 مارچ اٹھ نظماں، 12 مارچ دس نظماں، 13 مارچ دس نظماں

14 مارچ چھ نظماں، 15 مارچ ست نظماں، 16 مارچ تن نظماں

یعنی اٹھ نظماں فی دن۔ میں حساب کتاب وچ ماڑا آں۔ نو دا پہاڑا وی اوکھا ہو کے ورتیا اے۔ اوہ مبارک احمد والی چال کتھے پئی اپنی ساری شاعری دیاں سطران وچ رگن رکھیاں سن سگوں اپنے ویلے دے شاعران دے مصرعے وی گنے ہوئے سن تاں بے ثابت کر سکینے پئی آپ جناب دا تخلیقی ترکہ دوئیاں شاعران توں گھنا اے۔ پرساجد دی کھید گجھ ہور دی ہور اے۔ غزل ہوندا تاں ہور گل سی۔ قافیہ میلن دی سک اگے ٹوری رکھدی اے۔ ایہناں نظماں وچوں تاں کوئی وی ہک دوئی نال نہیں رلدی۔ نہ قافیہ بوہڑا اے نہ مضمون راہ بُجھاندا اے۔ ہیئت وجہوں وی ہر نظم وکھو وکھ اے۔ آہنگ وی ہور دا ہور اے۔ مڑ ساجد دی شاعری دا

جن اپنا لڑ پھڑاوے تاں کیویں؟

- 9، مارچ 2001ء نوں ساجد نے اٹھارھاں نظماں آکھیاں نیں۔ پنجابی وچ شاعری دے وزن دی جارج پاروں ”عروض“ ورگا نظام نہیں لبھدا۔ ایس پاروں نظماں دے وکھو وکھ سُر (آہنگ تے وزن) تے وکھریویں نوں دس پاروں کوئی داء لایا نہیں جاسکدا۔ آہنگ یعنی نظم دی لے (ہلمپت یا دُرت) نوں نکھیرن دامنڈھ پڑھن پڑھان دے طریقے یا انگ تے اے۔ جیہدی دس لکھ کے نہیں پائی جاسکدی۔ ایس پاروں میں پٹھاں ایہناں نظماں دا کن دے رہیاواں تاں جے ایہناں دی رمز تے کھلار دا اندازہ ہو سکے۔
- 1- اباجی: شاعر دے اباجی دے کردار دا جیوندا جاگدا مہاندرا اے۔ رسی خاکہ نہیں۔
- 2- فرید دیاں چڑیاں: چڑیاں دے اڈن دی لفظی تصویر بابا فرید نال جڑی ہک مثل دے آسرے نال۔
- 3- پیر شینے دے سب: علاقائی روایت دا کھلار۔ سب دا ڈر دچوں وچ اپنی جھال دیندا اے۔
- 4- چونہ سڑکاں تے: اک اجاڑ تے غیر آباد منظر۔ تن تن لفظاں دے مصرعے۔ آہنگ بہوں من کھچواں پر تیز۔
- 5- سورج کُنڈ وچ: ایہوں آثارِ قدیمہ د امرشیہ آکھ لئو۔
- 6- میں تے چڑیاں: دوئی نظم والی تلمیح دی گونج۔ کجھ کجھ صوفیانہ انگ۔ پہلے پنج مڑ تن مصرعیاں دے بند۔
- 7- جراجی بنکس توں مڑ دیاں: سک دا بڑا ای تاثیر بھریا کنایہ۔ نسلی تے قبائلی فخر دا ماڑا جیہا پر چھاواں۔
- 8- ہک دینہہ پھل چھاویں: موسم گرمادی شدت۔ ہک خاص واردات دے رنگ وچ۔
- 9- زور اور نوں: ہک ماڑی جیہی شے دے سہارے اخلاقی سبق۔ اکھان ورگی کھل نال۔
- 10- ہنگل: روح تے پنڈے دا مقابلہ۔ روح دی چڑھتھل۔

- 11- ماواں ٹھنڈیاں چھاواں: ماں دی مہانتا، ماں دی جھولی، امان تے پیاردا کنایہ۔
- 12- راوی نوں سکيا وکھ کے: دریا دی چڑھتل تے سٹھ۔ انسانی کوششاں دے بے تھوے ہون دا کنایہ۔
- 13- بالے بمب دے میلے اندر: کھیڈ تے کھڈاری وچکارتال میل دا کنایہ۔
- 14- ماندري نال گلاں: جسم دی روگ دے سودارو پر روح دا روکوئی نہیں؟
- 15- ہک منگتا تے میں: نکلیاں ہوندیاں ای اپنی وڈیائی دا احساس۔
- 16- ہک پُرانا پچھوتا: رحم تے ہانہہ نوں لگے رُوڑے دا ملیا جلیا احساس۔
- 17- ماہموں شیر دا میل: ریت روایت تے لنگھدے ویلے نوں میلن دا آہر۔
- 18- کاوڑ پاروں: ہک جلالی رنگ دا توڑ کر دا کنایہ۔

ہُن ایہہ تے نہیں آکھیا جاسکدا اپنی ایہہ ہتھو نظماں بونشت وچ آکھیاں گئیاں ہون۔ وچکار دو چونہ پلاں دی ای سہی پر گجھ وچھ ہوسی ضرور۔ مڑ وی دوگلاں گوہ کرن دیاں نیں۔ ہک تاں ہو ”تخلیقی دورے“ وچ شعری مضموناں دا معنوی ڈھنگ پاروں ای نہیں، جذبے دی وگی پاروں وی ہک دوئے توں وکھریاں ہوندا تے دوئی گل اے ”آہنگ دا تنوع“، پہلی گل دا سہرا تاں ”شعور دی رو“ نال لہجہ جاندا اے۔ بھئی ہک موضوع توں دوئے موضوع ول چھال کسے تلازماقی قرینے بناں وی ماری جاسکدی اے (اُنچ ہر کوئی ایہو جیہی چھال کدوں مار سکدا اے)۔ پر ”آہنگ دا تنوع“ تاں اِنجے کجے سر جیا نہیں جاسکدا۔ غزل، مثنوی وغیرہ وچ تاں فنی سہارے موجود ہوندے نیں۔ ایس پاروں اِکُو بحر، وزن یا ”زمین“ وچ وکھو وکھ مضمون کیلن دا زور ہوندا اے۔ کدی اک خاص ”وزن“ شاعر نوں اپنی پکڑ وچ لے لیندا اے۔ جیویں ”ضرب کلیم“ وچ گھنے موضوع نیں پر گھنیاں نظماں ”مفاعِلن فعلا تَن مفاعِلن فعَلن“ والے وزن وچ نیں آکھنا ایہہ وے بھئی تخلیقی پدھر تے ”مضامین دے تنوع“ والا کم کرنا سوکھا اے پر آہنگ دی پکڑ وچوں نکلنا اوکھا اے۔ غلام حسین ساجد نے ایہہ ثابت کر چھڈیا اے کہ ایہہ دوویں کم نال نال وی کیسے جاسکدے نیں۔ خبرے ایہہ آکھنا سچ ہووے، پئی ایہہ گن زرا پُر اہک اوہناں دے کول ای ہوسی۔ اَجے تاں نیں ہو راجیہا کوئی ہو ر شاعر مینوں ملیاں نہیں۔ ایہہ کم جن دا نہیں تاں ہو ر کوئی کیوں کر سکدا اے۔

ہُن نظماں ول پرتیے۔ ایہناں نظماں دی ہک خاص گل پہلی نظر وچ ای من
 بھاندی اے۔ اوہ ایہناں دی ”مقامیت“ اے۔ ایہناں نظماں دا جغرافیہ نہیں اے نہ ای ایہہ
 منظر عامیانہ نیں، جیہڑے اسانوں شاعری وچ باہلے لہجہ جاندے نیں۔ تے جیہڑے منسوہے
 ہوون پاروں چنگے لگدے نیں۔ کیوں جے ایہہ اساڈے تجسس نوں اُبھاردے نیں۔ ساجد
 دیاں نظماں دا منسوہا پن رومانی اتے ماورائی وگی ورگا نہیں (جیویں کالرج دی نظم ”قبلائی
 خاں) نہ ای ایہدے وچ اوہ مثالی انگ اے، جیہڑا مرثیاں دی منظر نگاری دی بُنیاد بند اے۔
 سگوں سودا دا بہاریہ قصیدہ ”سُج اُردی نے کیا مُلک غزل مُتاصل“ یا آزاد دی نظم ”آ اے شپ
 سیاہ کہ لیلائے شب ہے تو“ وی ایسے مثالیت پسندی دا نمونہ نیں۔ بھویں اسیں جاندے آں،
 بھئی حقیقت کولوں ماڑی جیہی دُوری ”جمالیاتی بعد“ دی شرط اے۔ مُڑ وی ساجد اپنیاں نظماں
 وچ خالص مقامی پس منظر مٹھ کے وی ایس جمالیاتی تقاضے نوں پورا کرن وچ کامیاب رہیا
 اے ہک مثال: ملتان وچ پرانیاں ماڑیاں تے تھاواں دا کوئی گھاٹا نہیں۔ گھنیاں عمارتاں نال
 سانوں عقیدت وی اے۔ ایس طرح ایہناں دے ”زمانی بعد“ دے باوجود ”جمالیاتی بعد“ اونا
 نہیں رہ گیا۔ مُڑ وی ساجد نے ملتان وچ ”سورج گنڈ“ نوں چُٹیا اے تے اپنی کلا دے جادو
 نال ایس ڈھانڈے مندر دی کالک وُٹھی صورت نال نثار کے ہک واری مُڑ نویاں کردتا اے:

سُورج گنڈ وچ اُڈ دیاں رتیاں چام چڑکاں

مونہہ متھے نوں چمبون ڈاوراں وُٹھے جالے

پیراں پٹھوں تلکے سنی بھل ویلے دی

میں نسلان نوں جھاگ کے اج نوں کیکن بگلاں!

ایہہ نقشہ تاریخی عمارتاں، خاص کر اوہناں دے تخلیقی بیانیے توں ڈھیر وکھرا اے
 تے حقیقت دے اینا گونیڑے بھئی دُوا مصرع پڑھدیاں میں بے دھیانی وچ دو ہک واری
 اپنے مونہہ تے ہتھ پھیریا، جیویں اوہتھے جالا چمبو گیا ہووے۔ مندر دی قدامت دین پاروں
 استعارہ دا مواد ایہو جیہے عناصر توں لیا گیا اے، جیہڑے خالص حسی نیں (تصوراتی نہیں)۔
 ایس مٹی تے ننگے پیر ٹرن دا خیال کر کے وی پنڈے وچ ہک جھڑجھڑی جیہی کھلر جاندی
 اے۔ ایہو حال ”پیر شینے دے سپ“ پڑھدیاں ہوندا اے۔ ایس طرح اُسیں اپنے وسیب توں

باہر نکل کے اپن چیت گجھ اجیہے منظر اں وچ گھر جاندے او، جیہڑے نیڑے ہو کے دی دور،
جانو ہو کے دی انجانو تے پرانے ہو کے وی نویں نیں۔

ایتھوں تائیں تاں تاثر جیسی ہئی پر ”چونہ سڑکاں تے“ دے بیان وچ تاں جیسی
لمس وی موجود نہیں مڑ وی ”اُجاڑ“ دا احساس تہاڑے وجود تے غلبہ پالیندا اے۔
”جراحی بینی توں مڑ دیاں“ وچ سک دی سول توں اڈ منظر اں دی ایہو جیہی اٹھان اے،
بھئی مینوں لگدا اے، جے میں کدی اوس پاسیوں لنگھیا تاں ساجد دے آبائی مکان گوسیان
وچ مینوں کوئی اکھ نہ ہوسی۔ معروضی حقیقت نگاری دی ایہو جیہی ہک مثال ”وچ تلمبے“ وچ
وی ملدی اے:

سے ورھیاں توں کھلیاں کندھاں
اوڑک اک دن مٹی ہوسن
مٹی مٹی نوں چٹ لینا

ایس قلعے دیاں کندھاں وی نیں سُن اڑیکے چڑھیاں
ویکھو! بھڑ دیاں گھر دیاں ایویں کد تک رہسن کھڑیاں؟
ظاہر اے بھئی ایڈا پُرانا قلعہ کدوں تائیں ویلے دے تھیڑے کھاسی؟ پر اوہدے
نقش ہمیش ساجد دی نظم وچوں وسدے رہسن۔

ساجد دی زبان پنجابی شاعری دی رسمی زبان نہیں۔ ایس رسمی زبان دے وی کئے ای
روپ اساڈے ساہمنے نیں تے ہر روپ، ہر رنگ من کھچواں اے۔ شاہ حسین توں بکھے شاہ تائیں
ایہدے کئی روپ نیں۔ وارث شاہ تے مولوی غلام رسول دی زبان وچوں علیست جھلکدی اے۔
مڑ وی مقامی روپ رس نوں سٹیا نہیں جاسکدا۔ خواجہ فرید کول کلاسیکی سرائیکی لہجے دارس اے۔
سلطان باہودی اکو ”ہو“ وچ زبان دے کئے ای رس رچے ہوئے نیں۔ پیر فضل گجراتی نے پنجابی
نوں حافظ شیرازی ساہویں لیا کھڑا کیتا۔ غلام یعقوب انور نے واہی نیچی نوں استعارہ بنایا۔ جدید
دور وچ شہری لہجہ تے لفظیات دا چلن عام اے۔ پر غلام حسین ساجد دی زبان خالص مقامی لہجے
دی زبان اے۔ ایس مقامی لہجے نوں ساجد نے اک تخلیقی رکھ رکھاؤ نال ایہو جیہی پان چڑھائی

اے، جیہدی وضاحت کرنا میرے سوسوں باہر دی گل اے۔ اک مثال دینا واں۔ خبرے گل بن جاوے۔ ”بولیاں“ پنجابی شاعری دی ہک صنف اے۔ ایس وچ اکثر تاں نہیں پر کدی کدی تخلیقی رکھ رکھاؤ دے چنگے نمونے مل جاندے میں جیویں:

یار چھڈیا گلی دا پھیرا پنجاں دے تویت بدلے

جگا وڈھیا بوڑھ دی چھاویں تے نومن ریت بھج گئی
نی تیری میری اک چندڑی، تینوں تاپ چڑھے میں ہونگاں

تیلی والی کھال ٹپ گئی، لونگ والی بھال لئے گوڈے

جٹی نکلی نہا کے چھڑوں تے سلفے دی لاٹ ورگی!
پر نہیں۔ ساجد کول بولی ٹھولی دا ایہہ کچھ کدوں اے۔ اپنے خالص مقامی لہجے دے باوجود اوہدی زبان ادبی اعتبار نال بہوں سربہ زبان اے۔ اُستاد شاعر آکھیا اے بھئی لفظ غریب، اوپرے تے جانگی وی ہودن تاں گل کتھ دا سوپن اوہناں نوں رسیلا بنا دیندا اے۔ ایسے طرح زبان جے چالو، عمومی تے ورتوں دی زبان توں وکھری وی ہووے تاں گھڑیمہ اوہنوں من کھویں تے رسیلی بنا دیندا اے۔ پر ایہہ سنگھڑ پن، ایہہ سلیقہ رب دی عطا اے۔ جیہدی وضاحت لفظاں راہیں نہیں ہوسکدی۔ ساجد کول ایس عطا دا کوئی گھاٹا نہیں۔

ساجد دی لفظیات مقامی رنگ پاروں کجھ اوپری اے۔ میں کوئی سوگو لفظاں پاروں ساجد کولوں مدد منگی تاں اوہناں جوابی خط راہیں معنی لکھ بھیجے۔ کھلیا بھئی اکثر لفظاں وچ اوکڑ تلفظ پاروں ہئی۔ جو میرے کان اوکھت دا سبب بنیا (محمد احسان خاں جیہناں نوں معنوی تحقیقی دا خفت اے۔ اوس فہرست دی ہک نقل لے گئے نیں تاکہ سند رہوے)۔ وگی پاروں صرف ہک مثال دیساں۔ ”ہل“ دا جیہڑا تلفظ میں جاندا آں اوہ ”ال“ اے۔ ایس پکھوں ہک ہور گل توجہ دے لائق ایہہ وے بھئی مقامی لہجے دا ہک اپنا رس وی ہوندا اے۔ جیویں باقی صدیقی دا ”پوٹھوہاری لہجہ“ یا خواجہ فرید دا سرائیکی لہجہ۔ ساجد نے جیس مقامی بولی نوں ورتیا اے، میں اوہنوں

کوئی ناں نہیں دے سکدا۔ لسانیات دے ماہر دسدے نیں بھئی زبان بے معلومے طریقے نال
تھوڑے تھوڑے پندھ تے بدل دی اے۔ مقامی لوکاں نوں ایس تبدیلی دا احساس نہیں ہوندا۔ اوہ
اپنے وسیب تے تھوڑے پندھ تے بدلے ہوئے لفظ دے جانو ہوندے نیں پر باہر دے لوکی
اوہنوں جھبدے سپہان لیدے نیں۔ ساجد کول لفظ اپنی بدلی ہوئی صورت دے نال وی پوری نظم
دے تاثر وچ انج گنھے ہوئے نیں بھئی اوہ اپنے معنی آپے دے دیندے نیں یعنی معنوی تاثیر وچ
اوہناں دا اوپرا پن کندھ نہیں بندا۔ اک ہورا، ہم گل ایہہ وے بھئی شہری قارئین سگوں نویں نسل
نوں ایہہ لفظیات ایس پاروں وی منسوبی جا پدی اے بھئی اوہ اوس خاص رہتل، وسیب تے
ماحول دے جانو نہیں، جیہڑا انج توں پنجابہ سٹھ درھے پہلاں ساڈے خٹے وچ ہا۔ جدوں پنڈ وچ
گھوہ وگدے ہن، ٹیوب ویل دار وچ نہیں سی تے گھراں، مسجدیں تے درگاواں تے کوڑے تیل
دے دیوے بلدے ہن۔ شہراں وچ بجلی انج عام نہیں سی (شہراں دے چوکاں وچ مٹی دے تیل
نال بلن والے لیپ جلدے سن)۔ گھراں وچ گرمی توں چھٹکارے پاروں پکھے سن نہ
اے۔ سی۔ مرد سگوں زنانیاں وی صحن وچ لگے درختاں چھادیں سر لگا بہندیاں سن پر اوتھے وی لو
دے تھپڑے سہنے پمدے ہن۔

میں ہک ساہ وچ کینیاں ساریاں گھاں کر گیا واں۔ مثالاں دے کے گل کردا تاں
چنگا لگدا۔ چلو ہن کجھ مثالاں ”بیلے وچ چڑیاں“ وچوں ٹولدے آں:
”کھوہ دی کانجن دا اے سارا بھاریڑ تے
پیڈی لٹھ تے

کھوہ گیڑیاں ٹک ٹک کردا اے گتا
پڑتھے وچوں سمدا پانی
بھردیاں، وچ نسا دے خالی ہوندیاں ٹنڈاں
کھاڈے دی وتھ
کھوہ وچ ڈھاہندی ماہل
ایہناں سبھ دی سانجھ سنبھال اساڈا کم اے

کا نجن دا نہیں!

جیہیں نے کا نجن، لٹھ، پڑ، بیڑ، گُلتا، نسا، مالھ، ٹنڈاں نہ ویکھیاں ہوں، اوس پاروں
ایہہ زبان منسوہی اے پر کیہ زبان دے رس دے کھلارنوں بند یا جاسکدا اے؟
ہُن ویکھو، گرمیاں دی دوپہرنوں رُکھاں تھلے دا ہک منظر:

لوہری گھٹی

پتیل پٹھاں ڈب کھڑی چھاں داسا گھٹیا
جھمّی تان کھلوتیاں شاخاں اندر پکھو بولے
کھلے ہتھ دیاں تلیاں ورگے ہمو پتر ڈولے

پتیل دی وِری چھاں دے بیان پاروں، ہتھ دیاں تلیاں ورگے پتراں دچوں تردی
دُھپ تے پرچھاویں دے تال میل ایڈامن کچواں نہ ہوسکدا، جے شاعر نے ”ڈب کھڑی
چھاں“ تے ”کھلے ہتھ دیاں تلیاں“ دے نال ”شاخاں نوں جھمّی تان کے“ کھلوتا نہ دکھایا
ہوندا۔ انچ پتیل دیاں شاخاں دی پلھ تے بناوٹ آپے ساہویں آن کھلندی اے۔ ایسے طرح
نظم ”راوی نوں سکیا ویکھ کے“ وچ ”سکے ہوئے راوی دے بیٹ دا وگدے راوی دی ہاتھ نال
مقابلہ کرن دا منظر، راوی دے پل تے کھلو کے پل پٹھوں لنگھدے پانی دے نظارے توں
ڈھیر وکھرا اے۔ شاعری ایسے جادوگری دا دُوجاناں اے۔

ساجد دی اک ہور من کچھویں صفت دا بیان کرنا وی ضروری اے۔ بھئی اوہ تشبیہ،

استعارے یا کنایے پاروں وی مقامی روایت نوں بنیاد بناوندا اے: جیویں

آسے پاسے ڈھول وگدے

کوئی واہر چڑھی سنگ والی!

چیتر وچ سویر ویلے کسے پنڈ کولوں لنگھیاں تخی سرور دے عرس نوں جاندا
”سنگ“ (زارین) ہک رومانی منظر اُگھڑ دے سن۔ لوکاں دیاں جھولیاں وچ کوڈیاں تے جو
ہوندے سن۔ ڈھول دی آواز سُن کے پنڈوں چھوٹے، وڈے سک تے سواد پاروں سنگ ول
بھج پمدے سن۔ جدوں پنڈ والے ”سنگ“ دے میل نوں امدے تاں ”سنگی“ کوڈیاں تے جو
مٹھ بھر بھر کے اوہناں ول اُچھال دیندے سن تے بالاں دی عید ہو جاندی سی کیوں جو اوہناں

نوں سال واسطے مفت کھیڈن نوں کوڈیاں لہجہ جاندیاں سن۔

اک روایت ایہہ آہی، بھئی گرمی دی دوپہر نوں گھرو والاں وچ تیل تے پنڈے نوں خشبو لاکے رکھاں پٹھوں نہیں لنگھدے سن کیوں جے ایہہ ویلا ہوائی شیواں دے آرام دا ہوندا اے۔ جے کوئی نابری کردا ہئی تاں چڑیاں اوہنوں پے جاندیاں سن۔ ایس خوف نوں ساجد نے ”ہک پرانا ڈر“ وچ بڑے ڈرامائی انداز نال ورتیا اے۔ ”ہل دے ویاہ تے“ وچ ہک پُرانی کہانی دُہرائی گئی اے۔ پر نوں رنگ نال۔ پرانا روپ ایہہ ہئی بھئی کاں تے چڑی نے مل کے کچھڑی پکائی۔ کاں پانی لین گیا تاں چڑی ساری کچھڑی کھا کے چلکی دے پُوتھلے جا لگی۔ کاں نے گرم سلاخ پُوتے پھیری تاں چڑی دے کھمب سر دے نیں تے اوہ چیکدی ”ہائے! ہائے! میرا بونڈا سڑیا!“ کاں ولدا دیندا اے ”کیوں پرایا کچھڑ کھا دھا؟“ ”ہل دے ویاہ تے“ وچ گل ہو ر اے بھئی ہانڈی چولھے وچ مٹا لاون کچھوں ڈلھ جاندی اے۔ پر روایت نال جڑی ہوئی سیانف اپنے جھال تے سواد دے جاندی اے۔

ساجد دی نظم ”پنڈ دا کوٹھا“ وی ہک اجیہا منظر اُگھاڑدی اے، جیہڑا شہر دے واسیاں پاروں انجانو اے۔ سگرٹ دی پتی نال کیتی سجاوٹ، پڑچھتی، پڑچھتی تے ٹکے ہوئے پتل، کانہہ تے کانسی دے بھانڈے، بھانڈیاں تے ویلے تے بھلی پاروں اُگرے ہوئے داغ دھبے، مٹی دیاں کندھاں تے کچی اٹ دے بنائے۔ جدید شہراں دے وسنیکاں پاروں بھاویں کسے طرح دی رومانی دلچسپی رکھدے ہوون پر اوہ اوس سبک دا اندازہ نہیں کر سگدے۔ جیہڑی ایہناں کوٹھیاں وچ وسن والیاں نوں اپنے وسیب دی ہوسکدی اے۔ ایس گل نوں اگے ٹورن پاروں نظم ”ناسٹلجیا“ دیاں ایہہ سطران ویکھو:

مڑ وی کھارے چڑھیاں

مینوں روپ ذرا نہیں چڑھیا

یا ”گاؤن“ دیاں ایہہ سطران:

مڑ جھنگ سیالیں ڈھکن نوں

بھن چھو نیاں!

شہر وچ شادی ویاہ دیاں رسماں زریاں پُریاں، مہندی، برات تے ویسے تائیں گنجی

کے رہ گئیاں نیں، کھارے چڑھنا، ٹھوٹھیاں بھننا، کھارے چڑھن توں پہلاں گھڑولی بھرنا، سہرے دے پھل چنن پاروں گڑیاں دا گاؤں گمدیاں پنڈوں باہر باغاں نوں جاونا، برات چڑھن ویلے بھیناں دا گھوڑے دی واگ پھڑ کے لاگ منگناں۔ ایہہ ساریاں گلاں ہن کہیںوں یاد رہیاں نیں۔ پنجابی ادب دے طالب علماں وچ وی خبرے ایہہ گلاں ہن کوئی جذباتی تاثر پیدا نہ کردیاں ہوں۔ مڑ وی ساجد نے ایہناں گلاں نوں چتار یا اے تے رنگ میلہ وی لا کھڑا کیتا اے۔

غلام حسین ساجد نے گزری نوں وسار یا نہیں۔ چلو ایہنوں ناسٹلجیا آکھ لینے پر ایس فرق دے نال بھئی ایہدے وچ ”احساسِ زیاں“ نہیں سگوں رنگن چڑھدے وجود داسکھ اے۔ ساجد واسطے ایہہ سارے منظر، جیوندے جاگدے، ساہ لیندے تے اوویں دے اوویں نویں نکور نیں۔ اوہ ایہناں دے بیان وچ ایہو جیہا سیکھ پاندا اے، جیہو جیہا سیکھ ورڈز ورتھ نوں جھیل کنارے بے شمار پھلّوں دی یاد دے دتاسی۔ ساجد داسکھ خبرے اوس سیکھ توں وی سُر ہا اے۔ کیوں جے ایہہ منظر دا نہیں اک زمانے نوں نویں سرے جیون داسکھ اے، کلیاں نہیں ساری وٹوں نوں نال لے کے۔

ایہدی اک وجہ تاں ساجد دے شعور وچ ”قبائلی تفاخر“ دا مثبت رجحان اے۔ جیہدیاں جڑھاں ماضی وچ بہوں دور تائیں کھلریاں ہوئیاں نیں۔ بازنطینی دور، بابل تے ایہدیاں شاہیاں۔ نجد تے یمن دے صحراواں تائیں کھلریاں ایہناں یاداں وچ کسے شے دے کھڑیوں نالوں کسے شے دے پالوون دا احساس سر ہا اے (معاف کرنا! میں تہانوں اوہدی اردو شاعری ول لے رُیا آں کیوں جے شاعر دا گل ایسے داء نال ای تھ آسکد اے)۔ ایہناں یاداں وچ ہک آنکھی سُر ماؤسدا اے تے رجزیہ کیفیت سر ہی اے۔ پنجابی شاعری وچ پرانی شاہیاں تے سلطنتاں تے چڑھتل کرن دا حوالہ نہیں لیکھدا۔ اتھتے دی دنیا ہور اے، پر پہلی دنیا نال جُوی ہوئی، سگوں اوہدے وچوں نَسری ہوئی۔ کتاب دا انتساب ویکھو تے فیر نظم ”ابا جی۔“ ایہدے مگروں گھنیاں نظماں ایہو جیہیاں نیں، جیہناں وچ اپنے گھر، اپنی وستی، اپنے وڈے تے اوہناں دی ہوند نال گوہری سنگت دا پک ہوند اے۔ میں ایہنوں آکڑ تے فخر نہیں آکھاں گا۔ انج آکھینے بھئی ساجد اپنے ماضی نالے اپنے آون والے وقت توں چکی

نہیں بھی ایہناں ویلیاں توں مونہہ موڑ کے کسے ہو رہا تے تُوں دی اوکھ کرے۔ ایسے پاروں ساجد نے جو رماں (تمیحات) ورتیاں نیں۔ اوہ روایتی نہیں، مقامی نیں۔ سورج گنڈ، پیر شینے دے سپ، بالے بمب دامیلہ، نوراننگ (شاعر) ماہموں شیر دامیل، تلمبے دا قلعہ تے ہو رماں تسیں ایہنوں ناسٹلجیا آکھوتاں آکھو میں تے مُر آکھساں بھی ایہناں نظماں دی اُٹھان ناسٹلجیا دے روون دھون، عبرت پذیری دی تھاں گزرے نوں فخر نال چٹارن تے اے۔ ایسے پاروں اوہدے اسلوب تے بیان وچ ہک لکک، ہک سرشاری ملدی اے۔ اپنا پچھو کڑ، ماضی تے پینڈو رہتل اوہدے وجود دی ٹٹ بھج دا نہیں، شخصیت دے پک تے ہنروری دا آسرا اے۔ میری تھاں جے سلیم احمد ہو رہی ہوندے تاں انج آکھدے ”ایہہ اوس طبقے دی شاعری اے، جو اوہ اثر پیدا کردی اے، جیہڑا ساڈی اپنی رہتل دا جمیا اے!“

ساجد نوں پکھو آں نال گھنا پیا اے۔ پر ایہہ پرندے روایتی نہیں کاں، طوطا، لالی، گھگھکی، چربل، ٹیڈر، ہریوال، ککوے تے تلیر وغیرہ نیں۔ چوہیاں اوہناں دی شاعری وچ خاص اہمیت رکھدیاں نیں۔ خاص کر نظم ”بیلے وچ چڑیاں“ وچ چڑیاں دیاں اڈاناں دے جو منظر نیں اوہ ساجد دیاں تخلیقی اُٹھاناں دا استعارہ نیں۔

تُسیں آکھسو بھی ایس ترقی یافتہ زمانے وچ میں وی ساجد دے مگر مگر کیہڑے کچے کپکے، ونگیاں ٹیڈھیاں راہواں وچ بھٹک رہیا واں پر سجنو! گل انج سدھی ساہویں تے اک پرنتی نہیں جے۔ اوہدی شاعری وچ تاں اج دے سہ دی بھرپور سمجھ وی موجود اے تے نویں شعور تے سماج دا نتارا وی۔ نظم ”کملیاں رملیاں گلاں“ ای پڑھ کے ویکھ لوو۔ بورٹو و طبقے نالے نودولتیاں دا جیہڑا مہاندرا اُلکیا گیا اے۔ اوہدے وچ جیہڑی نویں سوجھ بوجھ تے نتارا پیش کیتا گیا اے۔ اوس توں کیویں مگر یے؟ ایہہ تے ہک کچھ ہو یا! ”خلقت گئی ادھوری“ نویاں تے اج دیاں سیاسی تے سماجی قدراں دی کھل ہک پُرانی حکایت راہیں لاہندی اے۔ حکایت دے پردے وچ حقیقت دا بیان بڑا ای من کچھواں داء اے۔ ایسے ونگی دی ہک ہو ر نظم ”اگلی صدی وچ“ اے۔ پچھلی صدی وچ دُنیا دے رنگ ڈھنگ وچ اینیاں تبدیلیاں آئیاں نیں۔ اپنی گواہی پتھل ہوئی اے تے اپنی گواہی بھئی جیس کسے وی ایس صدی دے پچھلے پنجاہ سٹھ گواہی سال ویکھے نیں۔ اوہ جیکر اج دی نسل نوں مڈھلے دیہناں دے قصے سناوے تاں اوہ

ساڈیاں گلاں تے خبرے یقین ای نہ کرسکسن۔ سگوں کئی واری تاں آپ یقین کرنا اوکھا ہو
جاندا اے کہ اسیں کتھوں چلے ساں تے کتھے آن کھلوتے آں۔ ”شہر وچ خلقت“ تے ”میری
سک“ وچ ایسے طرح دی سیانف ملدی اے۔

شاعری دی گل کسے نہ کسے پکھوں اوڑک عشق تے عاشقی (حقیقی یا مجازی) تے
آن کھلوندی اے۔ تے ایس پاروں ایس کم نال جُوی لفظالی وی اپنی ہوند دی دس پاندی
رہندی اے۔ پر ساجد دی شاعری وچ مینوں ایس حوالے دی سک ای رہی پر عشق دے
دوئے حوالے تے چالے تھاں تھاں ملدے نیں، جیویں:

”میر انوں ہارنگیا رنگیا! مینوں وی تاں رنگدوں!“

جھمر جے جھمر دا دارو، جھمر اج مجھاوے، جھمر چپ نوں بھنے، جھمر کال نوں
کھاوے!“

ہک بیلا میرے اندر اے، پراوتھے کال دا ڈیرا اے
میں تاں روون روون کردا، پراوس روون نہیں دتا“

ایہہ تے ایس جیہے ہور دھیمے دھیمے بول اوہنوں بابا فرید، شاہ حسین، بلھے شاہ دی
واہیاں لیکاں تے بے کھٹکے ٹور دے نیں۔ بھاویں ساجد نے مولوی غلام رسول ورگا ”چٹھے
یوسف کہے زلیخا“ والا زور بیان نہیں ورتیا۔ مڑ وی اوہ ہک مونہہ زور تے سیلابی شاعر جا پدا
اے ”چل چلیے نال چراغاں دے“، ”کر پونیاں“، ”چونہہ سڑکاں تے“، ”پوڑی“، ”اگلی صدی
وچ“، ”سانجھ“، ”من قابونہیں دیندا“، ”میں تے دُنیا“، ”جیہیاں نظماں نیں، جو کھا کھاں بھن
دی شعری چھل آون مگروں ای لکھیاں جاسکدیاں نیں۔ جے رہی عشق دی مجازی سطح تاں
پٹھلیاں سطراں وچ کوئی نہ کوئی رمز ہے ضرور۔

”اوسے نوں نہیں مل سکدے جیہنوں رہ سکدے ساں نہ ملنوں

بھریاں ہونیاں اکھاں، گھر دا جاندا ہاں، خبرے اوہ کتھے سی اوسلے میں نہیں
مڑ کے تکیا!“

ایسے کوٹھے اندر ہک دن میں تکیا سی اوہنوں۔ جیہدی یاد نے اج تک مینوں
کاہیاں ہون نہیں دتا“

خبرے ایس ورھے کوئی اوہدی۔ یاد نہیں آئی اوڈی
 ”بیلے وچ چڑیاں“ جیہڑی اڈان پئی اُڈ دیاں نیں۔ میں اوہدی چس چائی اے پر
 کئی تھاواں تے اوہدیاں علامتاں تے رمزاں نوں اے کھول نہیں سکیا۔ میرے خیال وچ باقی
 داکم تہاڈے آپ کرن دا اے۔

ایس کتاب دا مجموعی تاثر انج دا اے بھئی ساجد نے اوس روایت نوں، جو پنجاب تے
 پنجابی داست اے، زندہ کرن دا اوہر کیتا اے۔ وڈکیاں دے جس، دیہات دی ریتل، بھلیاں
 ہونیاں رساں نوں نوپاں رمزاں تے علامتاں دا روپ دینا، خالص مقامی تلمیحات، ٹھیٹھ سگوں نزول
 زبان۔ ایہہ ہتھو کچھ پچھلی صدی دے ویہار نوں تخلیقی سبھانال نوں جیون دین دی کوشش اے۔
 ایٹا کوسوہنا، پئی ایہدے سوہنپ دی مثال وجھوں ہک قصہ پیایا داما اے۔
 اکھے عربی شاعر فرزدق گھوڑے تے سوار کدائیں لگا جاندا ہاتاں کسے لبید دا ایہہ
 شعر پڑھیا:

”وَجَلَّ السَّيُّوْلُ عَنِ الطُّوْلِ كَانَهَا

زُبْرُنْجِدُّ مَتَوْنَهَا أَقْلَانَهَا“

(چھل نے مہدے نقشیاں نوں انج اُگھیر دتا اے۔ جیویں اوہ کتاباں جیہناں
 دے اکھراں نوں نوں قلم پھیر کے مُر لشکا دتا گیا ہووے)
 فرزدق گھوڑے توں لٹھا، سجدہ کیتا تے مُر سوار ہوٹریا۔ کسے آکھیا، ایہہ کیہ جھل پُنا
 اے؟ اوس آکھیا، ”سجدات قرآن نوں تسیں سیاندے او، سجدہ شعراں نوں میں!“
 ساجد دیاں نظماں وچ اجیہے کئی مقام امده نیں۔ مینوں سجدہ کرنا چاہیدا سی پر
 جاہل آں۔ رمزاں نوں پائی ای نہیں یاں پائی تاں دیر بعد پائی۔ فرزدق ہوندا تاں کچھ دم
 ”سجدات شعراں وچ سجدہ سہودی اجازت ہے یاں نہیں؟“ مُر وی میں سجدہ سہو کر لیا اے۔ بھاویں
 کوئی منے نہ منے!

پنجواں وید

کافی دی اُنج تاں کافی لوکاں اپنے اپنے انداز وچ تعریف کیتی اے، پر مضمون تے ہیئت دے لحاظ نال نجم حسین سید تے محمد آصف خاں ہوراں دیاں تعریفاں خاص حیثیت رکھدیاں نیں۔ ایہناں وچوں سید ہوراں دی تعریف وچوں تے ہر آزاد نظم بھادیں اوہ آزاد وی ہووے کافی اے۔ ایسے طرح اوہناں دے حلقہ اثر دے شاعر مشتاق صوفی نے وی اپنی کتاب ”پٹھ و گے دریا“ داناں پہلوں کافیاں مشتاق صوفی رکھیا سی۔ ہن کتاب داناں تے بھادیں اوہناں بدل دتا پر ”پٹھ و گے دریا“ دی شاعری تے اوہوای رہی ناجیہنوں اوہناں کافیاں ای آکھیا۔ نجم حسین سید* ہوراں وی اپنیاں جدید نظماں نوں کافیاں آکھیا۔ جتھوں تائیں ”سنگت وید“ دی شاعری دا تعلق اے تے شاعر نے آپ وی ایس شاعری نوں کافیاں آکھیا اے۔

ہن اسیں جدوں ”سنگت وید“ دی شاعری نوں ویکھدے ہاں تے اپنی نوعیت دی وکھری جدید سگوں جدید ترین شاعری نظر آوندی اے پر پھیر وی جیہڑی سخت شرط کافی واسطے محمد آصف خاں ہوراں نے لائی اے، اوہ شرط اوہناں پنجاب دے کلاسیکی صوفیاں دی شاعری نوں مکھ رکھ کے لائی اے۔ ”سنگت وید“ دیاں کافیاں اوس تے وی پوریاں اُتر دیاں نیں۔ آصف خاں صاحب تے ہو رکئی نقاداں دے مطابق کافی دی وڈی شرط اوہدے وچ استھائی دا ہووے اے۔ جدوں اسیں ”سنگت وید“ دیاں کافیاں تے جھات ماردے ہاں تے اوہناں

* نجم حسین سید ہوراں کافی دی تعریف کدھرے وی نہیں لکھی پارکھ نے ایہہ شا اوہناں دی شاعری وچوں آپ کڈھیا ہے۔

کافیاں چوں ہر کافی دے متھے تے استھائی دا جھمر جھلکد انظریں آوند اے۔ میں ایہہ گل ایس کر کے کیتی اے کہ ”سنگت وید“ دیاں کافیاں، کافیاں اکھوان واسطے تے ہر شرط پوری کردیاں نیں، پر ایس توں بعد اوہ کافیاں اپنی معنوی حیثیت نال نہ صرف پنجابی دے کلاسیک سگوں اج دی لکھی جان والی کافی توں وی بالکل اچر ج، وکھریاں تے نویاں نیں۔

ایہناں کافیاں وچ پہلی وکھری گل تے ایہہ اے کہ ایہہ اپنی ہیئت، مضموناں تے معنوی اعتبار نال ساریاں کھل لڑی پڑتیاں تے ہکا دکھ دیندیاں صاف لبھدیاں ہن۔ انج معلوم ہوندا اے جیویں رفعت عباس ہوراں ساڈی شاعری وچ پہلی واری کافیاں وچ مثنوی لکھی اے۔ مثنوی ایس پاروں کہ رفعت عباس نے کافیاں دے کلاسیک مضموناں یعنی بندے تے رب داسمبندھ دل تے جسم دا تعلق تے روح تے بُت دی گل یا ہستی دے قصے دی بجائے انسان سگوں خاص طور تے ایس دھرتی دے منکھ دی تاریخ بارے مثنوی لکھی اے، پر لکھی کافیاں وچ اے۔ ہُن رہی گل ایہہ کہ ”سنگت وید“ وچ جو کجھ اے اوہ تاریخ اے کہ شاعری اے۔ کیوں جو ایہہ کافی اے یاں نہیں ایہہ گل تے بعد وچ چلے گی۔ پہلوں تے ایس ایس گل داسا کڈھ لینے کہ ملتان، ہڑپا، ٹیکسلا تے موہنجودارو دی تاریخ دا بیان شاعری وی اکھوا سکدا اے یاں نہیں۔ کیوں کہ سڈنی دے آکھن وجوں تاریخ نوں بھاویں نثر وچ بیان کیتا جاوے تے بھاویں نظم وچ اوہ تاریخ ای رہندی۔ ایہدی اوہ مثال ایس طرح دیندا اے کہ جے ایس ہیروڈوٹس دی تاریخ نوں نظم کر دیئے تے پھیر وی اوہ تاریخ ای رہے گی۔

ہن ایس ”سنگت وید“ ول ویکھیے تے ایس دے لکھاری دے لکھتی یا تخلیقی رویے ول ویکھنا پہلوں ضروری اے۔ ایس رویے ول ای ویکھ کے ایس ایس بارے کوئی گل کر سکدے ہاں۔ ہُن رفعت عباس نے جیہڑی لکھت نوں کافیاں آکھیا اے اوہ تاریخ یاں تحقیق بالکل نہیں سگوں تاریخی تے تحقیقی تناظر وچ کیتی گئی شاعری اے۔ کیوں جے ایہہ تاریخ تاں ہوندی جے ویداں تے یونانی مورخاں دے حوالے دتیاں یاں دتیاں بغیر صرف اوس ویلے دے حالات بیان کردتے جاندے، پر رفعت نے تے اوس سمنوں تصور وچ لیا کہ اوہدے بارے اپنے جذباتی رد عمل دا لکھتی روپ وچ اظہار کیتا اے تے اوس اظہار نوں اوہنے ”سنگت وید“ دے ناں نال اک خاص ہیئت وچ جمع کر دتا اے، تے اوہ ہیئت شعری اے۔ ایس

شعری ہیئت وچ تصورات نیں، سوچاں نیں، تخلیقی جہتاں نیں، فنی نظریے نیں، جیہڑے سارے دے سارے واقعے نہیں سگوں خاص شعری اسلوب تے ذاتی انداز وچ بیان نہیں کیجے گئے سگوں الوچے گئے نیں۔ ایہناں تاریخی حقیقتاں نوں اپنی حیاتی نال جوڑ کے نویں راہ تے نویں ٹور بارے اپنے وچارتے اپنی جانبداری دا اظہار کیتا گیا اے۔ ایہناں واقعاں نوں چھڑا بیان کرنا تاریخ اے۔ ایس حوالے نال تخلیقی رویہ نہیں سگوں شاعری اے تے اپنی گل اے کہ ایہہ شاعری پرانی اے، نویں اے، چنگی اے، بھیڑی اے۔ یاں ایس وچ کیہ بھریا گیا اے؟ ایہہ تے پھیر ایس نوں پڑھیاں سگوں گوہ نال پڑھیاں ای پتہ لگ سکدا اے۔

سبھ توں پہلی گل تے ایہہ کہ ”سگت وید“ دی شاعری دیاں جڑھاں شاعر نے اپنی دھرتی وچ لائیاں نیں سگوں ایہناں جڑھاں راہیں خوراک حاصل کر کے لگے پھلاں دی بُو باس توں متاثر ہو کے شاعری نوں مطالعے دا تزکا بھادیں لایا ہووے تے دکھری گل اے، پر اصلیت ساری اپنی اے، سگوں ایس شاعری راہیں اوہنے اک دانشور دی اُچی تھان تے کھلو کے اپنے لوکاں نال حکمت دیاں گلاں کرن دا آہر کیتا اے اوہ کہندا اے۔

ساڈے بیت چھڑے بس بیت نہیں

استھے شاعر کسے دربار دا قصیدہ گو یاں پرھیا دا جیوے جمان آکھن والا مرانی نہیں سگوں دانشور اے، تے دھرتی دا عاشق اے تے اوہو قوماں ترقی کردیاں نیں، جیہناں دے پیر دھرتی تے ہون۔

رفعت صرف واقعے بیان نہیں کردا سگوں اوہ واقعاں نوں علامتاں بنا کے اپنے پڑھن والیاں دے سامنے رکھدا اے تے سوچن واسطے پریردا اے جیویں اوہ کہندا اے۔

ہک ہاتھی ولد البیہ گیا ہے

کہیں بہوں قدیمی سا گروچ

انہاں ٹُردے ڈھاندے پاندھیاں کو

اساں بارش کول بچندے ہیں

رفعت عباس دے مورخ ہون دی بجائے دانش ور تے شاعر ہون دا اک ثبوت

ایہہ ہے جیویں اوہ آکھدا اے۔

بہوں مچھی ہے پئی پانیاں وچ
 بہوں تریکتی ہن پیاں من اُتے
 دل بُہن دے نال ٹھیہہ ویندی

ایہناں سطران نوں پڑھ کے پرانے پنجاب تے آریاواں دے حملے ول نظر مارو
 تے نالے نسلیات دے سیانیاں دے ایس نظریے تے وی کہ بُہن (ڈولفائن) اصل وچ لڑکی
 اے، جیہڑی اپنی حفاظت کان پانی وچ غوطہ مار گئی تے پھیر پانی وچ لُندی لُندی پانی دی ہو
 کے رہ گئی۔ ایہہ یاں ایس قسم دیاں ہو سوچاں تے قاری داکم اے۔ کیونکہ تنقید ایسے کر کے
 تے تخلیق نو اکھواندی اے کہ بعض واری شاعری نوں پڑھ کے اک اچھا قاری ایہو جیہا نکتہ
 کڈھدا اے، جیہڑا شاعر دے اپنے ذہن وچ وی اُکا اوس طرح نہیں ہوندا جیویں قاری دے
 ذہن وچ نقش ہو جاندا اے۔ ہن نسین آپ دسو کہ ایہہ شاعری اے کہ تاریخ؟ باقی رہی گل
 شاعر دے تاریخ جان دی تے ایہہ جانکاری ای تے چنگا شاعر تے چنگی شاعری پیدا کردی
 اے۔ اک عام بندے تے شاعر دا ایہو ای فرق اے کہ عام تے ان پڑھ بندہ صرف اپنا حال
 ہنڈھا وندا اے جد کہ شاعر اپنے مطالعے دے زور تے حال دے نال نال اپنا ماضی وی
 ہنڈھا وندا اے تے اوہدے نال نال ماضی دے دکھ درد دا حصہ بن کے چنگا حال تے اوس
 توں چنگا مستقبل تعمیر کرن دا جتن وی کردا اے۔ ایہہ گل سمجھن واسطے تے اوہدی کافی دی
 استھائی پڑھ لین ای کافی ہووے گی۔ ساری کافی پڑھیاں تے چودہ طبق روشن ہو جاندا
 نیں، پر پڑھے لکھے دے، استھائی اے۔

بہوں وڈے ہک گودام دے وچ
 کوئی کاٹھ کباڑ دے پھل کھڑ پین

سگنوں بعض تھاں تے شاعر نہ صرف اپنا ماضی ہنڈھا رہیا اے سگنوں اپنے نال دیاں
 نوں نال لئی پھردا اے تے اپنی ہزاراں سال پہلی محبوبہ دکھا وندا اے۔ جیویں رفعت دی ایہہ
 کافی اے۔

ایہہ شہر روانہہ دیاں پھلیاں دا
 کہیں ساون دے وچ ہس گیا ہے

اتھتھے ذرا وارث شاہ دی ہیر دا سراپا وی یاد کر لئو۔ جیویں اوس آکھیا ہا۔

گردن کوچ دی انگلاں روانہ پھلیاں،

ہتھ کولڑے برگ چنار وچوں

رفعت دی سوچ اُڈاری بہوں اُچی تے اوہدی موتی کڈھن دی چنھی بڑی ڈونگھی
اے۔ پھیر اوہ چنھی راوی تے چھٹاں وچ ماردا اے۔ جیہوں سبھوں دے مانگوں پانی دیاں
چھٹاں تے فخر نہیں کردا جیویں وسیب توں کٹے ہوئے لہور تے دوسرے دڈے شہراں دے شاعر
فارسی توں اُردو تے اُردو توں پنجابی وچ نقل مار کے اصل دی بجائے نقل وی تیسرے درجے
دی پیش کردے نیں۔ ایس طرح دو واری چگلی بُرکی نوں تیسری واری چگل کے ساڈے
مظلوم قاریاں اگے پیش کر کے وچاریاں دا جی کچا کچا کرن لگے ہوئے نیں۔ تے ایس چگل
چگلے وچ وی ساڈی دھرتی دی بُو باس نہیں ہوندی۔ پر رفعت نے اپنی دھرتی وچوں علامتی
سواد پیش کیجے نیں تے علامتاں ایس طرح پیش کیتیاں نیں کہ تاریخ نوں شعری بانا پوا کے
ساڈے اگے رکھ دتا اے، جتھوں ویکھ کے اپنے آپ ای ساڈے ذہن وچ نویاں ڈیزائناں
دے نقشے اُبھر دے نیں۔ میں بغیر کسے تبصرے توں دو بند پیش کرداں۔ جے تئیں تاریخی
حقیقتاں توں واقف ہوئے تے تہاڈا ذہن ضرور نویاں تصویراں بنائے گا تے نویاں علامتاں
تراشے گا۔

لہا بانے، مولھ بدھیندے ہوئے

ہتھ لنگم اُتے دھریندے ہوئے

کوئی ڈنخہ شہر وچ لاہندا پئے

ہک سونا وڈکیاں پوریا ہئی

جیہو ساڈے تائیں پُچیا نہیں

کہیں دیگ دے اندر واہندا پئے

کہیں کالی بھید دی اُن اُتے

ہک ٹینگر ہتھ پھریندی ہے

کوئی بدل بندا آوندا پئے

ہن تھیں آپ دسوا یہ تارخ اے کہ تاریخی شعور دے چیاں وچ ڈھلی ہوئی شاعری
 دے کثیر الجہتی نمونے۔ پھیر پنجاب دے دریاواں دی جنگل وسوں۔ وادیاں وچ گھائے
 درخت تے جھاڑیاں۔ اوہناں وچ جانگی جانوراں دی بہتات۔ وستیاں وچ دراوڑاں دی
 یعنی دھرتی دے جمے جائیاں دی وسوں۔ ہر رچھ تے گوریلے دیاں پنڈاں تے وستیاں وچوں
 ٹیاریاں چک کے لے جاون، تے اوہناں دیاں پیراں دیاں تلیاں چٹ چٹ کے اوہناں نوں
 ٹرن بھجن توں آ کی کر دین۔ پھیر اوس توں اگے دیاں ساریاں گلاں۔ ایہہ سب انسانی تارخ
 تے سائنسی معلومات نہیں، پر ایہناں نوں مکھ رکھ کے رفعت دیاں لکھیاں ایہہ لائناں تہانوں
 شعری سواد دین تے ایہنوں پرانے علم دے زور تے نویں شاعری من لینا تے سواد نہ آوے
 تے میں تہانوں ایہناں سطران نوں تارخ آکھن توں منع نہیں کردا۔ لائناں ایہہ نہیں۔

ہک رات اساں دراوڑیں دی
 پوری مرضی دے نال ٹر پوندی
 کوئی نرتکی ہے کہیں پوڑی تے
 کوئی پانیاں پھل کنول دے ہن
 پر چھاواں ہے جیہڑا چم گھندے
 کہیں اپنے جیس پر چھاویں گوں
 رچھ تلیاں چٹ چٹ چندر دیاں
 اوں کو اپنے جوگا کر چھوڑے

ہک چاننی روہ تے جاگدی ہے
 پروستی دے وچ لاہندی نہیں
 مٹی اوہوای اے تے اوہوای مٹی جائے نیں، پر آزادی گھس گئی اے۔ ایسی گھسی
 کہ مرنہیں ملی۔ کدے حملہ آوراں دے غلام تے جے دوسرے حملہ آور آئے تے پھیر غلاماں
 دے غلام بن گئے۔ پھیر چل سوچل ایہو جیسے سلسلے، مرد غلام تے زنانیاں غلام، نسلاں بدلایاں
 نسلاں کراس ہوئیاں، پر ہزاراں سالوں بعد وی اپنی سنجان قائم رہنا تھوڑی گل اے۔ زیاں
 اے تے نال نال احساس زیاں دی زندہ اے۔ ایہوای حلالی جذبہ حلالی ہون دی سنجان

اے۔ کراسنگ تے برحق اے کچھ مرضی نال تے کچھ زبردستی۔ پر جے اسیں مشرقی ہاں تے مشرق دیاں علامتاں ساڈی سوچ دا حصہ نیں۔ تریہہ توں پنجاہ صدیاں بعد وی اینا کچھ بہت نہیں۔ ایہی کراسنگ بعد وی سچھ ساڈی علامت تے کالی تے ساول نال جوت تے ایہو اپنی سنجان، ایہو سنجان جاندی وی تے نہیں۔ یاں تے اُکا جاوے تے پواڑا ملے۔ جے نہیں جانی تے پھیر کچھ کرن دا آہر کیوں نہ کہتا ونجے۔ میں سرانیکی پنجابی دے جیہڑے وچ نہیں پیندا۔ میں تے بندیاں دی گل کرداں تے بندے جیہڑے پنج ہزار سال توں سستے نیں۔ گنا دھیا سیالکوٹ دے علاقے داسی یاں ہڑپا دے لاگے چھاگے دا۔ پراونے آریہ نسل دے شہنشاہ دی وزارت چھڈ دتی سی پر اپنی بولی نہیں سی چھڈی۔ بولی جیہڑی ایسے مٹی دی سی، ایہناں پنجاب پانیاں دی سی اوہ بولی جیہڑی نہ پنجابی اکھواندی سی خورے کیہ سی اوہاناں، پر گنا دھیا دربار چھڈ کے اپنی مٹی چوں پنکری بھاشا وچ لکھی ہوئی پوتھی لے کے جنگل وچ چلا گیا تے ایسے مٹی تے ایہناں پانیاں دے جے پالے جنگل جانوراں نوں اپنی پوتھی دے پنے پڑھ پڑھ کے سناونداتے رچھ کھیلے تے ہرن گائیاں پیار پوتھی بڑے شوق نال سُن دے۔ خورے اوہ ایہہ زبان سمجھدے ہون۔ نہ سمجھدے ہون گے سُن دے تے سن نا۔ ایسے کر کے گنا دھیا اوہناں تے خوش سی پر حکمران آریہ تے اوہدے درباریاں تے نہیں، جیہڑے اوہدی زبان نہیں سن سنا چاہندے، جیہڑی مردی اوہ ویکھ نہیں سی سکدا۔ ایسے کر کے جیہڑا ورقہ اوہ جانوراں نوں سُن دیندا سی اوہ پاڑ کے سٹ دیندا۔ اوہنے وی کوئی سنیہا تے مرن لکیاں اپنے جیون نوں دتا ای ہووے گا۔ اوہ ایویں تے نہیں صدیاں بعد وی زندہ۔ شاہ حسین وی تے اوہدا ای تسلسل اے جیہڑا آہندا اے۔

شاہ حسین فقیر سائیں دا، تخت نہ ملدے منگے

تے رفعت عباس وی اوہدی رہند کھوندا اے جیہڑا کہندا اے۔

کیہڑے سچھ دے پٹھ پکایاں ہن

اساں مورتیاں اپنے موسم دیاں

ساڈی مٹی گھر دی ویندی ہے

پر دُھپ اندر دی لاہندی نہیں

ایہہ باہر دی دھپ اندر تائیں تے اندر دی دھپ باہر تائیں اپڑن ای تے نہ
مرن دا ثبوت اے۔ مینوں پنجابی سرائیکی دے چکر وچ نہ پاؤ پر ہک گل میرے توں کن کھول
کے سُن لَوئی میں زندہ ہاں۔ میں ایتھوں دی مٹی ہاں، پانی ہاں، جنگل ہاں تے پوری ہوند
ہاں۔ ایہو ہوند تے ہے جیس دی لمی عمر دی دعا رفعت عباس کردا اے۔ زندہ کان ای لمی عمر دی
دعا کیتی ویندی اے مردہ کان تے نہیں، جیویں رفعت عباس کہند اے۔

انہاں واہندیاں وگدیاں کافیاں وچ

ہک دُعا ہے لمبیاں عمراں دی

تساں کہیں کتاب دی خوشبو وچ

اینویں ہولے ہولے ہنڈے ہو

ایہہ لمی عمر دی دُعا میرے لئی اے۔ تہاڈے لئی اے تے اوس لئی اے جیہندی سنبان
رفعت عباس انج کرویندا اے۔

اوندے سرتے ٹھلھی گپڑی ہے

اوندے پیر بھوئیں وچ لتھے ہوئے

اوندی تاں اسماں دے یاری ہے

پر گالھ کوئی اینویں بنی نہیں

توں گالھ تاں خود سمجھیندا اپنیں

بابا اکھ والے نوں تے ہر کوئی گالھ سمجھا رہیا اے تے ہر اکھ والا سمجھ رہیا اے، پر
گالھ ایویں نہیں بنی۔ اوہو تخت نہ ملدے منگے والی گل، بابا مایوسی گناہ ہے۔ اسماں انجیں سوچی
بیٹھے ہاں جو اسماں مر گئے ہاں، حالانکہ اسماں زندہ ہاں، جاگدے وی ہاں، بس ذرا اوگھ آگئی،
بس نیکی جیہی اوگھ انجیں چار پنج ہزار سال دی اوگھ۔ انج ٹاں پال سارتر دے آکھن وجھوں
جدوں اسماں سوچدے ہاں تے اوہدا مطلب اے پئی اسماں ہاں۔ اسماں وی انجیں پست
ہاں۔ محفل وی زندہ ہے تے موہراں وی مری نہیں تے گھنگھر وی ٹٹے نہیں۔ رفعت عباس نے
قبل مسیح دی ایسے مٹی دی ڈانسر موہراں نوں کیا خوب علامت بنا کے پیش کیتا اے۔ ہن کوئی
بندہ اپنی پرانی تاریخ توں واقف نہیں تے ایس وچ شاعر داکیہ قصور؟ پھیر اپنی مٹی دی صورت

نوں دھوپونجھ کے ساہمنے لیاونا؟ اپنی محبوبہ نوں محبوبہ آکھنایاں ماں نوں ماں آکھنا شعور ذات اے علیحدگی پسندی کس طرح اے۔ اج اسیں اکیویں صدی وچ پیر رکھن دی تیاری کر رہے آں۔ ہر اک بندہ اپنا حق چاہندا اے اج consolidation نہیں چل سکدی۔ رفعت عباس نے ایہناں حقیقتاں نوں سمجھاون واسطے اپنی مٹی نوں گو کے علامتاں دے گھگھو گھوڑے بنائے نیں، پراونے ڈنگی رُلدی علامت ول اکھ بھواں کے وی نہیں ویکھیا۔ ایہتوں تک کہ سسی ہیر دیاں ایسے مٹی دیاں علامتاں وی چونکہ عام ہن ایسے کر کے اوہنے ایہناں دی ورتوں نہیں کیتی سگوں موہراں، ملوہیا تے پدما ورگیاں نوایاں علامتاں گھڑیاں نیں۔ ایس طرح رفعت دیاں علامتاں جغرافیائی ہون دے نال نال تاریخی وی ہین پر مٹی توں وکھریاں نہیں۔

”سنگت وید“ دی شاعری داسارا سفر عرفان ذات داسفر اے، جیہڑا کہ تاریخ تے جغرافیہ دے حوالے نال اگے ودھ رہیا اے۔ شاعر ایس سفر دوران ویدک ویلے چوں لنگھ رہیا اے تے لنگھدا لنگھدا اپنی ہوند نوں پاڑ کے باہر نکل آوندا اے تے ان گنجیاں سرحدیں تک پھیل جاندا اے۔ اوہ جیہڑی مرضی زبان یا زبان دا جیہڑا مرضی لہجہ ورتے پراوہدی شاعری دا جغرافیہ تے تاریخ ہڑپا، وادی سون، ٹیکسلاتے پنج دریاواں دیاں وسعتاں وچ پھیلیا ہویا اے۔ اوہ ویلے دے ڈونگھے سمندراں چوں اپنی ایس طریقے نال بھال کر رہیا اے کہ اوہدے پیر پتھر دے سمیں وچ تے ہتھاں دیاں انگلاں اکیویں صدی نوں چھوہ رہیاں نیں۔ اوہ اپنے پرانے بھڑاں دی اندرواندیری اُساری چھوہ بیٹھا اے۔ اوہدی ایس اُساری دا کوئی عنوان نہیں ایس کر کے کہ ایہدے ہزاراں لکھاں سگوں کروڑاں عنوان بندے نیں۔ اوہ عنواناں تے تختیاں دی گل اپنے قاری تے چھڈی جاندا اے تے پرانے بھڑتے دھولراں دی مرمت آپوں کیتی جاندا اے۔ ایہہ کوٹ نویں سرے توں اُسر گئے تے اوہناں اپنی پچھان آپے کرا دتی اے۔ جیویں اوہ کہندا اے۔

ساڈے ہتھ ہن، چکنی مٹی ہے
ساڈا پنڈا بھاویں بھک کوئی
ہک اُچا کوٹ اُسر دا پئے
ہک لیک کوئلیاں ٹُر پئی اے

اساں اپنا آپ ڈھونڈے پئے

ایس بھال وچ جدوں تھقیتاں اوہدے ساہنے آوندیاں نیں تے اوہدی دوہرائی
ویلے اوہ اپنے آپ علامتاں بندیاں جاندیاں نیں۔ ایہہ دریاواں دیاں پھاٹاں تے ہڑھ
ویلے بنیاں جھلیاں تے چھنب اوہناں وچ اُگیاں کوندراں تے بُوٹے آپے علامت بن
جاندے نیں تے رفعت دی شاعری نوں جنم دیندے نیں۔ کوندراں نوں علامت بھاویں
اشوال فقیر نے وی بنایا سی پر ایہہ سب کچھ کسے ہک دا نہیں ساڈا ساریاں دا اے پر کوئی
ایدے نظر تے بھولے۔ میں پنجابی دا لکھاری ہاں تے پنج دریاواں دی مٹی دا بنیا ہویا ہاں۔
میں ایہہ تے کسے نوں مجبور نہیں کر سکدا کہ اوہ مینوں وی اپنا بھرا سمجھے پر کوئی مینوں اوہناں
نوں اپنا بھرا سمجھن توں تے نہیں روک سکدا۔ میں ایس ساری شاعری نوں اپنی شاعری تے
اپنی ہڈ ورتی سمجھداں۔ میری صورت عاشق والی۔ عشق جُوت داناں تے ہک طرفہ طرِ عمل دا
ناں ایں۔ عشق واسطے معشوق دی رضامندی تے منظوری دی لوڑ نہیں۔ معشوق تے بادشاہ ہوندا
اے اوہ جو چاہوے کرے۔ عاشق اپنا رستہ کیوں چھوڑ دیوے۔

اتھتھے جتھے وسیب نوں مذہب تے مذہب نوں مُلاں دے حوالے کردتا جاندا اے
تے مُلاں یاں قاضی حاکم دا نمائندہ اے جو قاضی آکھ دیوے حاکم دا قانون ایں۔ پر پھیر وی
رفعت عباس دی موہراں دا ایڈا حوصلہ اے کہ اوہ نہ گھنگھر ولاہ رہی اے نہ لُکا رہی اے سگوں
چھنکائی جا رہی اے۔ آریاواں دی رادھا وانگوں اوہنوں نوں تیل دی لوڑ نہیں۔ اوہ دراوڑاں
دی فنکارہ اے جیہدی سبھا نوں روشن رکھن لئی سمجھ اپنی ذمہ داری سمجھدی اے۔ سمجھ دُھپ دا
پیش خیمہ اے تے دُھپ مشرق اے۔ جے دُھپ قیدی نہیں بنائی جاسکدی تے دُھپ دا جایا
مشرق وی بہتی دیر قید نہیں رکھیا جاسکدا۔ ذرا رفعت عباس دی کافی دے ایہہ مصرعے ویکھو

اگوں حاکم ہے، پچھوں قاضی ہے
ڈیکھو موہراں پئی مسکاوے
ساڈا عشق اساڈے کاٹھ وچوں
کیوں دھمی وانگوں جاگ پیا

کیویں دھپ دے وانگوں ٹر پیا ہے

اگوں در ہے، اگوں دریا ہے

جیڑھاڈ وکھی رمز سمجھاوے

تہذیب دا ایہہ سفر اے جیس سفر وچ شاعر کدے اپنے پچھوکڑ دا نظارہ کردا اے
تصور تصور وچ تے کدے حال دا نظارہ کردا اے تے ویکھدا اے کہ اوہدی دھرتی دے پھل
سُفنا تھی گئے ہن تے باہر والے سارے پھل فروٹ پردھان بن گئے نیں۔ ایتھوں تک کہ ہُن
اساں اپنا اصلا تصویریاں، اشتہاراں، عجائب گھراں تے پوسٹراں راہیں ویکھ سکدے آں۔
ساڈے تے فتح پاؤن والے ساڈی ہوند وچ سرایت کر گئے نیں۔ ساڈے شہراں دے
وسنیکاں وچ رضامندی تے لالچ راہیں تے پنڈاں وچ زبردستی۔ شاعر دا اپنا ضمیر ایس گل
تے افسوس کردا اے کہ اساں جے تے راوی سکی پر ایس سفر وچ کتے کتے شاعر توں ایسے حملہ
آور تے ایسے غیر ملکی وی نظر آوندے نیں جیہناں ہتھوں لیون دا سانوں فخر تے خوشی وی
اے۔ اوہ لوک نیں جیہناں سانوں اساڈی روحانی سنجان کرائی تے سانوں ساڈے رب نال
واقفی کرائی۔ اوہ صوفی ہن، درویش ہن۔ ایس سسے لئی وسیب شاعر نوں چنگا وی لگن لگ
پوندے۔ اوہ دیاں مجھاں گاواں، محنت نال لیاوندی ہریالی، اوہ دارہن سہن ایس کر کے کہ حملہ
آور کدے وی کسے دا وسیب پوری طرح مُکا نہیں سکدے سگوں کافی حد تک آپ وی تھوڑے
تھوڑے او سے رنگ وچ رنگے جانے نیں۔ ایسے طرح ساڈا وسیب تے ہوند وی حملہ آور مُکا
نہیں سکے سگوں شاعر دے اکھن موجب اوہ جتا سانوں کپدے ہن اسیں دونا پنگر دے ہاں۔
اپنے وسیب، اپنے پنڈاں بیڑھیاں دے اُجڑن دی ایہہ داستان ای ایس شاعری دی روح
اے۔ ساڈے بھڑاں دیاں اُچائیاں، ساڈے دھولراں دے کھولے، ساڈے کھنڈراں دیاں
ٹھیکریاں دیاں گلاں باتاں ای رفعت عباس دیاں کافیاں دی روح اے تے اوہدی شاعری
اے تسیں آپ سوچو جدوں چارلس لیمن وی اوہدے پرانے تے اُجڑے پنڈے تے لکھی نظم
The Deserted Village شاعری دا بہترین نمونہ ہوسکدی اے تے پھیر رفعت عباس دی
تہذیب دے کھنڈراں دیاں گلاں سناوندیاں اوہدیاں کافیاں کیوں بہترین شاعری نہیں۔ ایہا
شاعری تے حلال دے ہون دی سند اے۔

اوہدی شاعری دریا سندھ وچ پائیاں جان والیاں بکھن (Indus Dolphins)
 دیاں داستانیں جیہڑیاں علمِ نسلیات دے سیانیاں دے مطابق کدے ایسے مٹی
 دیاں ٹیاریاں سن، جیہڑیاں اپنی عزت بچاون واسطے دریاواں دیاں کنڈیاں توں دریاواں دے
 ڈوگھ دیاں ہو کے رہ گئیاں۔ اوہنوں اوہ ویلے یاد آوندے نیں جدوں گڑیاں تے مچھیاں وچ
 فرق سی۔ مچھیاں شکاریاں نوں پھساویناں پیندیاں سن جد کہ مٹیاریاں اوہدی ملکیت تے لٹ دا
 مال سن، جیہڑوں پھساوون دی تکلیف کرن دی لوڑ نہیں سی بس جدوں چاہو پھڑو تے ورتو۔ ایس
 کر کے گڑیاں نے مچھیاں تے بکھناں بننا خیریت سمجھیا۔ ایس ”سنگت وید“ پڑھ کے اندازہ
 کر دے ہاں کہ ساڈے دانشوراں نوں ایہو جیہی شاعری دی لوڑ ایس کر کے پئی جو ایس اپنیاں
 نویاں نسلاں نوں اشارے کنائے نال اپنی تاریخ تے چنگے سہ بارے جانکاری دیندے
 رہیے۔ ورنہ دین الملوک و ملوک الدین انوسار مالکاں ساڈے معجزے وی غلام بنالئے تے
 اپنے معجزے ساڈیاں حقیقتاں تے نافذ کر کے ساڈے کرشن جیسے کالے اوتار وی معجزے دے
 پردے پا کے اپنے بنالئے۔ ایس کر کے کہ اوہ اپنیاں گوریاں ٹیاریاں اجڑ دے اجڑاک کالے
 کرشن اُتے لکھیاں وانگوں ڈگدیاں ویکھن دی بدنامی کسے طرح برداشت نہیں سن کر سکدے۔
 پر گڑیاں کیہ کردیاں گڑیاں دی جتھوں نشا ہونی سی اوہناں اودھرای جانا سی۔ ایس کر کے
 اوہناں ساڈا کرشن وی ساتھوں کھوہ لیا۔ پر جدوں کوئی سائنسی بلیچنگ پاؤڈر اوہدی کالی کھلڑی
 نوں گوری نہ کر سکیا تے اوہدے تے معجزیاں دی تہہ چڑھادی اکھے اوہ ناگ گنڈھ وچ چھال
 مارن نال ناگ دی زہر نال کالا ہو گیا سی۔ اُنچ گورا آریہ ای سی حالانکہ اوہ کالا سی تے دراوڑ
 نسل چوں سی۔ جیہڑے دراوڑ توں کوئی کم نہ پیتا تے اوہ راگھشس اکھوایا۔ ایہہ شاعری ایسے
 پاروں تے کرنی پئی جیویں اک کافی دا بند اے۔

ایہہ سبک ایویں نہ ہوندى بیت بناون دی
 جے ویدیں وچ کوئی راخس ساکوں آہدا نہ
 کوئی شعر آکھن دا ویلا حالی مکلیا نہیں
 ایہہ اج دی سنگت دا وید پڑھ کے سانوں پتہ لگدا اے کہ ایس تے شہد دیاں لکھیاں ہاں

جیہڑیاں چھتے بھری جانڈیاں ہاں تے اگلے شہد نچوڑی جانڈے نال نال ساڈے چھتے جھگے وی
 بھنی توڑی جانڈے نیں۔ کیہ کریئے ہُن تے ساڈیاں تریمتیں وی ساڈے تصوراں وچ
 بڈھاپے دے روپ وچ آوندیاں نیں۔ ساڈے بال بالپنے وچ ای بڈھے ہو گئے نیں۔ اُنج
 ساڈی دھرتی تے اج وی سب کجھ اے پر ساڈے کان نہیں۔ بہاراں والیاں گلاں تے
 گنیاں۔ اسیں اپنیاں وڈکیاں نوں اوہناں شلیڈیاں وانگوں ویکھدے ہاں جیہڑے کچیاں
 کندھاں والے کوٹھیاں تے بیٹھے نیں تے اوہناں دیاں لتاں لمک کے دھرتی تے وچھیاں
 ہونیاں نیں دُور دُور تک۔ ساڈے مال اگلے ہک کے لے گئے نیں پر اسیں بازاریں خریدے
 پھر نے آں۔ حالانکہ ساڈا مال ولن والے اندروں ڈرے ہوئے نیں کیوں جے اوہناں نوں
 اپنی ہمت دا پتہ اے تے ساڈی ہمت دا وی۔ ایہہ کمی دے منڈے دے اپنے چودھری دے
 منڈے دی ہک تے بہہ کے روٹی جان والی گل اے کہ ایہنے اُٹھ کے مینوں مارنا ایں۔ حالانکہ
 اوہ اُٹھ سکدا ہووے تے اُٹھے نا۔

رفعت دی شاعری وچ وقت اے جیہڑا تصویراں تے فلم وانگوں لکھی جاندا اے تے
 اسیں ویکھی جانڈے ہاں دن سوچے پر کدے کدے ایہہ ویلا جاندا جاندا ساڈے اندر جھ وی
 مار جاندا اے۔ غلام نسلاں غلام بال ای جمدیاں نیں، پر ایہناں بالاں دارنگ تے نین نقش
 پرانے وقفاں دی نشان دہی وی کردے نیں۔ کوئی اکھیاں والا کاش ویکھے۔ رفعت عباس نے
 اپنیاں کافیاں وچ نہ صرف پہاڑاں ولوں سگوں سمندراں ولوں آکے مارن والیاں دی نشان
 دہی کیتی اے۔ اوہنے کتے اپنے جواناں تے ثیاراں نوں جھمراں پاوندیاں وی دکھایا اے پر
 جھمراں پاؤن والیاں نوں اپنے پینتیریاں دا شعور نہیں۔ ایہہ سب کجھ لوک رقص دے ناں تے
 لاشعوری طور تے ای ہوئی جاندا اے تے اسیں ایس نوں اپنی پہچان نہیں سگوں اپنا روزگار تے
 بنالیا اے تے کمرشل ہو گئے آں، تے فائنسر اپنے ڈائریکٹر کولوں اکھواندا اے پیسے نو تے
 وین ریکارڈ کراؤ۔ سو ساڈا حسن بھاریں ساڈا پچھو کڑا اے پر اج اوہ کمرشل اے، اشتہار اے۔
 ایس طرح اسیں ویلے دی سٹیج تے اپنے ویکھن والیاں لئی مسخرے بنے ہوئے آں۔

رفعت عباس دی شاعری نوں گوہ نال پڑھیے تے اوہ اج دے سسے تے اک
 ٹھکویں تنقید اے۔ نویاں تعلیمی پالیاں تے لعنت اے، جیہناں سانوں پڑھیاں توں ان پڑھ بنا

چھڈ یا۔ جے ساڈے تعلیمی نظام وچ ساڈیاں مادری زبانان نوں اوہناں دی اصل تھان مل جائے، تے ساڈی ایہہ ان پڑھتا تے لائمی، ساڈے شہراں دے عیاش لوکاں دے مقابلے وچ آسکدے نیں سگوں اگے ودھ سکدے نیں۔ جیویں اوہدی اک کافی دی استھائی اے۔

جے ایہے گالھیں نویں سرے توں ٹوریاں ونج سکن
کہیں گڈ گڑ گوں وی پڑھن گلوب سکھایا ونج سکدے

جے ایہہ شعور جاگ پئے تے پھیراسیں باہر لیاں حملہ آوراں دے اگنی دیوتا واسطے اپنا ماجھا گوکا گھنچو ضائع نہیں کراں گے سگوں روشنی واسطے لائین بنا لواں گے۔ ساڈے ناچ زندہ نیں تے گویا ساڈیاں لتاں باہواں زندہ نیں صرف اوہ فالج دا شکار نیں جیہناں تے تیل دی مالش کریے تے اوہناں وچ جان پے جاوے گی۔

کتنے کتنے کافی دے واحد غائب دی تھان رفعت عباس خود واحد غائب تھارے کھلوتا نظریں آوند اے ایس طرح کافی دا انگ رنگ بالکل ای نواں نظر آون لگ پیندا اے۔ استھے ساڈی سستی ہوئی ترمیت دے ہنگھلا دے سُنے اوہناں اپنا اصلی روپ وی دکھاوندے نظر آوندے نیں۔ شاعر آپ اپنی ہوند دی قبر تے اپنے توں پہلے مجاوراں وانگوں بیٹھا اے۔ پر حیران وی اے ایہدی حیرانی اوہدی جاگرتی دی ضمانت اے۔

اوہدے شہر وچ شمس تبریز دا آونا وی اک نویں علامت بن کے اُبھر دا اے تے ہُن سارے شمس تبریز اپنیاں شہادت دیاں انگلاں تے سورج دی دُھپ وچ بوٹیاں بھن رہے نیں۔ لوک اوہناں توں گریزاں نیں پر اوہ اپنے ضمیر دا سائن بورڈ لوکاں دا قُرب لوڑ رہے نیں۔ ایہہ اک سین اے، اک ڈراما اے، اک تاریخ اے، اک حقیقت اے تے اک جاگرتی اے۔ جاگرتی وچ شاعری تے شاعری وچ جاگرتی اے۔ ہڑپا چون نکلن والیاں مورتیاں ہُن نکلیاں نکلیاں نیں۔ وسیب دے بونے ہوون نال ایہہ وی بونیاں تھی گئیاں نیں، پر ایہہ کہہ رہیاں نیں کہ جے کوئی آہر کرے تے ساڈا قند کاٹھ ودھ سکدا اے۔

مذہب تے اخلاق زیادہ تر چالو و چاروان بنتر دے نگہبان ہوندے ہین جو چالو
ریتاں تے قدراں راہوں لوک ریتل دا اندر ونا بندے ہین تے لوک سُر ت وچ
رچ کے لوکاں توں سماجی اُتھل پتھل توں ڈراندے رہندے ہین جیویں ایہہ
اُتھل پتھل اوہناں دی دشمن ہووے۔ اِنج لوک اپنے دشمن رہن سہن دے آپ
راکھے بن کھلوندے ہین۔

(مشتاق صوفی)

نظمیں

مشتاق صوفی

زویا ساجد

فارسی: مہدی اخوان ثالث/معین نظامی

فارسی: احمد شاملو/معین نظامی

موہن سنگھ

نسرین انجم بھٹی

ڈاکٹر گربخش سنگھ بھنڈال/آصف رضا

خاقان حیدر غازی

افضل ساحر

روسی: آنا آخمتووا/عظمیٰ عزیز

گجھ مارکسی پر چولی ایس بے بنیادی و قیاسی پرکھ دے سٹے ٹوں قبولدے ہین۔ اوہناں
 واسے مرزا صاحبان راٹھ سیاست دے اندر لے پاڑاں دے موہرے ہین کیوں کہ
 ایہہ نہ راٹھ دیہارتوں نکھر دے تے نہ ای ایہناں اوس دی دتی ہستی توں الگ اپنی
 آپ مختار ہستی بنائی۔ سو رواجی تے انقلابی پرچول مرزے صاحبان دے عشق دی
 اصلیت بارے رلدی ہے۔ پر وچار دے آپو اپنے چوکھے وچ اخلاقی قدراں دی دکھو
 وکھ انسانی کسوٹی رکھن دے سبب دوویں دھڑے نتیجے دکھو وکھ کڈھ دے ہین۔ مارکسی
 مندے ہین کہ مرزے دی ہستی اوہو ہے جیہڑی رواجی وچار واناں سمجھی ہے: زمر داگی
 تے غیرت پال راٹھی۔ جس سببوں رواجی اوس ٹوں مثالی مرد مندے ہین اوسے
 سببوں انقلابی اوس ٹوں دھٹکار دے ہین کہ مرزا عاشق نہیں، لڑاکا راٹھ ہے جس دی
 ڈور اوس دی گھمنڈی میں دے ہتھ ہے۔

(مشتاق صوفی)

راتِ نوں

تانبے رنگِ ہنیرے نوں کھڑکاندی، سڑکوں پار،
اچانک ٹھڈا کھا کے ڈول گئی اے اوس دی ٹوہنی
چُپ دی ڈھاب تے، آتر دی اے لنگی بڑ براہٹ،
پل دا پل ای، آپ گھرن دے ڈرتوں کنبدی
اک برفیلا چھٹاؤ ہ جانداے، میری ادھ سستی کھلوی نوں،
میرے سنبھل سکھن توں پہلوں

اُنچ میں رکتا دورساں،
ایس وچھاو نے دی بے داگ پناہ وِچ بگھا،
ہمت نال ذرا کجی ہوئی،
اُس دے پہرے دی ڈھلکی مردانگی اوہلے

اپنی تلکن جیہی چننا وِچ،
اک بے شکل ہنگارے دے امدادی ہتھ لئی،
اوس دی سیٹی تھتھلا وندی اے

پرسارے ای، بند دروازے ورگے اپنے سکھ تے،

اوس دی اکھ دا چندرالا کے،
اپنے گماناں دا اک رنگلا جالاتاں پئے نیں،
کئی کئی منز لے پتھر یلے تابوتاں اندر
پر پتھراں دے اکڑویں تے رات کسے کھڑ دی نہیں تکی!

سرگھی دا تارا اُ بھرن تے،
اک دعا اوہ گنگنا وندا اے مویاں دی بخشش لئی

لو لگدی اے
میں سندا ہاں
اندروں اُٹھ کے پریت گلی وچ آ نکلے نیں،
میری شکل جیہاں شکلاں دا رُپ وٹا کے
بارھ نہیں پر جاسکدا میں دیکھن نوں،
اس دھتکاری رات دے مگروں، چڑھدے دن توں ڈردا

رُما ہُن دُھونی
کیوں دتا ای چھیڑ
پھڑ پھوکنی، پھوک ساہ، ترونک مکھ دا تیل
دُھکھا مچ، پاہلیکھا نندا
کیوں دینا ایں وسار جاں پھولاں تاں لال
پھٹ چیکے، سیک لوگر، پیڑ گھٹا وے جھٹ دی جھٹ
من بھٹھے اندر، دُھوں کیوں، لہو بن بن لہر دا
نیونہ دی عینہہ وچ بھر بھر لہلاں
گکھ سواہ دی لالی لپے امبر متھا
پینگھ ہلارے، موہ دروازے یار نشنگی
ایویں تے نہیں بوہڑ دا
کر بھر واسا، نگل کروتن، جم فیر ہستی
جند نمائی ہائیں مائیں، شوہ سیانا جا پے سائیں
کچے پیا پورا

آ سَکھن بجیے
لگ اندر
درشنی دولا لیتھے جیکر
درشن ہوون فیر
سُنم سان اندر کر کے
آ کاش ویا پیے
سمندریں پائیے پیر
وچالے ہستی پیلاں پاوے
ہیا غوطے کھاوے
جرن چوں جیکر رشاں پنگرن
چان سیک ودھاوے
گنھن رات پیڑ دی کھڑ جن ٹری پر بھات
دلڑی گنھی جاوے آ تاوچ پرات

ودعیا

چُپ میرے پیراں دا کھسکاٹ پرتیندی ہے
میں رات دے ہِکل نال گھر ویندا ہاں
کُتیاں دی پک نِکی جیہی ٹولی
سڑک دی کالی لاش تے بھجی ہے
تے چُپ اوہناں دے پیراں دی گھسر پھسرنوں
چاں دھوندی ہے
میں ساریاں لوکاں دے مقابلے وچ
اوہنوں چُن لینا ہاں
اوہ جاندی ہے جے میں سچ پیا اکھینداں
تے میں جاندا ہاں جے سارے پے گُوڑ مریندن
اوہ سچ تے چاہے جاون توں ڈردی ہے
گُوڑنوں چُن آلی!
پتھردی بنی ہوئی!
میں چُپ دے پیراں دی اواز سندا ہاں
ہِکل، گُوڑ تے حیاتی اُتے کُتیاں دے ہکٹھ توں چنگا ہے
کل راتیں چُپ روپئی

چُپ میرے گھر آئی
چُپ مینوں کا ڈریندی رہی
تے اخیر چُپ، چُپ ہو گئی
میرے اتر و تر آئے

پنجابی: معین نظامی

بگھیاں

جگ دے اوس پاروں بگھیاں آئیاں ہن
لوہے دے چیک چکاڑے توں بغیر جیہڑا ساڈے ویلے دے کٹاں وچ بھریا ہویا ہے
جگ دے اوس پاروں بگھیاں آئیاں ہن

بھکھے اپنی جاگھوں نہ ہلے
کیوں جے بگھیاں اُتے لدے سمان وچوں
تتے ٹکڑی خشبوناہی پئی آوندی
نگلے اپنی جاگھوں نہ ہلے
کیوں جے بگھیاں اُتے لدے سمان وچوں
لیڑے ہلن دی اواز ناہی پئی آوندی
قیدی اپنی جاگھوں نہ ہلے
کیوں جے بگھیاں اُتے لدے یا سمان نہ سولی ہا، نہ ازادی
مردے اپنی جاگھوں نہ ہلے
کیوں جے کوئی آس ناہی جے فرشتے بگھیاں دے کوچوان ہوسن

جگ دے اوس پاروں بگھیاں آئیاں ہن
لوہے دے چیک چکاڑے توں بغیر

جیہڑا ساڈے ویلے دے کٹاں وچ بھریا ہو یائے
جگ دے اوس پاروں بگھیاں آئیاں ہن
اپنے نال آساں لیا نیو بغیر!

پنجابی: معین نظامی

کڑی پوٹھو ہار دی

سرتے چکی پنڈ گھاہ دی
پیلاں پاندی
جھولے کھاندی آئی کڑی پوٹھو ہار دی

ساوے ساوے گھاہ دے تھے
وچ وچ جھاکن نیلے پیلے
پھل پٹا کی تے سرہوں دے
ہریاں ہریاں، لمیاں لمیاں گھاہ دیاں تنیاں
ملک ملک کے مونہہ تے پیاں
گھنگرواں وانگوں
ایسا جال اوہناں نے بنیا
جھلک نہ پئی مہار دی

تھکڑیاں والی ستھن گنج کے
پھڑ کے میری بانہہ،
ٹھل پئی وچ سہاں، کڑی پوٹھو ہار دی
گٹیاں تانی، گوڈیاں تانی

لک لک تانی، چڑھ گیا پانی
لک لک تانی، گوڈیاں تانی
گٹیاں تانی، لہہ گیا پانی
امیں لگی کونل وانگوں
’ویرا جینا رہیں، آکھ کے
چھڈ گئی میری بانہہ، کڑی پوٹھو ہار دی

ریتے اُتے پنچھیاں وانگر
پیراں دی زنجیر نکدی
ڈھکی تے چڑھ گئی، کڑی پوٹھو ہار دی
لما پتلا بُت اوس دا
پر چھاں دے وچ پر چھ ہو گیا
نہ میں تکیا مونہہ اوس دے نوں
نہ اوس تکیا مونہہ میرے نوں
پر حالے نہ بھلے مینوں
اوس دی اک چھوہ پیار دی

ہُن وی جد فکراں دا پانی
غماں دُکھاں ہنجھواں دا پانی
چڑھدا آوے، لک لک تانی
گل گل تانی، سر سر تانی
جھگ وگاندا، پیرا کھڑا ندا
سرتے چکی پنڈ گھاہ دی
پیلاں پاندی،

جھولے کھاندى،
’ویرا جینار ہیں‘ بکھاندى
آکے پھڑلے میری بانہہ
غم لہراں وچ گھیری بانہہ
تے دھوہندی دھوہندی لا جائے مینوں پار
کڑی پٹھوہار دی

گاؤن

ساڈا قیدی ڈھولا موڑ دیو، ساڈے نال سہاواں ٹور دیو
اساں ہائیں بھرے تئیاں، اساں ہو کے لمبو مارے
اساں شہر بلائیں جھجے اساں ستے درچاء ساڈے
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو اداو

ایہہ چارے کندھاں ڈھٹھیاں اتے چادران سر تھیں لتھیاں
اساں تئیاں اوئے، اساں تئیاں، اساں تئیاں، اساں تئیاں
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو اداو

اساں چونکا شہر دیاں ملیاں، سانوں کائی نہ آکھے کلیاں
سانوں ٹھاکے کائی نہ سنتری اساں دید پیاں نوں چلیاں
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو او او او

اساں رتے دیوے بالیاں اساں ساوے ساہیں بھالساں
اساں اگ مہاندرے بھکھ پیاں اساں سبھے سنگل گالساں
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو او او او

اساں کالے کاگ اڈاؤندیاں اساں موت دی عرضی پاؤندیاں
اساں جندرے بھنے قید دے اساں جیون چھاؤئی چھاؤندیاں
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو او او او

ٹساں کال بولیندے جھوٹھیاں ٹساں آپ بلائیں گھوٹھیاں
ٹساں کاہدے راکھے کٹیو ٹساں گھر دیاں پٹیاں بوٹیاں
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو او او او

رنگ رتا رنگا نیوای یار اوئے تیرا گوہڑا رتڑا پیا راوئے
سب پتن بیڑیاں کر دینے اتے لکھ جائے اساں پار اوئے
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو او او

رت رنگیا ویس وٹاؤندیاں اساں سسیاں جھمپاؤندیاں
گن شاہ لطیف دے گاؤندیاں اساں شاہ حسین مناؤندیاں
ساڈا قیدی ڈھولا موڑ دیو
ساڈے نال سہاواں ٹور دیو
ویریو، ویریو، ویریو او او

اساں سونہہ بچناں دی چاؤنی اساں اک دی لکھ بناؤنی
اساں رہن ناں دینا کلیاں اساں قیدیاں جج چٹھاؤنی
اساں سوہے ساو رنکے جگر رتے

میرا باپ

میرا باپ بہت گھٹ
مینوں ملن شہر آؤندا ہے۔

کدے کدے آؤن والا میرا باپ
بوہا کھولھن توں ڈردا
بیل مار کے اڈیک کردا ہے
ہاؤس نمبر بنے گھر دا گیٹ کدوں کھلے گا
تے گیٹ کھلن تے وی
اندر لنگھن توں جھجکدا ہے
گھر چ رکھے جرمن شیفرڈ توں

اندر لنگھ کے
منجے تے پھیلرن والا میرا باپ
سوئے وچ سگڑ جاندا ہے۔
گڑوی چاہ دی پین والے باپ توں
چاہ دا کپ تے دوکو بسکٹ زراحتول چا پدے نیں۔

میرے بچیاں نوں اکھڑ دا ہے
باپ دا کھڑ درے ہتھاں نال پلو سنا
اوہ دادے دیاں گلاں داہنگارا بھرن دی بجائے
ٹی.وی. تے کمپیوٹر وچ کھنڈھ جاندے نیں
تے باپ دیاں باتاں مسوس کے رہ جاندیاں ہن

میرے رُجھو یاں نے کھالیا ہے
باپ دیاں نصیحتاں داہنگارا

مکی دی روٹی تے ساگ کھان والے باپ نوں
جد کھان لئی پیو ادینے
تاں اوس دی بھکھ مر جاندی ہے

سارے پروار دے اک سیدھ وچ منجے ڈاہ کے
سون والے باپ نوں
بیڈ روم وچ نیند نہیں آؤندی
سورج ڈن سار سون والے باپ دی
کچی نیند اکھڑ جاندی ہے
جداسیں اڈھی رات نوں
پارٹی توں بعد گھر پر تے ہاں
اوہ سُت اُنیندرا
اُمرت ویلے اُٹھ
نوکر ہتھوں چاہ دا کپ پی
ساڈے جاگن توں پہلاں پہلاں

پنڈنوں واپس پرت جاندا ہے

اکثر ہی
میرا باپ بہت گھٹ
مینوں ملن شہر آؤندا ہے۔

اُلْتھا: آصف رضا

چیتراج شرمائے

ساہ دی کئی جشہ گنڈیا
کئی حصیاں وچ چیتروںڈیا
لک دے وچ وسا کھنوں بنھ کے
جیٹھنوں ہتھ پیا لائے
چیتراج شرمائے

چیت وسا کھ دی گل نہ منے
جیٹھ نے چیت دے سفے بھٹے
جیتے دے وچ بھانڈ بال کے
ساہواں نال بھجائے
چیتراج شرمائے

چیتروں دی اکھیاں وچ تڑپے
گزری رات داساڑ
اُسل وٹے چیت نے بھنے
پیٹھ وچھا کے ہاڑ
لونه پنڈے دے وچ نویاں

آساں بھر دا جائے

چیترا ج شرمائے

ساہواں دی ساوی وچ گھلایا
بلیاں تے جا گھلایا
کئی ورہیاں دی چپ داساوان
آپے دس دا جائے
چیترا ج شرمائے

صندل دے دو پنچھی اڈے
جیوں مشکاں دے گڈے
ایس سے دا جادو مٹھا
چیترا بدلاں دے وچ ڈٹھا
بھادوں وی سمجھائے
چیترا ج شرمائے

چیترا دے وچ ول چھل کاہدا
چیترا دا چیترا نال وعدہ
انہروں آئے سے دا متھا
اسوچم دا جائے
چیترا ج شرمائے

چیت دے لہو وچ چیترا جا گیا
کتنے چنگاں پاندا آ گیا
مگھر سان چڑھا کے چیترا
جگ توں کج لکائے
چیترا ج شرمائے

ساہواں دے وچ ساہ پئے وسدے
رگ رگ دے وچ چیترا ہسدے
پوہ دی بکے چیت لکایا
دھپ نوں سیک دا جائے
چیترا ج شرمائے

چیت نے کئی چاڑھ کے کیرے
رنگ برنگے راگ
ست رنگاں دی پنکھ ج توله
اک رنگ منگے ماگھ
رنگ برنگے چاہ سنبھال کے
اگے ٹردا جائے
چیترا ج شرمائے

پھلکن چیت دالوں لوں تکے
نالے منگے خیر

گیاراں تھائیں چیت پروہنا
بارویں دے وچ پیر
آپے چیت دا کنڈ پیا چا کے
آپے لُک دا جائے
چیتراج شرمائے

چیت توں چیت کا ہدا اوہلا
چیتراج شرمائی ڈھولا
ہجر دے اک اک ساہنوں چم کے
وصل دے گیت سنائے
چیتراج شرمائے

کل تے چیتڑ چیت ای بھل گیا

انہروں تہہ سنبھالا دیتا
تاویں اپنے آپ تے ڈلھ گیا
کل تے چیتڑ چیت ای بھل گیا

کس لئی ساہ پچائے ایہنے
کس دے ساہواں دے وچ گھل گیا

ساوی وچ لکایا جیہڑا
اوہ سدھراں دا بوہا گھل گیا

پٹھ وچھا کے کورا چانن
چیتڑ چن دا پاسا تھل گیا

نظم

انگ داسیک سیاپا ناہیں
انگ نال انگ ملاؤ
اکھ وچ رڑک پئے تاں
نثرے یاردی جھ چھہاؤ
گھور سمندری راتاں دے بر
چن کھڑاون جاؤ
جیون رکھ مراداں والی
ہتھیں آپ بناؤ

کافی

عشقا! تیرے پندھ عجائب
عقلوں فکروں باہر
”میں“ ناہیں سمجھتوں“ تُوں پہلاں
مکدی نہیں تکرار
دھڑکن دے وچ دھڑکو بولے
”لنگھنا کت گن پار“
تیرے کارن میں سر چایا
اپنی سک دا بھار
چار دناں دی کھچو تانی
نہ جتن نہ ہار
(امرتا پریتم دی ویل)

پنچ ٹپے

بن جاگ نہ دیں ہوندے
جیہو جیہے دے آں
اسیں اوہ جیہے نہیں ہوندے

گل مکدی مُکا چھوڑی
زندگی دے رولیاں وچ
اساں موت گوا چھوڑی

ونجھلی دے سُر چھڑ دے
اک تیرے ہسیاں چنن
بے موسے پھل کھڑ دے

اُنج رت دیاں رت جانے
چند اوہدے ناں لاواں
جیہڑا رت داسبب جانے

گل گلاں وچوں چُنیا کر
ودھ وودھ بولنا ایں
کدی چپ نوں وی سُنیا کر

اوہنوں تن چیزاں چنگیاں لگدیاں سن

اوہنوں ایس سنسار وچ تن چیزاں چنگیاں لگدیاں سن
نمھاشاں دی دعا، چٹامور
تے اڈے ہوئے رنگاں والا امریکہ دا نقشہ
اوہنوں تن چیزاں چنگیاں نہیں سن لگدیاں
جائکاں دارونا
چاء دے نال رس بری دا مرہا
تے زنانیاں دے جھگڑے جھڑے
..... تے میں اوس دی گھر آلی ساں (1911ء)

پنجابی: عظمیٰ عزیز

ایس توں پچھے اسیں ہک گلاس وچ نہیں پیواں گے

ایس توں پچھے اسیں ہک گلاس وچ نہیں پیواں گے،
نہ پانی، نہ شراب
ایس توں پچھے سرگی دیاں چمیاں نہیں ہون گیاں
نہ باری وچوں دیہوں لہندے داویکھنا
توں دیہوں نال حیاتی گزاردا ہیں
میں چن نال
پرساڈے وچ کھو عشق ای جیوندا ہے
میرے لئی وفادار تے چنگی سکھی
تیرے لئی ہک ہسدی کھیڈ دی دھی
پر مینوں تیریاں اکٹھاں وچ وحشت دسدی ہے
میں تیرے پاروں پیار ہوئی آں
تھوڑیاں تھوڑیاں ملاقاتاں تے دیر دیر نال
میری شاعری وچ صرف تیری آواز گاوندی ہے
تیری شاعری میری روح وچ مچدی ہے
ہک اجیہی اگ پئی بھڑکدی ہے
جیس تے نہ وِسن چڑھ سکدا ہے، نہ وحشت

ہائے جے تینوں پتہ ہوندا
میں تیرے سَکے ہوئے گلابی
بُھٹاں نوں کتنا چاہندی آں!

پنجابی : عظمیٰ عزیز

کہانیاں

غلام حسین ساجد

عائشہ اسلم

زیر احمد

ہندی: منوجنڈاری / خالد فرہاد دھاریوال

مرزے صاحبان دے مالے وچ مارکی سوجھواناں دی پرکھ مارکس واد دا وگاڑ لگدی
ہے۔ مارکس اپنی سوچ بابت آکھیا ہے: کوئی وی انسانی شے میرے لئی اوپری نہیں۔ پر
مارکی سوجھواناں توں راٹھ طے دے جے جائے مرزے صاحبان دا عشق کرنا ات اوپرا
لگدا ہے کیوں جو اوہناں دے عشق دا اوہ روپ نہیں اگھڑیا جیہڑا ایہناں بھانے عشق دا
لازمی نتیجہ ہے۔ سو مرزے صاحبان دا عشق ایہناں لئی اوویں اوپرا ہے جیویں راوی
چنانہ دے راٹھاں لئی۔ ایہہ وی راٹھاں وانگ اپنی وچا دھارا دے قیدی بن۔
(مشتاق صوفی)

ہک ہا بادشاہ

میں، اوہ تے اساڈے درگے ہور ویہلے یا نویں نوکر ہوئے بندے، جیہڑے
 چھڑے ہن تے دُوئے شہراں توں ایس شہر وچ عمراں گالن پاروں آئے ہن چار منزلہ عوامی
 فلیٹاں دے ایس بلاک وچ ہک دُوئے نوں اوہراں پراں امدے جاندے تاں اکثر ویہندے
 ہاسے۔ کدی باری وچوں، کدی پوڑیاں توں تے جدوں جان سیان ودھ جاندی تاں کدی
 کدی سلام دُعا وی ہو جاندی۔ کدی کدی اک دُوئے ول پھیرا دی پالیہدے پر عام طور تے
 ایہہ سیان یا آون جاون نرا اپنی منزل دے فلیٹاں دے وسنیکاں وچکار ای ہوندا۔ مڑ وی
 قریشی نال میری سلام دعا اللہ جانے کوں تے کیوں ہوون لگ پئی۔ بھانویں اوہ گراؤنڈ فلور
 تے رہندا ہاتے میں پہلی منزل تے۔ پوڑیاں وچ اسیں کدی ناہسے ملے۔ پارکنگ وچ ساڈا
 دونہاں دا آون جاون ناہ کیوں جے اوہدے کول کوئی سواری ہائی نہ میرے کول۔ پلیج تے لان
 وچ ملنا وی جے سال پسالی نہیں تاں مہینے وچ ہک دوواری ای ہوسکدا ہا۔ مڑ وی میری اوہدی
 سلام دعا ہوا ی گئی۔ شاید ایس پاروں بھئی اوہ اپنی بھانوں دکھ تے وضع قطع توں دُوروں
 چھیندا ہا۔ جدوں ویکھو ہک ڈھلا جیہا کوٹ پتلون چڑھایا ہو یا، وال کھلے، قمیض دا کالر
 گندا تے اوہدا گھیرا پتلون وچوں باہر نکلیا ہو یا۔ کوٹ دیاں جیہاں پھلیاں ہونیاں، جوس
 کسے اوہناں نوں پھو کنا سمجھ کے پھو کیا ہووے۔ پیراں وچ قینچی چپلاں۔ گرمی سردی کھو بانا۔
 بھانویں پگھر نال سارا جگ کجلی جاوے۔ اوہدا کوٹ نہیں لہنا۔ لوکی تاں اوہنوں ہلایا ہو یا سمجھ
 کے اوہدے کولوں بچدے ہن پر میں تے اوہ رب سببی نیڑے ہوندے گئے تے سلام دعا وی
 کرن لگ پئے تے گل بات دی۔ کدی باہر لے گیٹ کول، کدی لان وچ تے کدی کدی فلیٹ

نوں وڑ دیاں نکلدیاں کوریڈور وچ کدی گل بات دی ہو جاندی۔ بھانویں اوہ دیکھن وچ تھلا
 ای لگدا ہا پر گلاں بڑیاں سوہنیاں تے تھہا کے کردا ہا۔ ایس پاروں میں وچوں وچ اوہدا آدر
 کرن لگ پیا۔ بندہ تاں پڑھیا لکھیا تے سیانا ہا مڑ اوہدی کئی پھری تا کوں پھری؟ میں نہیں
 جانیانہ جان دی کھچل کیتی۔ جو ہا میں اوہدے تے راضی ہاموں۔ اُنج دی میں گھنی پڑتال کر
 کے کرنا وی کیہ ہا! میں ایس علاقے وچ ڈھیر چر راہنا ہا نہ اوس۔ ایہہ تاں کوں ٹرانزٹ سٹے ہا
 آساں دونہاں دا تے امدے جاندے اسیں گھنیاں گلاں ایہو ای کردے ہاسے۔ اوہ وی بے
 کدی رب سبئی مل پئے تاں! اک دُوئے نوں ڈھونڈ کے کدی اوہ مینوں ملیا نہ میں اوہنوں۔
 ٹسی جاندے او، ایہہ جیہیاں آبادیاں وچ اصلوں ایہو ویہارای پگدا اے۔

مینوں پک اے بھئی اُتلیاں منزلاں وچ میرے سوا اوہدا کوئی جانو ناہ۔ نہ میں
 اوہنوں کدی پوڑیاں چڑھدا ڈٹھا۔ اودوں وی جدوں اُنہالے وچ ساری خلقت راتیں سانجھی
 چھت تے پرہیں لگاندی، گپاں کھدی، کھاندی پیندی تے سوندی۔ میں آپ وی گرمیاں نوں
 راتیں چھت تے ای سدا ہاموں پر دُونیاں لوکاں نال ایویں ماڑی جیہی سلام دعا پاروں
 اوہناندی پرہیں وچ کدی ناہوں رل بہندا۔ مینوں رل بہوں دی لوڑ ای کیہ ہائی۔ اک تاں
 میں اپنے کم توں چرکا وِلدا ہاموں، دُوا میں امدیاں نال مونہہ ہتھ دھو، کپڑے بدل کے ٹی ہاؤس
 نکل جاند ہاموں۔ اپنے ورگے چھڑے لکھاریاں یا گھروں کڈھے ادیباں نال گپاں کٹن۔
 گپاں مگروں اتھائیں روٹی کھا کے مڑ کسے تھیڑ یا سینما ہال نوں۔ راتیں اک دووے سڑکاں
 کچھدا گھر، نہیں نہیں گھر نہیں، اپنے آہلے پرتیا تاں رات دے کپڑے پا، سدھا چھت تے
 اپنی سوت تے۔ مڑ میں اُنج گچھا چھتا ہو کے سمدھم بھئی مینوں چو فیرو دے نیون سائناں دیاں
 چلکاں تنگ کردیاں نہ نال ستیاں پیاں لوکاں دے اُگھراڑے۔ پتا نہیں میں آپ خراٹے
 لیبد ہاموں کہ نہیں؟ پر مینوں کسے ہو ردے اُگھراڑیاں نے کدے بے چین نہیں کیتا۔ اُنج وی
 میری منجی دُونیاں منجیاں توں واہو دوریڈی ای ہوندی ہائی۔

پر اوس دیہاڑے میری نیندر جو یں آپے اُگھڑ گئی۔ سبھ سٹے پئے ہن پر شہر حالی
 جاگدا ہا، نہیں وی جاگدا تاں دولت منداں دی بھکھ دے نشان اے ضرور جاگدے ہن۔
 نیون سائناں دیاں رنگ برنگیاں ٹیوباں بھانویں ہک دُوئی دے مگر پیاں بھجیاں ہن پر

اساڈے بلاک دی چھت تے واہوا چاٹنا ہا۔ ایس شب دیاں ونگاں ورگے ست رنگے چاننے
 وچ میں قریشی نوں منجیاں وچکار پھر دا ڈٹھا جویں کسے گواچی و ست نوں بھالدا ہووے۔ کدی
 اوہ منجیاں دے چو فیروں پھر دا، کدی وچوں لنگھ کے، مُردُور کھلو کے جویں کوئی گویڑ لاندہ۔ کدی
 اوہ ناندے پٹھوں کسے شے نوں بھالدا۔ کدی چھت دی کناری توں پٹھاں ویکھ کے جویں
 کسے شک دا پک کردا۔ مُردُور کسے نہ کسے منجی دا پھیرا، جویں کوئی سون پیا کردا ہووے۔ مُردُور
 اوہ مینوں سیان کے میری منجی نوں پریتا تاں میں وی اپنے سدا مارا اٹھ کھلو تم!
 مینوں جاگدیاں تے کھلونیاں ویکھ کے جویں اوہ پھل وانگ کھڑ جیہا گیا۔
 اوہ دے دند لٹکن تے اکٹھاں چمکن لگ پیاں، جیویں اوہنوں سکھ مل گیا ہووے تے اوہدی
 مشکل دُور ہوئی ہووے۔

”میاں توں دس سکنا ایں میرے فلیٹ دی چھت کتھے بن دی اے؟“ اوس میرے
 نال سلام دعا دی کھچل کرن دی لوڑ ای نہیں سمجھی۔

”چھت؟“ اوہ فلیٹ تے گراؤنڈ فلور تے اے مُردُور اوہدی چھت کہی؟“ میں
 سوچیا مُردُور ایویں اٹکل نال جیویں اوہنوں وؤنڈرے توں کدھن پاروں آکھیا ”اتھائیں جتھے
 میری منجی پئی اے، ایہدے سچے کھتے!“

میری گل سُن دیاں ای اوس کوٹ دی اک ڈھیر پھوکی ہوئی جیب وچوں اک انچی
 ٹیپ کدھی تے مُردُور مینوں پچھن لگا ”بھلا کتھوں لے کے کتھوں تائیں؟“

میں اوہدا ارادہ جان کے آکھیا ”ٹیپ پھدھاؤ، بنے من لینے آں“
 اسیں دونہاں رَل کے بڑے دھیان نال میری منجی دے چو فیروں اوہدے فلیٹ
 دے سانویں چھت نوں منیا، چاک نال اوہدی نشانیاں لائیاں۔ مُردُور انچی ٹیپ ولئیدا، سکھ
 نال کھڑیا متھالے کے پوڑیاں لہہ گیا۔ میں تے وچوں وچ ہسد، اک واری فیر لٹا پئے گیا۔
 ایس واری میری اکھ پانی ورگی کسے شے دے وڑیون نال گھلی۔ ویکھیا تاں قریشی
 بالٹی کول رکھی کھلوتا، ڈونگے نال میری منجی دے پٹھاں تے ”اپنی چھت“ دے کھلار دے
 اندر اندر پانی پیا وٹھیدا ہا۔

”ایہہ کیہ کر رہے او قریشی صاحب؟“ میں رہ نہیں سکیا۔

”اوہ جی! گرمی بڑی اے جناب۔ میں آکھیا میں اپنے فلیٹ نوں ماڑا جیہا ٹھار

لواں!“

چونہ منزل لاں دیاں بانوے پوڑیاں، پانی دی بھری بالٹی لے کے چڑھنا، میرے
وس دی گل ناہی پر قریشی ایہہ کم کوئی داہ واری کیتا۔ جد اوہدی جاچے چھت ٹھہر گئی تاں اوہ
مینوں جاگدیاں چھڈ کے آپ اپنے فلیٹ اندر جاؤتا۔

مڑ ایہہ کم سارے اُنہالے ہوندا رہیا۔ اوس کپڑے بدلے نہ کمرے اندر سون دی
عادت نوں چھڈیا۔ پر چھت ٹھارنا جویں اوہدی ہوندا اک اُلیل ای بن گیا۔ بھانویں میں تے
دوے لوکی وچوں وچ ہسدے رہے۔ کجھ اختہ وی ہوئے، خاص کر اوہ جیہنا ندے گھر تیسری
منزل تے ہن تے اوہ ایس چھت نوں اپنی وست من دے ہن پر قریشی پک نال اپنی چھت
نوں ٹھاردا رہیا تے کدی کدی تے میں آپ وی سوچدا بھیجے بندے دے سرتے کھلی
چھت، اوہدی اپنی چھت نہ ہووے تے اوہنوں چھت ٹھارن دی سک ہووے تاں اوہ اپنے
اندروں چڑھے اُلیل داکیہ کرے؟

اُتو چڑھیاں قریشی نوں چھت ٹھارن دی لوڑ نہیں رہی۔ رت بدل دیاں ای اوس
چھت تے آونا وی پھڈ دتا۔ اوہدا آل دوالے دِسا وی واہوا گھٹ گیا۔ بس کدی کدائیں وِندو
وچوں، کدے کسے سڑک تے، کدی کسے دکان تے کھلوتا دسدا تاں اوہنوں سیہاننا کوئی اوکھا
کم نہ ہوندا۔ پھلتیاں جیہاں والی میل خوری سگوں میل وُتھی کوٹ پتلون اوہدے سوا ہور کون پا
سکدا ہا! ہر واری اوہ کسے اُڈدے پنچھی وانگ دسدا تے اپنی بھانور دیندیاں ای کھڑی جاندا۔
اوہنوں ویکھ کے ای پک ہو جاندا، جویں اوہ کسے پھسوڑی وچ ہووے یا اوہنوں کسے نہ کسے کم
نوں توڑ چاڑھن دی کاہلھ ہووے پر میں کدی جان نہیں سکیا بھیجے اوہنوں کیہو جیہے کم دی چھتا
اے یا اوہدی کاہلھی دا کارن کیہ اے؟ اوس کدی دسیا ای نہیں۔ اوّل تاں امدیاں جانندیاں
کدی ٹاکرا ای نہیں ہويا، جے ہويا وی تاں اوہ کدی مُسکا کے، کدی اکھ دی چک نال سیہانن
دی سوجھ دے کے تے کدی ہتھ دے اشارے نال سلام پھیر کے، دونہ پلاں وچ ای چالی
قدم دُور جا کھلوندا، مڑ مینوں اوہدی کاہلھ دا کارن پچھن دی ہمت کویں ہوندی؟ انج وی میں
اوہدے کولوں کجھ پچھ دس کے کرنا ای کیہ ہا؟

پراک دیہاڑے اوہ مینوں میرے فلیٹ دے بُہے تے کھلا دِسیا، خبرے اوس بُہا
 کھڑکایا وی ہووے پر میں تاں رب سبّی اندروں کسے دی ہوند دی دلیل پھرن پاروں باہر آیا
 ہاموں۔ میں بُہا کھولیاں تاں اوہ سامنے کھلا ہاتے کوں طور بطوراجیہا ہو یا پیا لگدا ہا۔
 ”سرسبّیں کدائیں میری چڑی تاں نہیں ویکھی؟“ اوس میرے آکھے بغیر اندر
 وڑ دیاں آکھیا تاں میں ڈٹھاپئی اوہدی پیالا بنی ہتھ دی تلی تے دو ترن نیلے رنگ دے چھوٹے
 چھوٹے آندے نیں۔ جیہڑے پہلی نظر وچ مینوں چڑی دے آندے لگے ای نہیں۔
 ”کیوں! تسی کوئی چڑی پالی ہوئی اے؟“ میں آکھیا پر مینوں اوہ دے سوال دی اُگا
 سمجھ نہیں آئی۔

”نہیں! میرے بیڈ روم دے روشن دان وچوں اک چڑی روز آمدی جاندی اے۔
 اوہ کل دی ایہہ انڈے چھڈ گئی اے پر مُڑ پرت کے نہیں آئی۔ میں جانیہ شاید تسیں اوہنوں
 کدائیں ویکھیا ہووے!“
 ”ہوسکدا اے، ایہہ انڈے اوہ تہاڈے کھاؤں پاروں چھڈ گئی ہووے“ میں ہسیا۔
 ”ایہہ وی کوئی محول کرن والی گل اے“ اوہ جویں رسیسے نال بولیا ”میں جانتا تسیں
 میری چڑی نوں جانندے ہو سو“

”پر قریشی صاحب! میں تاں تہاڈی چڑی نوں کدی ویکھیا ای نہیں۔ مُڑ میں
 تہانوں تہاڈی چڑی دی دس پاواں تاں کتھوں پاواں“ میں ایویں اڑ گیا۔
 ”تسیں کدی میرے گھر دی چھت ویکھی اے؟“
 ”نہیں! میں آکھیا پر مینوں ایس ویلے اوہنا ندے ایس سوال دی سمجھ نہیں آئی۔
 ”مُڑ تسیں مینوں چھت تھارن دی تھاہر کیوں من دتی ہائی؟“
 میں کچھ نہیں آکھیا کیوں جے اوہنا ندی منطق نے مینوں کوں لا جواب جیہا کر
 چھڈیا ہا۔ ابگت میں ہک چڑی نوں اپنے کمرے دی کھڑکی توں باہر نوں اُڈ دیاں ویکھیا تاں
 میں چند چھڑاؤں دا ہک طریقہ لہھایا لیا۔
 ”قریشی صاحب! تہاڈی چڑی اوہ پئی اُڈ دی جے“ میں انگلی دے اشارے نال
 جاندی پئی چڑی ول اوہنا ندا دھیان موڑیا ”گھر اپڑو نہیں تے چڑی کدائیں ہو ر مونہہ کر

جسنيہہ!“

میری گل سُن دیاں ای اوہناں میری اُنکلی دی سیدھ وچ دیکھیا، مُڑ ”تھینک یو،
تھینک یو“ آکھدے کسے بھوت وانگ اڈدے، پوڑیاں نوں سر دے گئے تے میں چرتا نیں
سوچدا رہیا بھئی اوہناں میری نال چاگھتاں ناہ کیتی؟

اگلے دیہاڑے اوہناں مینوں چڑی دے پرتن دی خوشخبری دتی پر اوہ آپ مُڑ وی
خوش ناہن۔ اکھے ”چڑی تاں پرت آئی اے پر اوس انڈے بھن دتے نیں، مینوں تاں لگدا
اے، ایہہ چڑی و ہار دی چنگی نہیں“
میں ”جیا“ آکھیا تے گل آئی گئی ہوگئی۔

اگلی وار میں اوہناں نوں مال روڈ تے دمدمے کول ہک چھوہر دے بکھئی پیاں
دیکھیا۔ آل دوالے کافی لوک گھیرا پائی کھلوتے ہن تے اوہ چھوہر نوں پھدھی کھلوتے مُڑ بکھو
گل کیتی جاندا ہن ”ہن چھیڑ ماں نوں!“

ماں تاں مینوں کدائیں دسی ناہی، ہاں! اک بھاری جیہی ویہہ باوی ورہیاں دی
چھوہر سارے مجمعے توں نکلتی، وردی نوں پئی دیکھدی ہائی۔ پتا چلیا قریشی صاحب نے اوس
چھوہر نوں ایس چھوہر نال بدتمیزی کردیاں پھڑیا اے تے ہن اوس نوں سزا دے کے ایس
چھوہر دے اپمان دا بدلہ پئے لیندے نیں پر خرابی اے پئی اوہ چھوہر من دا ای نہیں پیا، پئی
اوس ایس چھوہر نال کوئی بدتمیزی کیتی اے یا اوہنوں چھیڑن بارے سوچیا وی ہووے!

اڈے قریشی دی تاں ہوش ای مٹھی ناہی پئی ہوندی پر مینوں چھوہر دے بے گناہ
ہوون دا پک ہا کیوں بے کئی واری میں ایس چھوہر نوں ایسے چھوہر نال اکھیاں اندے
جاندا ہوں ڈٹھا ہا پر میں ایہہ گل قریشی نوں دسن دی ہمت کویں کردا؟

قریشی چھوہر دا گلوین دھروئی جاندا ہا۔ مُڑ میں دیکھیا بھئی چھوہر وی تھوڑا تھوڑا
پیون لگ پیا اے تاں میں ودھ کے قریشی دی بانہہ نپ لئی ”چھڈو“ میں زور دے کے آکھیا
”میرے نال آؤ“

مینوں امید ناہی پر قریشی میرے نال ٹر پیا۔ اسیں دونوں دو چار قدم چپ چاپ
ٹردے رہے۔ مُڑ اوس بڑے ٹھہرا نال مینوں پچھیا ”کدائیں چا پیوے؟“

”ضرور! پرکتھے؟“ میں آکھیا۔

”پچو تے“ اوس صلاح دتی۔

”پچو!“ میں دنگ رہ گیا۔ ایہہ فرانسیسی طرز دا اک بڑا ای صاف ستھرا تے مہنگا ریسٹوران ہاتے میں اپنے آپ تے قریشی وچوں، دونہاں نوں اوتھے چا پیندیاں ویکھن بارے کدی سوچیا وی ناہ۔

”کیوں پچو نوں کیہ اے؟“ قریشی حیرانیا ہو یا ہا ”چنگی چاء تاں پچو تے ای ملدی اے۔ ہور کسے تھاں تے ایہہ جیہا فلیور ملدا اے نہ سکھ۔ آؤ! میرے نال! بل دی فکر نہ کرو، چاء میرے دلوں ہوسی!“

پھلیاں جیہاں والا میلا ان دھوتا سوٹ پائی، گھنجرے والاں والے بھوت بنے قریشی نے پچو جیا کے فرنگیاں توں ودھ سانجھ سمھال نال چاء دے دو کپ پیتے، سٹیکس کھا دے تے ہتھ نہی کھلوتے بیرے نوں بھاری ٹپ دتی تاں میں وچو وچ گھر دار ہیہا پر کردا تاں کیہ کردا؟

جد میں اوہدے کولوں اجازت لے کے پرتیم تاں اوہ اچے پچو ای بیٹھا ہا۔ پرتدیاں میں اوہناں وچوں کئی بندیاں نوں مُسکاؤندے ڈٹھا، جیہناں مینوں اوہدے نال سڑک تے ٹر داتے مُڑ پچو وڑ دیاں ڈٹھا ہا۔ پر اُنہاندے نالوں زیادہ کھل تاں مینوں آپ پئی امدی ہائی۔ کیوں؟ میں دس نہیں سکدا۔

مُڑ دُوئے چوتھے دیہاڑے پچو جا کے چاء بیونا اک سبھا جیہا بن گیا پر ہرواری بل قریشی ای تاردا۔ اوس کدی مینوں میری جیب وچ ہتھ پاؤن دی مہلت ای نہیں دتی۔ جویں اوہ صاحب میں اوہدا بردا ہوواں۔ پر نہیں ایہہ تاں ایویں اوہدی کرنی نوں بھنڈن والی گل اے۔ اوہ تاں مینوں بڑے آدر نال، بڑے پیار نال، نال لے جاندا تے وداع کردا ہا، جویں بچن دی آدر کردا اے، جویں پیار پیار دی سیوا کردا اے تے ہرواری میں ہور وی سکھی، ساواتے رنگی کے گھرنوں پرتدا پر میرے اندر دی اُچوں مُڑ وی نہیں مری۔

اوہدے نال پھر دیاں کدی کدی ہور بندے وی ملدے۔ جیہڑے کدی زری سلام دعا کر کے لنگھ جاندا، کدی اوہنوں وکھرے کر کے دو چار منٹ گل بات کردے۔ کدی اوہ

مینوں رب راکھا آکھ کے کسے ہور بندے نال تُروی جاندا۔ اوہناں وچوں کئی بندیاں تھانیں
میں جانی پئی قریشی کسے وڈے کالج وچ فلسفے دا اُستاد اے تے اپنے مضمون دا گنی۔ اوہدا علم،
اوہدا دھیان، اوہدا چیتا تے اوہدے پڑھاون دا ڈھنگ بے مثال اے۔ بس اوہدیاں دو
خرابیاں اوہنوں بے نہیں کدھن دیندیاں۔ اک تاں اوہ لباس دے معاملے وچ بڑا بے پرواہ
اے تے دوا اوہ کالج کدی کدائیں اُدا اے، بس جدوں دلیل پھر گئی۔ ہفتے وچ دو ترن تے حد
چار وار۔ ایس پاروں ایڈمنسٹریشن اوہدے کولوں دکھی ای رہندی اے۔ مُروی کم چلدا ای پیا
اے کیوں جے اک تاں اوہدے سانویں دا کوئی ہور استاد لہھنا سوکھا کم نہیں تے دوا اوہ جدوں
اُدا اے۔ تن ترن گھنٹے شاگرداں دا کھیڑا نہیں چھڈ داتے کم نوں توڑ چاڑھ کے ای مُردا اے۔
مُروی کدی قریشی دیاں ایہہ دو خرابیاں دور ہو جان دیاں تاں اوہدے نال دا بندے سارے شہر
وچ لہھیاں نہ لہھدا۔

میں سوچیا اوہدیاں ایہناں خرابیاں نوں دور کرن دی اک کوشش میں ای کیوں نہ کر
ویکھاں۔ سومن وچ ایہہ گل متھ کے میں ہک دیہاڑے اوہنوں گھیر کھلو تا۔
”قریشی صاحب!“ میں آکھیا ”میں کجھ ریڈی میڈ کپڑے خریدنے نیں، ہووے
تاں صلاح دیوں پاروں میرے نال چلو“ اوہ اوس ایلے راضی ہو گیا، اسیں دونوں گلاں باتاں
کردے مزے مزے نال تُردے انا رکلی آئے تے اک دکان نوں جا وڑے۔ میں تے روز
وانگ واہوا سنو ریا ہو یا ہاموں پر قریشی دا رُوپ کون بدلد، مُروی میرے نال ہوون پاروں
کوئی اوہنوں کوں ٹوک سکدا ہا۔

اسیں ریڈی میڈ سوٹ کڈھے۔ میں اک سوٹ تے دو قمیضاں خریدیاں تے مینوں
ایہہ ویکھ کے بڑی خوشی ہوئی بھئی میرے آکھن تے قریشی نے وی ضد کیتے پناں نہ صرف ایہہ
کہ ریڈی میڈ کپڑے ٹرائی کر کے ویکھے سگوں اک ٹوپیس سوٹ خریدیا وی۔
اگلے دیہاڑے اوہ مینوں نویں سوٹ وچ دسیا پر جیباں اونویں پھلیاں ہونیاں
سن۔

میں آکھیا ”قریشی صاحب: کپڑے نویں تے شینیاں پرانیاں۔ اج تاں جیباں
خالی رکھو ہا!“

”نہیں: ایہناں شنیاں دا نال رکھنا ضروری اے“ اوس دسیا ”جے ایہناں دچوں مینوں کدی کسے شے دی اچانک لوڑ پئے جاوے تاں اوس ویلے میں اوہنوں چاون کیہ گھر نوں بھجساں؟“

”پراہو جیہی لوڑ بندی شے ہے کیہ، جیہدی انج ابا گت لوڑ پے سکدی ہووے؟“
 ”بڑا کجھ اے، جیہدی لوڑ کسے وی ویلے پئے سکدی اے“ اوس مینوں سمجھیا
 ”جیویں ایہہ جتنی دی رسید ویکھو۔ جے میرے بوٹ دا تالا کھڑ جاوے تاں میں ایہہ رسید وکھا کے ایہنوں اوس ایلے مرمت پاروں اوسے دکان تے دے سکساں۔ ایویں ایہہ عینک دی ایہہ گھڑی دی، ایہہ بیلٹ دی، ایہہ کوٹ پتلون دی رسید اے۔ گھر دا کرایہ نامہ، بجلی دے بل تارن دی رسید، پانی دی رسید، ہوٹلوں کھاہدے کھانے دی رسید تے ایویں دیاں ہور رسیداں جے تہاڑے نال نہ ہوون تے گھنے کتاں پاروں باہر پھر دیاں پھر دیاں ایویں گھرنوں بھجنا پمدا اے، سو میں نال ای رکھی پھرناں!

”پراہناں نال ساریاں جیہاں تے نہیں بھر سکدیاں، ہور کیہ کجھ نال لئی پھر دے او تئیں؟“ میں پچھیا۔

”اک جیب وچ اوہ لیکچر نیں جو میں دتے نیں، دوئی وچ اوہ جیہڑے حالی دیونے نیں۔ اک وچ اوہناں کتاباں دیاں رسیداں نیں جیہڑیاں میں خریدیاں، دوئی وچ اوہناں دیاں لشناں جیہڑیاں میں اے خریدیاں نیں۔ کجھ خط نیں، جیہناں دے جواب گھلنے نیں، کجھ خط پوسٹ کرن والے نیں۔ کجھ پرچیاں چھوہراں دی حاضری دیاں نیں تے ہور تک سک، آپے دسو، ایہہ سبھ کجھ گھر چھڈ یا جاسکدا اے؟“

”پر جیہڑیاں کتاباں لے لئیاں، اُنہاں دیاں رسیداں نال چائی وِدن دا فائدہ“ میں ضد کیتی۔

”مُر ایہہ پتا کوں لکسی بھئی ایہہ کتاباں میں پہلاں خرید لئیاں سن کہ نہیں۔ تئیں کتاب خریدن ویلے، اپنیاں خریدیاں کتاباں دی لشناں دا مقابلہ نہیں کردے؟“
 ”نہیں!“ میں آکھیا۔

”مُر تاں تئیں ہکو کتاب کئی کئی واری خریدی ہوئی۔ انج نہ کریا کرو، روپے پیسے

نوں انج اُجاڑن دا فائدہ؟“

”میں آئندہ خیال رکھساں“ میں آکھیا تے سوچیں پئے گیا، بھئی میں ایہہ گل ہاسے
وجھوں کیتی اے یا میرا وی انج دیاں رسیداں والد و بنن دا واقعی کوئی ارادہ اے؟

مُڑ میں قریشی نوں کدی ناہ ٹوکیا، جویں اوہدی منطق میری دلیل توں سر ہی ہوگئی
ہووے۔ سال چھ مہینے اندر اوس اپنے نوں سوٹ نوں وی گڈڑی بنا چھڈیا ہا پر بچو تے چاء
تے کدی کدائیں چنگیاں تھانواں تے آکس کریم کھاون دا کھلما وی اونویں دا اونویں چلدا پیا
ہاتے چلدا رہندا جے ہک دینہہ میں اوس گڈڑی نوں قریشی نال کھلیاں نہ ویکھیا ہوندا جیہدے
پاروں قریشی نے اک چھوہر نوں کٹیا ہاتے آپ وی کٹیندا کٹیندا اچیا ہا۔

مُڑ کدی کدی ایہہ گڈڑی مینوں اوہدے نال خُردی پھر دی دِن لگ پئی۔ ہور تے ہور
اک دیہاڑے میں اوہنوں قریشی دے فلیٹ دے کوریڈور وچ پھر دیاں ڈٹھا۔ پر مینوں کیہ؟
میرا کوئی تعلق ہو وی کوں سکدا ہا۔ قریشی نے کدی اوس گڈڑی بارے میرے نال کوئی گل ناہ
کیتی۔ نالے جدوں دا اوس اوہدے نال پھرنا شروع کیتا ہا اوہ مینوں ملنا گھٹ ودھ چھڈ ای گیا
ہاتے جے اوس اوہدے بارے مینوں کجھ دسنا ضروری نہیں جانیا تاں مینوں ایڈے اختہ ہووون
دی کیہ لوڑ؟

پر قریشی دا حلیہ مُڑ وی ناہ بدلیا۔ اونویں میلی کوٹ پیٹ، پھلیاں جیہاں تے
گگھنجرے وال۔

چرتائیں میں قریشی نوں ایس حلیے وچ ویکھدا رہیا، مُڑ مینوں رات دی ڈیوٹی کرنی
پئے گئی تے چونہ مہینیاں تائیں میں قریشی دا دیدار نہیں کر سکیا، مُڑ وی مینوں آسیوں پاسیوں
تے فلیٹاں دے دُوئے جانو آں توں اوس گڈڑی دے قریشی دے فلیٹ وچ آون جاوون دی
سُونہہ ملدی رہی۔

اک اتوار نوں میں جان بچھ کے کیڑ لون پاروں اوہدے فلیٹ دا بوہا گھلیا ویکھ کے
اوہدے اندر جاوڑیا تاں اندر داسارا سبھا مینوں بدلایا بدلایا جیہا لگا، جویں میں قریشی دے فلیٹ
وچ نہیں اوہدے گھر جاوڑیا ہوواں۔

میں گھبرا کے پرتیا تاں دوئے کمرے اندروں کسے بندے نے مینوں سَد مار کے

روکیا۔

مڑ کے دیکھیا تاں پچھلے بُو ہے وچ جویں میں آپ گھلا ہاموں۔
نویں کپڑے پائی، لشکدے بوٹ، سنورے تے ترشے ہوئے چلکنے وال،
تر چھوایاں چھٹاں۔ اوہ قریشی لگدا تاں ناہ پر پک نال اوہ قریشی ای ہا۔ بھانویں اوہدی بھانور
قریشی ورگی ناہی پراوہدی آواز سگوس قریشی جیہی ہائی!

مینوں حیرانیا ویکھ کے اوہ ہمتا جیہا مسکایا، مڑ مینوں پھد کے سینے نال لالئیوس تے
مڑ مچو اپڑ دیاں تائیں میرا دماغ اوہدے وجودوں اُمھکدی خوشبو دے خمار نال پھر دار ہیا۔
مہینہ گوانج ای چلدار ہیا، مڑ گرمیاں آئیاں تے میں اپنا فلیٹ چھڈ کے چھت تے
سوونا شروع کردتا۔ اک دینہہ میں اے اُگھلاندایا ہاموں جد میں قریشی نوں اک واری فیر
پھلایاں ہوئیاں جیہاں تے لکیاں ورگے خلیے نال پانی دی بالٹی چائی، پوڑی دی بھمبٹی توں
”اوہدی چھت“ دل امڈیاں ڈٹھا تاں مینوں جویں وچوں گھر دک گئی بھئی قریشی تے اوس دی
پریت کہانی دا انت ہو گیا اے پر میں اکھاں نوں ماڑا جیہا ٹوٹ کے اوہنوں اپنے دل امڈے
ویکھ کے وی ستا بنیاد ہیا۔ کیوں جے میں قریشی نال رل کے چھت مچن دے وختے پمناں ناہسو
چا و ہندا۔

قریشی کچھ چر میرے کول گھلا رہیا۔ مڑ اوس اپنے کوٹ دی جیب وچوں انجی ٹیپ
کڈھ کے اپنے ہتھیاں دی لٹائی سانویں چھت نوں دو چار وار کچھیا۔ مڑ پانی دی ساری بالٹی
نوں اگو ساہے روڑھ کے اوہ کچھ چر گھوک سٹے پئے بندیاں نوں ویکھدار ہیا، جویں پک کر
رہیا ہووے بھی کوئی جاگدا تاں نہیں پیا۔ جاگنا وی کینہ ہا؟ ایہو جیہیاں چھٹاں تے سوون
والے بندے تاں فلش لایاں تے ڈھولاں دے گھمکار وچ سوون کچھے ہوندے نیں۔
اوہناں نوں قریشی دی پانی دی بالٹی دی چھل نے کیہ اُگھاڑنا ہا۔

قریشی چر تائیں سانوں ساریاں نوں ویکھدار ہیا۔ میں تاں جاگدا پیا ہاموں پر
چھہہ وئی پئے ہوون پاروں قریشی نوں میرے جاگدے ہوون دا پتا ای نہیں لکیا۔
چر مگروں قریشی مڑیا، میں جانیا، ہن اوہ خالی بالٹی چاکے پوڑیاں لہہ جاسی پر جدوں
میں کانیاں اکھاں نال دیکھیا تاں اوہ مینوں چھت دی چارٹی وگن ول جاندا دسیا۔

مُرا وہ وِگن توں اُلڑ کے جو یں پٹھاں کھلے ہنیرے وچ کچھ لہدا دسیاتے میں
جان نہیں سکلیا بھئی ہن اوہ کرواے تاں کیہ کروائے؟
مینوں تاں اودوں گھڑکی جدوں میں اوہنوں اوس وِگن تے چڑھدا تے تُردا
دیکھیا۔

میں ترف کے چھال مار کے بھجیا پر اوس ایلے تائیں اوہدا وجود پٹھوں اُلردے
ہنیرے نال رل گیا تے میں چھت دی وِگن توں ڈھیر چچھاں کھلوتا جو یں ٹاہلی دی کانب بن
کے بس کنبد اای رہ گیا۔

ست بھرائی

مینڈاناو ست بھرائی کیں رکھیا ہی تاں میں جانی ناں مینڈے تن بھرا ایون۔ لوکی
میکوں ستاں بی آکھنے ایون بھلا ہس ستاں کوں دنیں راتیں مرنا پونا ایوے۔ میں جیونی لگنی
ایواں بھلا میں موئی وئی ایواں۔ جو کجھ پیکے گھار دتا اوہ بی کوڑا ایہا تے جو کجھ ساوریاں دتا ای
بی زہرا ایوے۔ مینڈیاں دو دھیاں تے چار پُتر ایون۔ دھیاں اپنے گھراں چ سسکھی و سنی پیاں
تے پُتر اوہناں نی گل کیہ آکھاں؟ ہک جیہڑا جے ویاہیا نہیں اوہ تاں کج خیال کرینا ایوے
بھلا دو جے اپنیاں تربیتاں کن جیونے ایون۔ میکوں ٹگر پانی ڈھی وینا تے بس۔ جیویں ایہا
مینڈی لوڑا ایوے۔

میکوں ہور بی تاں کج چاہینا ہیلا ہی نڈھے کیہ جانن جے کج لیکھا دیون تاں حساب
منگینے پھر نے ایون۔ کتھے کیتا تے کیوں؟ ہن ہر گل تاں دن والی نہیں ہونی نہ، سوں تھائیں
ملن ورتن کرنا پونا۔ بھاجی دیونی پونی۔ ہی آکھنے ایون کہ ٹکے ٹکے ناں جباب دیواں۔ میں
تاں پڑھی لکھی وی نہ وت کیہ لکھاں؟ جو کجھ چیتے آونا دسینی چاواں جو بھل ونجے ہس ناں کیہ
کراں؟ ہک واری تاں میں ہی بی سوچیا کہ خود خشی کر گھناں وت رب میکوں ہوڑ دتا۔

مینڈے ویڑھے نی ہک کوٹھڑی تاں دانیاں نال بھری رتنی ایوے۔ چلے نو نہاں
سنجھال گھدے۔ تے میں ہک منجی تے پئی رتنی ایواں۔ جو دیون کھا گھینی ایواں تے نہ چکھن
تاں صبر کرینی آں۔ مینڈی ہک نو نہہ تاں بھین نی دھی ایوے جیساں وسان کن میں کیہ نہ کیتا
بھلا ہن اوہا مینڈی ویری ایوے۔ میکوں نہ تے ماں بننا سکھایا تے نہ ای سس بنیاں مینڈی
سُنی گئی۔ میں تاں اوہ زنانی ایواں جیس نال سارا گراں مشورے گھنیا ایوے، بھلا گھار والیاں

کن میں کوئی بی نہ۔ ایہہ آکھنے ایون جے میں جھلی ایواں۔ جہدوں تائیں سائیں جیونا رہیا
ہُس شوہدے مینڈے نال بہوں چھا سلوک کیتا بھلا ہُس نیں بعد میں وت یتیم تھی گیوں۔
مینڈا کوئی وارث ناہی۔

میں بھوچھن تے پھل کڈھینی ائی بہوں سوہنے، بھلا ہن تاں نظرای نہیں رئی۔ نہ
رنگاں کوں پچھان لگھنی تے نہ ای چیتا رہنا کہ کیہڑا پھل کڈھنا ایوے تے کنج۔ سوئی چ
دھاگہ وی پانہ لگھنی میکوں تاں سارے ٹانگے بھل گئے ایون۔ اپنے تروپے ہی ٹٹے ایون وت
کسے ناں تروپا کیس بھر ساں۔

کدے تاں میں بی جوان ائی۔ سارے شاہرے چ نسنی بھجی ائی۔ ہن ہک ہتھ
سوئی ایوے تے اپنے ہی ویڑھے ناں حساب نہیں رہنا۔ کئی واری ڈکھٹی ایواں وت اٹھنا پونا۔
کوئی پوتر پوتری ہتھ پھڑ کے چک گھنے ایون۔ جتنے ساہ ہس سوہنے رب دتے اوہ تاں
لنگھاوے ہی پونے ایون۔

میں کئی واری اپنی کنیں سُنیا کہ نونہاں میکوں مندا اکھینی ایون تے مینڈے مرن فی
دعائیں کریں نیں۔ میں تاں ہی جاتا کہ کسے بی زنانی ناں کوئی روپ سوہنا نہیں نہ ہس فی لوڑ
کے آں۔ ہڈ پیر سلامت تھیون تاں گھار نیں کماں کاریں کن ہس فی لوڑ ہوینی جے اوہ نہ رہن
تاں نہ کوئی ہُساں بلینا ایوے تے نہ ای ہوون تے راضی ہونا ایوے۔

پُڑھی دے شالا ہی آدعائیں منگنی اسیں جھلی تھی وینیاں بھلا پُڑاں نیں سلوک آں
بھل وینی ایواں۔ کور ہے اپنا۔ کوئی بی نہ۔ جتنی ہک منجی فی جاء ہووے تینی ہی قبر ہونی ایوے۔
میں تاں جیوندیاں جی مڑھی بن بیٹھی ایواں جیس تے کوئی دیوا بلنا نہیں۔ کوئی ہتھ
فاتحہ نہیں پڑھسن۔ تے کوئی بی سلام کرن نہیں ٹکنا۔ ہے کیہ حیاتی ایوے؟ میں تاں کدے
بی کسے کن بھیڑا نہ کیتا، نہ مندا بولیا نہ سوچیا، وت مینڈے نال ہی کیہ تھیونا پیا؟

وت میکوں ایہہ بی سوچ آئی کہ مینڈی نونہاں تاں ہڈھڑی تھیں اُناں نال
میتھوں بی مندا ہوسی۔ اسیں جیہڑی اولاد تے مان کرینے ایواں اوہ بی تاں اپنی نہیں ہونی۔
جیس کن جوانی گاہلے آں اوہ بی تاں اپنا نہیں ہونا۔

میں ستاں ایواں جیس ناں جیون بی کسے کم نہ آیا وت موت کس کم آونا۔ جیس

کوٹھڑی چ مینڈی منجی ایوے ایہہ خالی تھی ویسی تاں نویں نوں نہہ نہیں کم آوے گی۔ مینڈا تے ہر
 ساہ ایہناں کن دُعا کرینا ایوے۔ سبھ کن جیہڑے مینڈے ہن کہ نہیں۔ میں تاں اوپر یاں بی
 معاف کر چھڈا۔ اخیر لے ساہ توں پہلاں پہلاں۔ میکوں تاں بد دُعا دیوئی آوندی نہیں۔
 جیہڑی جیہڑی رب رسول ناں ناں گھنے اوہ بد دُعا کیوں کر لگھنی جیہڑی پلٹ تھیسے۔ بھلا ہی
 شوہدیاں کیہ جانن؟ ہر ویلے جیہڑے پا کے ہک دوجے نیں وال پُئیاں ایون جھلیاں۔
 وت میں گھابر کے سرے تے کھیس چا دھر کوئی ایواں تے گھابری ایواں کہ ایناں نیاں
 نوںہاں ایناں ناں کیہ حال کرین۔ میں تاں جھل گھینی ایواں ایہہ تاں ایس جوگیاں بی نہ۔
 میں وت آیتاں پڑھنی ایواں کہ شالا دُور بلائیں بھلا ہی مینڈے دے لے ناں بھیت کیہ جانن؟
 جے جان سگلیاں تے ہنچ کدے نہ کرنیاں۔ کملیاں نہ ہوون تے۔
 مینڈا پوتر پانی گھن کے بادیے چ آیا ایوے کہ دادی آں ترہہ نہ لگی ہووے۔
 کسے آں مینڈی ترہہ دابی خیال ایوے؟
 مینڈی اکھیاں چ نور نہیں بھلا ہنجوواں نیں کھوہ جے وگنے ایون۔ ہس نیں نکے
 ہتھاں تے ہنجو ڈگنے ایون تے اوہ نگا جاتک مینڈے ہنجو پونجھ کے آکھنا ایوے۔ وڈ کے بی
 کدے روینے ایون۔ ہاپڑ میں وڈ کری تھی گئی آں۔ بہوں وڈی!

کبوتر، بنیرے تے گلایاں

ایہہ کہانی خورے گامے دی اے، کبوتر اں دی کہ کوٹھے دے بنیریاں دی یاں پھیر
میری نہیں، ایہہ تاں ماسی عیشاں دی کہانی اے۔ پچھے میں وٹالے (گرداسپور) اپنے
پُرکھیاں دا جدی گھر ویکھن گیا تے اپنا گھر لیمدا لیمدا ماسی عیشاں دا گھر لہجھا بیٹھا۔ پرمتے نہ اپنا
گھر لیمھیا تے ماسی دا۔ ماں وٹالے آ لے گھر دی گل کرنی تے وچ ایویں ای ماسی دے گھر دی
گل وی آجانی۔ ساڈا گھر اُچے بے بھائی دے ویڑھے بزاروں کھبے تھہ سی تے سچے ماسی دا۔
وٹالے دے ڈاکٹر شاعر نے جیہڑے دو بندے گھر لیمھن لئی میرے نال تورے، اوہ
کھجھ پئے سن:

”سرجی، کدے تئیں کہندے اوہ سچے کدی کھبے۔“

”لہجھ پوے گا۔ ڈھیر ویلا اے ساڈے کول۔ کابل کاہدی اے تہانوں۔“

اوہ مینوں بھجائی پھر دے سن تے اک تھاں کھلون نہ دیندے۔ پر میں اوہناں

گلیاں، محلایاں وچ ای پھرنا چاہندا ساں۔ گھر لیمھے نہ لیمھے تاں کیہ اے۔ تھاں تاں ایہو اے۔

”سچے سی تہاڈا گھر کہ کھبے!“

”اتھہ ای سی، ایہناں گلیاں وچ ای کتھے۔“

”ماسی عیشاں دا گھر ساڈے گھر دی ساہمنی گلی سی۔“ ورھیاں توں پارتردی ماں دی

واج اچیتیں وگدی رہندی۔

کرشن نگر ساڈے گھر توں کجھ گلیاں ٹپ آخری سٹاپ لاگے سی ماسی عیشاں دا گھر۔

سدھ بزاروں کچھ لماں پر گلیو گلی جاؤ تاں چوکھا نیڑھے۔ ونڈ پچھوں لٹ پٹ کے آئیاں توں
جیہڑی تھاں ملی اوہنے اوہو سانجھ لئی۔ پر ماسی توں اک بھل ہو گئی۔ اوس جیہڑا گھر ملیا اوہ سی
دوجی منزلے۔ اک پرانا جیہا گھر جیہڑا ساڈے ویہندے ڈھیہند اڈھیہند اڈھیہہ پیا۔ پر ماسی
لئی تاں اوہو گھر سی اوس چھڈیا نہ۔ کچھ ویلا تاں سانجھ دے سیک وچ گیا پر اخیر پٹھلیاں
مقدمہ تور دتا۔ ماسی تاں جھلی ہو گئی۔

’میں ای ایہناں توں واڑیا۔ چلو بھئی تساں پٹھاں آسرا کر لئو اسماں اُتے رہ پینے
آں۔ اوس ویلے کیہنوں سی ہوش! کوئی وی گھر مل لیندے۔ سوچ تاں ایہہ سی ساریاں مڑ جانا
ایں، کیہڑا اتھے بہہ رہنا ایں۔ چوکھے گھر خالی سن۔ اللہ بخشے تیرے تائے لاٹ صاحب دفتر
سن کم کردے کنے ای گھر دکھائے۔ پوپے دے پیو آکھیا ہُن اتھے آ بیٹھے آں ایہو ٹھیک
اے۔ کدے سوچیا سی انج واپر پی اے ساڈے نال۔‘

ماسر تاں ساڈی ہوش توں اگدوں ای جگ توں مونہہ کر گیا ہو یا سی۔ ماں تے ماسی
دے سانجھ دے بھیت دی خورے ایہو پیڑ سی نئی دوواں دے سردے سائیں اوہناں دی بھر
جوانی وچ تر گئے۔ ماسی دے تن پُترن۔ دووگ گئے پردیس، اک رہ گیا ماسی کول۔ وڈے دی
تاں کوئی اگھ سکھ نہیں سی۔ بس اینی خبر سی پئی ڈھیر برقاں آ لے دیں سی نہ کدے اوس چھٹی پتر
کیتا نہ کدے اسماں اوس توں تکیا سی۔ پتہ نہیں کیہڑے ویلے اوہ کیہڑے پردیس گیا۔ پر
ولایت آلا خرچا پانی گھلدار ہندا۔ جس نال گھر چلدا۔ پہلا پُتر ماسی دا وٹالے ہو یا پر دوجے
دوویں لہور آ ہوئے۔ زکا یونیورسٹی وچ سی تے میتھوں چار پنچ ورھے وڈا ہونا اے۔ فوجی آمر دی
کُنیا کیتا ہوئی تاں اوہ یونیورسٹی سی۔ ساڈے محلے وچوں پہلا جلوس اوس ای کڈھیا پر سانوں
سکولی پڑھیاں توں لاٹ صاحب دے دفتر وں اگے جان دی منائی سی تے اوہ سانوں
ساریاں توں دابا مار کے پچھا نہ گھل دیندا۔

عوامی پارٹی دانواں راج آیا تاں اوہ نویں سیاست وچ ولیا گیا۔ راتیں اوہ چر کے
گھریں آوندا۔ اسیں تاں نکلیاں ہوندیاں توں ای ماسی دے گھر جان دے ہوندے
ساں۔ پچھوں وٹالے دی سانجھ۔ ماسر گزرن پاروں تے دوویں پُتراں دے پردیسی ہووون
نال ماسی دا گھر پُرانا جیہا تاں پہلے ای سی ہُن اُکا سکھنا ہو گیا۔ زکا پُتر سویرے یونیورسٹی تُر

جاندا تے ماسی سارا دن گھریں اکلی ہوندی۔ اسیں ای سودے لیا کے دینے تے ماسی دا خیال رکھنا۔ دو بجے تیجے دن کوئی شے پک کے اوہدے ول جاندی پئی اے یاں اوہ آپے ساڈے گھر آجاندی تے ماں نال چراں بیٹھی گپوڑیاں ماردی رہندی۔ ماسی گھر جاندا تے اوہ اڈ یکدی ہوندی۔ دُوجے منز لے دو وڈے کمرے، نکا جیہا ویڑھاتے اک پاسے کوٹھری۔ کوٹھری وچ گامے تے رکھی رہندیاں سن۔

پر نہیں میں تاں کہانی کرن لگا ساں گامے تے کبوتر اں دی۔
گامے دی کہانی ساڈے وٹالے دے جدی گھر بار ویلے دی دھوڑ وچ گواچ گئی

اے۔

نکیاں ہوندىاں لاء اساں گامے نوں تکیا۔ کرشن نگر اوہ ساڈی ٹاہری دے بھانڈے دھوندى سی۔ پر گامے دی کہانی رکھی توں بناں پوری نہیں ہوندى۔ جیویں وٹالے آپنا گھر لبھدا لبھدا میں ماسی عیساں دا گھر لبھن لگ پیا ساں ایویں گامے دی کہانی نال رکھی دی کہانی وی کرنی پینی اے۔ کرشن نگر دیاں گلیاں وچوں لنگھدیاں گامے تے رکھی کدے نہیں بھلدیاں مینوں۔ رکھی نے پچھوں گامے دا لڑ پھڑیا ہونا تے گامے سدھا مونہہ چک کے وگی جاوনা تے اوس ننگے پیریں ترکھی ترکھی آپنی پوٹلی سانجھدے گامے پچھے لگے آونا، جیویں اوہدے وجود دا کوئی انگ ہووے۔ ایہناں دواں دی کوئی اکلی صورت چیتے وچ چتر دی نہیں۔ اک کلبوت تے دو روحاں۔ نہ کوئی ساک، بُرداری۔ جیہڑا رکھ لوے اوہدے گھر رہ پینا۔ پھیر جھیرا کر کے ماسی عیساں کول ای آجانا تے اخیر اوہ ماسی دے گھر دا ای اک جی بن گئیاں تے جد تیک ماسی جیویں اوہدے گھر رہیاں۔

پچھے کئے ای ورھیاں مگروں آپا اُلفت امریکا توں آئی تے میں اوس توں گامے دا پچھیا۔ بڑی حراں ہوئی، تینوں چیتے اے، میں تاں آپے لبھدی اوہنوں کل ای مل کے آئی آں۔ دس لگی:

”میرے ساہمنے گامے پنڈوں آئی سی۔ پچھوں چنگی بھلی سی، ملک نیں، راوی لاگے ایہناں دیاں زمیناں سن۔ جد ایہدا ویہا ہو یا ایہنے رکھی توں نال ای رکھیا۔ رکھی متے بالین توں اللہ لوک سی یاں مڑ ہوگئی۔ پتہ نہیں۔ پر ایہدا علاج کسے کرایا نہ۔ ویہا ہو یا تاں ایہدے خوند

ایہہوں رکھی پاروں کڈھ دتا۔ آہند اسی 'یاں رکھی ٹوں رکھ یاں آپے رہ۔ مُڑ بھراواں نال جھیرا
کر کے اوہنوں نال لے ماسی عیشاں دے آگئی۔ سُنیا اے بھراواں نال بھونیں داوی جھیرا
سی۔ پرایس کدے دسیا نہیں۔ اسیں تاں سدا ماسی عیشاں گھرا ی تکیا اے ایہہوں۔ پچھوں ملن
نہیں آیا کدی کوئی۔

چٹی گوری گامے پُری جٹی سی۔ بھریا جٹے تے نکیں لونگ۔ مجال اے پئی کوئی بھیری
اکھیں تے۔ آپ تاں اوس شوہدی کسے ٹوں تلنا ای نہ۔ بس پُپ چپتیں کمیں رُجھی
رہندی۔ مونہہ اُتے روہ تے کھج وچکار جیہی کوئی گل، اوازاری وی نہیں آکھ سکدے۔ بس آل
دوال ٹوں کجھ نامظوری تے جگ ٹوں بے پروائی جیہی، رزق اُداس جیہا۔ شادی غمی ناہنہ دل
ٹوں ماننی۔

گامے اکو کم کردی سی۔ بھانڈے دھون دا۔ ہور کسے شے ٹوں اوس ہتھ نہ لاوانا۔
صفائی ستھرائی دا جھاڑ پونجھ یاں ہور کم اوہ کدے نہ کردی۔ کئی وار زانیاں کجھ جاونا پر اوس
اُتے جوں نہ رینگدی۔ اکھے بھانڈے دھوانے ہن تاں دھواؤ نہیں تاں مرضی تہاڈی۔ اُنج کم
اوہ نہجھیں کردی۔ بس آپنی گل نال مطلب۔

رکھی سی اللہ لوک۔ اُکاسکی سڑی تے پنڈے اُتے ماس دی رتاوٹی نہ۔ بس جھلیاں
وانگ مونہہ ہلائی جانا جیویں کسے نال گلاں کردی ہووے یاں کسے ٹوں بلاندی یاں ہوڈدی
ہووے۔ پتہ نہیں، تر بکی تر بکی۔ یاں پھیرا یویں دندیاں کڈھ کے ہسدے رہنا۔ گامے توں
اک پل اوس ٹوں دکھ نہ ہونا۔ جد گامے بھانڈے دھونے اوس نال وچھ کے بیٹھ رہنا تے آپنی
پوٹلی کھولدی نیں دندیاں کڈھدے رہنا۔ پوٹلی وچ اوس گل جہان دیاں شیواں لکویاں
ہوندیاں سن۔ والال دے کلپ، پنناں، صابن دانیاں، سگٹ دیاں خالی ڈبیاں، ٹوتھ برش،
تیکے دے غلاف، بالال دے کھڈونے، کچیاں، سنٹ دیاں نکلیاں خالی بوتلاں، خالی نوہہ
پالش دیاں شیشیاں، پوڈر دے خالی ڈبے تے پتہ نہیں، رب جانے ہور کیہہ کیہہ۔

آپنی پوٹلی ٹوں اوہ ہتھ نہ لاون دیندی۔ جیہڑی شے گواچ جانی ساریاں آکھنا رکھی
دی پوٹلی پھولو۔ پر اوہ ہتھ لاون دے تاں نا۔ اخیر اگلے پوٹلی ٹوں کھوہن دی کرنی تے رکھی
گامے دے کچھے لکھن دی کرنی۔ گامے نال ای چمڑی جادنا۔ پر گامے ذرا نہ کجھنا تے آپنے

دھیانے لگے رہنا۔ اخیر اگلے زور اوری کرن دی کرنی تے اوس بے وس ہو کے پوٹلی وگا مارنی۔ ساریاں شیواں کھیروں کھیروں ہو جانیاں تے اگلے پچی ہونا۔ کھوہن آلے آپے ساریاں شیواں سانھیاں تے پوٹلی پرتاون دی کرنی۔ پر رکھی رُس جانا تے مڑ پوٹلی نوں ہتھ نہ لاونا۔ پراگلے دن اوس مڑ پوٹلی بنگل ماری ہونی۔

ماسی گھر دھر کوٹھے اک نکا جیہا کمرہ یاں سٹوری پر اصلوں اوہ تھاں کبوتر اں مکی سی۔ پتہ نہیں کتھوں کھیڑے ویلے کبوتر اں اوٹھے ڈیرے لائے سن۔ خورے ونڈ توں پہلاں دے ای اوٹھے ہوون۔ پراسیں اوس کمرے نوں کبوتر اں دا کھڈا ای کہندے ساں۔ ساڈے لئی اصل وچ تاں کھل دی تھاں ماسی دا اوہ دھر کوٹھا ای سی۔ تھلے ماسی اگلی ہونا تے اسیں سارا دن کوٹھے چڑھے رہنا۔ گڈیاں کبوتر اڈانے، بازیاں لائیاں، کھیڈاں کرنیاں۔ ایسے کبوتر سن بئی کوئی شمار نہیں سی۔ گنگلوں گنگلوں دیاں واجاں تے وٹھاں دی نمی نمی مُٹک چوہیرے کھلری رُخی۔ سگلوں ماسی دے گھر وڑ دیاں پوڑیاں چڑھ دیاں سار وٹھاں دی ایہہ مُٹک ناساں نوں وجنی۔ ساڈی ٹابری دے کئی سوکھے جی ایس پاروں ماسی دے گھرای نہ آندے پئی کون اوٹھے جا کے وٹھاں سنگھدا پھرے۔ تے زنانیاں گل کردیاں مونہہ اُتے چُنی کر لینی۔ اصلوں ایہہ بہانا سی ماسی دے گھر نہ جانے دا۔ اوہناں دی ٹلوں جو نہیں سی ماسی۔

ورھے چھماہیں سانوں ماسی وڈھی دینی تے اسان کچھے پا کے یاں لنگوٹیاں کس کے سارے کبوتر اں نوں اڈا دھر کوٹھے گھڈا دھونا۔ تھلیوں بالٹیاں بھر بھر پانی لیانا تے ایس نال پٹھاں تیک پوڑیاں پانی لتھن پاروں وٹھاں نال بھر جانیاں۔ جیہنے آناستھن چُک کے توبہ توبہ کر کے پرت جانا، پٹھلیاں وکھ بولنا۔ کبوتر بہتے اڈنے نہ اوہ جھب کوٹھے لہہ پیندے یاں بہوں نیوں کے کوٹھے دوالے اڈدے رہندے۔ پر جد کبوتر اڈنے ہراک نوں اچنجا ہونا پئی ایہنے ڈھیر کبوتر ماسی پالے ہوئے نیں۔ اڈ دیاں محلے چھاں جیہی کر دیندے سن ماسی دے کبوتر۔ ساڈے گھر جیہڑا روٹی ٹکر بہیا پچنا، ایہہ مٹھیا ہو یا سی پچی اوہ ماسی دے کبوتر اں لئی اے۔ کئی گھراں چوں روز سکیاں روٹیاں کبوتر اں لئی آئیاں۔ ماسی دے کبوتر ساڈے چت چیتے وچ سدا وسدے رہنے، نت اڈدے رہنے، گنگلوں گنگلوں کردے رہنے۔

ایہناں کبوتر اں نال اک کہانی ہور وی جُوی ہوئی اے۔ کدی کدائیں کبوتر اں

ٹوں بلی پے جانی۔ جے کتے گھڈے دا بوہا گھلا رہ جانا یاں شامیں کسے کُندی پھسانی بھل جانی تے ادھ راتیں کبوتران نوں بلی پے جاونی۔ بلی پین دی ایہہ کہانی کئی دن تردی رُنی۔ محلے دے نکلے بالاں آ آ کوٹھے اُتے پھنڑتے موئے کبوتران ٹوں تکتا۔ ساڈا تے ماسی دارون نکل جانا۔ راتیں جد بلی پینی تے ہزاراں پراں دیاں واجاں آونیاں جیویں کوئی وڈا جیہا پھنڑ پکھیرو اُبھے ساہ لیندا ساڈے کوٹھے دوالے گھیرے کھدا ہووے تے سانوں ڈر جیہا آونا۔ پر بلی آپنا کم دکھا چھائیں مائیں ہو جانا۔ تے کچھے اوس چھڈ جانے کبوتران دے ٹٹے پر، کندھاں اُتے لہو دیاں چھٹاں تے ادھ موئے کبوتران دیاں تنکیاں لوٹھاں تڑفدے بوٹ تے ٹٹے آئدے۔ اسیں بالٹیاں بھر بھر کندھاں دھونیاں۔ گھڈے ٹوں کندی تاں نہیں لائی جا سکدی سی کیوں جو چوگا چگن اندر باہر آنا جانا وی تاں ہوندا سی کبوتران۔

اودوں میں ویلھا ساں۔ دسیویں دے امتحاناں پچھوں کدی ایدھر کدی اودھر۔ ہر شے نویں نویں بھری بھری لگنی۔ ہر کم چائیں چائیں کرن ٹوں دل لوچنا۔ چڑھدے جذبیاں پاروں اسمانیں لگے کبوتران ہارا کھیں نیلے، سیلٹی رنگ مچنے۔ آپنے ہوون دی گواہی دی جی لوڑ جی ٹوں ایس عمرے ہوندی اے کسے ہووے نہیں ہوندی۔ ایہہ اوہو عمر اے جد پیارا بے پروائی کرے تاں عاشق لگ لگ روندے نیں۔ جد مونہہ اُتے لوے وال چنگے وی لگدے ہن تے مٹن دا چاہ وی بڑا ہوندا اے۔ جی حیاتی دسیویں دا نتیجہ آون تے بدلدی اے اُنج مڑ نہیں بدلدی۔

ماسی دے پُتر پوپے دا کمرہ کتاباں نال بھریا ہو یا سی۔ گھریں تاں اوس ہونا نہ خبرے کس ویلے پڑھدا سی۔ چراغ جلتا رہا، تے گورکی دا ماں میں اوہدیاں کتاباں وچوں ای پڑھیاں۔ گل دی سانجھ تے ماڑیاں لئی پیڑ دی جاگ اوہدیاں کتاباں ای لائی۔ پوپا بہت ماڑا جیہا تے چپ چُپ پُچتا سی، بھیت بھریا۔ مینوں تاں اوس بال ای سمجھنا۔ لہو و ہونا مکھ تے دھوانکیا جیہا۔ سگٹ چاہ دا شوق سی۔ گھر دے کسے معاملے نال اوس ٹوں کوئی لا بھ غرض نہیں سی۔ بس کدی کدائیں ایتواریں اوہدے بجن آوندے تے سکھاں تے چاواں پی پی گلاں مار مار پھاوے ہو جاندے۔ سکھاں دے فلٹراں نال گند ٹوکری بھر جاندی، چاہ دے کپ سواہ نال بھر جاندے۔ پر ماسی ٹوں پُتر دے آئے یاراں بیلیاں دا چاہ چڑھیا رہندا۔ چلو ایس بہانے اج

گھریں تاں اے۔

ماسی ٹوں ایس دا بہوں چاہ سی پئی ہووے نانہہ ہووے کسے تچ ایس پُڑ دا ویاہ
ہتھیں کردیاں۔ پہلے دویں تاں اوپرے کبوتر اں ہار اڈاری مار گئے تے مُڑ پرتے نہ۔ ماسی
معلے دیاں وڈیرھیاں توں جوان ہوندیاں گڑیاں دیاں ٹوہواں لینیاں تے ماں میری نال دی
ایویں چراں تیکر ٹبر دیاں گڑیاں دا اگر کچھ پھر ولدیاں رہنا۔ گرد اسپوروں وٹالیوں آ لہوریں
وسیاں بارے چُکھاں کڈھنیاں۔ ایہنیں دینیں اچرج گل ہوئی۔ ماسی دے خورے نیڑیوں یاں
دُراڈیوں انگاں ساکاں چوں اک گڑی ماسی کول رہن آلتھی۔ ماں اوہدی ایہہ آکھ گڑی ٹوں
چھڈ گئی پئی ماسی ہُن تیتھوں ہانڈی ٹکر دا آہر نہیں ہوندا۔ خورے پہلے دی کدائیں آئی ہونی ایں
تے ماسی کول رہی ہونی اے پردھیان نہیں سی کیتا۔

پر ہُن عمر ای اجیہی سی پئی سارا دن کوٹھے اُتے چڑھ ایویں آنے بہانے لوکاں
دے گھریں جھاتیاں مارنیاں۔ اوہ گڑی بس ایویں جیہی ای سی، مدھرا قد نہ رنگ پکا چٹا، وچ ای
کتھے سلیٹی جیہا۔ جنگلی کبوتر اں ہار۔ آئی تاں اوہ ماسی دی سیوا کرن لئی ای پر وچوں گل ایہہ سی
پئی ماسی اوہنوں یکے نال پرناون لئی رتھی پئی سی۔ پر پوپے ٹوں ویلھ کتھے اوہنے تاں اوہدے
ول تکیا ای نہ۔ پوپے نال میری سانجھ ڈھیر سی۔ بھرواں ہار ساں اسپیں۔ مینوں اج لگدا اے
پئی اوہ خورے زنائی ویری کچھ دا بندہ سی۔ اکھے زنائیاں کول جاوَن نال بندے دی سرٹوٹوں
ڈھا لگ جاوندی اے۔ یاں پھیر یونیورسٹی وچ کسے نال من پرچائی بیٹھاسی۔ نیناں ساڈے
گل کردیاں کمرے وچ آنا تے اوہنے مینوں اکھ مارنی۔ پر گل ہاسے رو لے پے جانی۔ اُنچ اوہ
رج سگھر سی تے میں جدوی ماسی کول آنا اوس میرے کرن جوگ کوئی نہ کوئی کم کڈھیا ہونا۔
ایہہ کم کردے اوہ کم کردے۔ بزاروں ایہہ لے آ اوہ لے آ۔ میتھوں دو چار ورھے وڈی ای
ہونی اے، ہانی سی اوہ پوپے دی۔

اوہدے والاں چوں عجب جیہی واشنا آونی تے اکھاں وچ دیوے جگدے
لگنے۔ کدے مینوں جاپنا خورے روندی رہندی اے تاہیوں اکھاں سدا وتر جیہاں نیں۔ اُنچ
سی اوہ ماڑ کو جیہی، بھکھاں دی ماری۔ مینوں سمجھ نہ پئی اوس وچ سوہن کیہ سی۔ اُنچ چنگی چنگی
لگنی، من لوچنا کول ای رہوے۔ سدا ماسی دے گھر رہ پووے، کدھرے جاوے نہ۔ خورے

اوہدا ہوون ای اوہد سوہنپ سی۔ گلھاں اندروڑیاں ہونیاں، پنڈے اُتے ماس ہے وی سی یاں
نہ۔ پر پوپا وی تاں رنج داسی۔

اوہنیں دینیں مُرگامے دے ویاہ دی گل ہئی۔ کچھ بندے زنانیاں گامے ئوں ویکھن
آئے تے پسند کر گئے۔ مینوں بھیڑی شے ایہہ لگی پئی میں کھاؤں لئی جنیاں وی شیواں
لیایا ساں ساریاں مُکا گئے۔ مینوں تاں اُکا دل نوں نہ وجے، ہو چھہ جیہے۔ اچن چیت ویاہ دی
تریک وی متھی گئی۔ بڑی حرا نی ہوئی مینوں پئی گامے گھروں ہن سدائی تر جاسی۔ کسے رکھی دا
نہ خیال کیتا۔ اوہ ساریاں ئوں بھل گئی، سداسا ہمنے ہوندیاں وی وسر گئی، ان ڈٹھ ہو گئی۔ گامے
آکھیا: ”میرے نال ای رہیسی، نال ای رکھساں ایہنوں میں۔ دکھ کیوں کراں ایس ئوں، کسے
تے رتا وی وساہ نہیں مینوں۔“

گامے خورے کتھوں اک پرانا ٹرنک کڈھیا تے وچوں گہنے تے دو بے لیڑے
لتھے وی کڈھے۔ ساڈی ٹاہری وی ہتھ پوایا تے ٹرنک ئوں پالش کر کے ساریاں شیواں سوار
کے سانجھ کے ٹرنک وچ جوڑ دتیاں گیاں۔ کچھ سوٹاں ئوں ٹانگے لا کے وری دا شگن وی پورا ہو
گیا۔ گامے دا ہوون آلا رنڈ داسی تے پچھلی زنانی چوں جے دو تن بالاں ئوں پالن سانجھن دا
رولا وی سی متے۔ اوہ ٹانگے بہہ کے آئے، مولی صاحب دو کلے پڑھائے تے ساریاں رل
کے گامے ئوں ودعیا کردتا۔ نہ واجے، شہنائیاں، چُپ چُپتے ای سبھے کچھ ہو یا۔ ماسی دا گھر مُد سُنجا
جیہا ہو گیا، ماسی چُپ جیہی ہو گئی، نیناں گھر سانجھ لیا۔

اک دن میں ماسی ول آیا تے اُچی اُچی گلاں کرن دیاں واجاں آون پیاں۔ جا پدا
اے پروہنے ڈھکے پئے نیں۔ اگانہہ کمرے وچ اک سوہنا گھر و بند گلے دا سوئیڑ پا کے گیاں
ماردا ہووے تے نیناں، ماسی تے پوپا اُچی اُچی ہسدے پئے ہوون۔ سُوہ لگی کراچیوں آیا اے
لہور سیلاں کرن۔ نیناں ہار ایہہ وی ماسی دے ساکاں چوں سی۔ ہوائی فوج وچ سکھلائی
لیندا پیا سی۔ بہتا اچنجا مینوں نیناں اُتے ہو یا جیہڑی اوہدے اُتے ڈھکی جاندی
سی۔ حذمتاں کری جاندی سی۔ میرا تاں اوس نال سا نگا نہیں سی پر چنگا نہ لگا مینوں۔ کئی دن
ماسی ال گیا ای نہ۔ ایویں دُکھی جیہا ہو یا پھراں۔ کبوتر اں دے چنگ وی نہ آیا۔ بھوویں ماسی
دے سدے ماں ہتھ آوندے رہے۔

اگلے دیہاڑے ساجھرے ماسی داسنیا اپڑیا پئی راتیں کبوتر اں ئوں بلی پے گئی
اے۔ میں آوندے آوندے کنا ای چر لا دتا۔ پر انج پہلاں کدی نہیں سی کیتا۔ پروہنا جاو ن لئی
تیار ہو یا بیٹھاسی۔ اوہو پورے گلے داسوئیٹر پائی، خوشبوواں لائی، ٹن شن بنیا اٹھی کیس سانجھی
ٹیکسی ئوں اڈ کیے پیا۔ ماسی کولوں اوس پیار لیا، میرے نال اوپر اچھا ہتھ ملایا تے پوٹیاں لبہ
کے بوہے کھلوتی ٹیکسی بہہ کے نکل گیا۔ اودوں سالم ٹیکسی خاص بندے ای منگا واندے
سن۔ بڑے ہٹکے نال گیا سی اوہ۔ خصماں ئوں کھانا، پرسناں کیہ۔

میں ہفیا بیرے کول جا کھلوتا۔ نیناں کنے ای چر مگروں میرے لاگے ای بیرے کول آ کھلوتی تے اپنے ہتھ بیرے اُتے رکھ کے اڈدے کبوتر اں نُوں دیکھن ڈیہہ پئی۔

جیہڑے ہُن اسمائیں چڑھے سن۔ اوہدا مونہہ لتھا ہو یا سی، نچڑیا ہو یا، موئے کبوتر دی لوتھ
وانگ۔ شام رکے رکے کرشن نگر دے پرانے ہسپیلے بنیریاں تُوں لہندی گلیاں دے نھے نھے
چان تُوں میان دی گواچن لگی۔ سلیٹی بنیریاں ورگی سلیٹی شام۔ اک پل لئی نیناں بنیرے تے
شام اکورنگ وچ رنگے گئے۔

تھلے گلی چوں بابا ٹیم، گلی دا جھلا آپنی اک بانہہ اکو پاسے ای اُچی جیہی چک کے
گھراں دے بوہیاں تُوں وجدا، دُوجی بانہہ زور زور دی ماردا ڈگدا ڈھبندا رڑھدا جاندا تے
اُچی اُچی آکھی جاندا سی:

”آپنی ماں کولوں جا کے چُچھ اوہدا ٹیم کیہ ہو یا اے، آپنی بھین کولوں جا کے چُچھ ٹیم
کیہ ہو یا اے۔“ بابے ٹیم دی چھیڑ سی: ”بابا ٹیم کیہ ہو یا اے،“ اگوں اوہ چُچھن آ لے دی ماں
بھین پُتن لگ پونداسی۔

خورے کیہ تھی میں ہو لی جیہی آپنا ہتھ اوہدے ہتھ اُتے رکھ دتا۔ اوہ تر بھک کے
پچھانہ ہٹی۔ گلی وچ اُتر دی رات وانگر اکھاں بھانہڑ بن گئیاں۔ تُوں۔۔۔ تُوں۔۔۔ تُوں
بس کبوتر اں دیاں وٹھاں دھویا کر۔۔۔ بے بلی پے جاوے تے لہو دیاں چھٹاں پُنجھیا
کر۔۔۔ اوہناں دیاں لوتھاں۔۔۔

اوس روہ نال کمبیدی نے ہتھ چک کے سینتاں کر کر کر لاوندے آکھیا تے دپھ دپھ
کردی ترکھ نال کوٹھے دیاں پوڑیاں لہہ گئی۔

اچن چیت گلی وچ رولا پیا: ”آگئی آگئی ساڈی گامے آگئی، آگئی، آگئی،“ ٹانگا ماسی
دے بوہے آ اچھکیا۔ کوچوان پاش ہو یا ٹرنک چک ساڈے بوہے دھریا۔ ٹانگے دے پچھلے
پاسیوں اُنچ دیاں اُنچ ای، سدا اکو جیہاں، اک دو بے نال جُویاں کندھ اُتے لگی پرانی مورت
وانگ ویلے وچ قید گامے تے رکھی ٹانگیوں لہہ کے بوہے آڈھکیاں۔ گامے رکھی لئی سدا اپنے
نویں ویہے گھروں پرت آئیاں سن۔ مُنہ جاوَن لئی۔ اوہو پرانی گل بے وسنا ای تاں رکھی
تُوں چھڈ۔ پر گامے کیوں رکھی تُوں چھڈے۔

گھر دے کم مُڑ گامے سانہہ لئے جدتیک ماسی جیوی گامے او تھے ای رہی۔

رکھی دی چھیڑویاہ سی۔ کدی کدائیں اسان اوہنوں چھیڑنا پئی چلو رکھی داویاہ کرو۔
 چلو بھئی رکھی دے ویاہ دی تیاری کرو۔ آہاجی رکھی دی جج آوے گئی۔ آہاجی رکھی دالاڑا آوے
 گاتے رکھی آپنی پوٹلی نوں چھاتیاں نال لائے لُج نال مری جانا جیویں اوہداوس ہووے تے
 اوہ پوٹلی وچ لُک جاوے تے مُکدی کسے نوں نظر نہ آوے۔ پر گامے مُکدی ویاہ دی گل نہ
 چھوہی تے مُنہ کسے نوں کدے کوئی خیال دی آیا۔ آپنی پوری بھر جوانی اوہنے ماسی دے گھر
 لنگھا چھوڑی۔ لوکاں دے گھریں بھانڈے دھو دھو کے ای۔

بھٹو پھاہے لگاتے پوپا پھڑیا گیا۔ اسیں ڈردے تھانے نہ جانیے۔ سُوہ نہ لگے پئی
 کتھے ڈکيا ہو یا سُو۔ میں تے ماسی کپھریاں تھانے بھگتاندے پھاہے ہو گئے۔ پر ماسی کیہڑی
 پچھے رہن آلی سی۔ اوس وی بھٹو دا ختم کرایا تے ساری گلی پلس نال بھر گئی۔ پر پورے محلے دی
 کوئی زنانی اجیہی نہیں سی جیہڑی وٹھاں آلیاں پوڑیاں چڑھ کے ختم پڑھن نہ آئی
 ہووے۔ ورھے پچھوں قید کٹ کے پوپا پرتیا تے ماسی نہ چاہوندیاں وی اوہنوں ولایت
 دو جے پُڑکول گھل دتا۔ پئی جد دیس آزاد ہوئے اوہ پرت آئے۔ پر دیس نے کئی واری آزاد
 ہونا اے۔

پُڑ دے انج جاون دا ہرکھ اے سچرا ای سی کہ پٹھلی منزل آلیاں دا پچھلے پنچھی
 ورھیاں توں تو ریا مقدمہ ماسی ہار گئی۔ پر چھڈے چھڈے گھر دا قبضہ لیندے لیندے وی کئی
 ورھے لگھ گئے۔ گھر اُکا ڈھین آلا سی۔ پٹھاں وی اک دو بندے رہ گئے سن جیہڑے گھر اُتے
 قبضے دی اڈیک وچ بیٹھے سن۔ آکھدے دو چار لکھ لوتے جان چھڈو۔ پر ماسی نہ منی۔ کمریاں
 دے فرش ٹٹ جُک گئے۔ چھتاں ادھیاں ڈھے گئیاں، بس پوڑیاں ثبوتیاں سن اوہ وی
 دو جے منز لے تیک۔ دُھر کوٹھے جاون لئی پٹیاں بالے نال ٹیکاں لائیاں ہوئیاں سن۔ گامے دی
 کوٹھری وچ بالے پھسا کے مسان چھت کھلبھاری ہوئی سی تے فرش وچ مورے پئے ہوئے
 سن۔ ساڈا اپنا ساجھا گھر وی چاچیاں ڈیفنس وچ کوٹھی پاون لئی ویتج دتا۔ پر ماسی دا اے کرشن
 نگر آلا ہے سی۔ میں مقدمے دیاں تریجاں بھگتن جاند، مقدمہ اے خورے ہو رڑھ جاند پر
 ماسی آپے ای ساہ پورے کر گئی۔

گامے اخیر تیک ماسی نال رہی۔ اوس ٹٹے گھر اک ویلے نریاں تن سوانیاں ای

رہندیاں رہیاں۔

پر کہانی تاں گامے دی اے جیہڑی رکھی نال پکی رہی۔ گامے اے وی جیوندی اے
تے کرشن نگر دے پرانے قبرستان لاگے رہندی اے رکھی نال۔ گامے نوں ہمیش کوئی نہ کوئی
ماسی عیشاں لہھ ای جاندی اے۔

ماں دی واج پچھا کردی رہندی اے: 'وٹالے ساڈے گھر دے ساہمنے گلی دے
دُوجے بنے ماسی عیشاں دا گھر سی۔' وٹالے آپنا گھر لہھ لہھد امیں ماسی عیشاں دا گھر لہھن لگ
پیا ساں۔

میرے وٹالے پرتن مگروں پیو دے چھ بھراواں وچوں اکلا جیوندا چاچا جد وٹالے
دیاں کھچیاں تصویراں دیکھن آیا تے اک تصویر نوں دیکھدیاں ساراں مونہہ اُتے سنجان دا
انند ماندا ہویا آکھن لگا۔ 'ایہہ گلی سدھی ماسی عیشاں دے گھرے جاندی سی۔'

سزا

پاپا دا کارڈ آیا اے۔ چاچا جی دے ناں ”فیصلے دی تاریخ 16 اپریل پئی ہے تے ایس وار پکا اے فیصلہ ہو جائے گا، پہلاں وانگ اگے نہیں پئے گا۔ بے چھٹی مل سکے تے اوکھے نہ ہوو تاں دودن لئی آ جانا۔“

میرے تے موٹو لئی اک سطر تک نہیں لکھی سی۔ نہ پیار، نہ آؤن بارے کچھ۔ پورے سال وچ پاپا دا ایہہ پہلا کارڈ سی تے ساڈے بارے کچھ نہیں لکھیا، جیویں اوہناں نوں پتہ ہی نہ ہووے کہ اسیں وی اتھے ہاں؟ کیہ پاپا نے اپنے آپ نوں اپنا بدل لیا اے؟ اوہناں نے تاں ہی بدل لیا اے، شاید سسے نے بدل دتا اے۔ اوہناں نوں ای کیہ سمجھ نوں بدل دتا۔ میں کیہ گھٹ بدل گئی ہاں، موٹو کیہ گھٹ بدل گیا اے؟ پتہ نیں اماں دا کیہ حال ہووے گا۔ اُف ایہناں پنج سالوں وچ کیہ کچھ نہیں ہو گیا!

سولہ اپریل اج توں پنج دن بعد۔ میں جاواں گی، ضرور جاواں گی۔ تے موٹو نوں وی لے کے ای جاواں گی۔ کانت ماما نے تاں ہر سنوائی دے بعد ایہی لکھیا اے پئی ایس وار فیصلہ حق وچ ہووے گا۔ اوہ ربا ایوں ای ہووے۔ پر رُک رُک کے کمبہنی چھڑدی اے۔ پہلی وار وی تاں سارے ایہو کہندے سی۔ اودوں میں اُکا بے سمجھ نہیں ساں پھروی بہتا نہیں سی پتہ۔ پاپا تے اماں تاں ہمیشہ مینوں بچھی ہی سمجھدے سی، ایس لئی شاید وڈی ای نہیں ساں ہو رہی۔ ایدھر اک دم کئی وڈی ہو گئی ہاں۔ قنون دیاں گلاں سمجھن لگ پئی ہاں۔ ست جنیاں دی دونوں ویلیاں دی روٹی بنالیندی ہاں۔ روٹی ہی نہیں، گھر دا سارا ہی کم کرن لگی ہاں۔ میرے

نال سکول وچ جیہڑیاں گڑیاں پڑھدیاں سن، اوہناں کولوں کروا کے ویکھے کوئی وی کم۔ پر اوہ کیوں ایہہ سارے کم کرن؟ رب کدی اوہناں نوں ایہو جیہے ماڑے دن نہ دکھاوے۔

کیہ پاپا سچ مچ چھٹ جان گے؟ کچھلی وار جد فیصلہ ہو یا سی تدادی، بابا، چاچا سارے آگئے سن۔ سارے جنے کچھریاں نوں گئے پر سانوں نہیں لے کے گئے۔ موٹو نوں چھڈ جانڈے، اوہ سچ مچ بچہ سی پر میں تاں وڈی ساں، نوویں دا امتحان دے چکی ساں۔ مینوں پاپا دے سارے کیس دیاں گلاں پتہ سن پھر وی مینوں لے کے نہیں گئے میں تے موٹو ساہ روکی سب دے مڑن دی اڈیک کر رہے سی۔ میں خود بڑا گھبرا رہی ساں پر موٹو نوں نالو نال سمجھاؤندی جارہی ساں۔ ہور بھائی مینوں کوئی وڈا نہ سمجھدا پر موٹو تاں سمجھدا ہی سی۔ باراں وچے دادی تے اتناں روندیاں روندیاں گھر اندر وڑیاں۔ بابا گرسی تے بہہ کے ہتھیں چھڑاں موہنہ دئی دھاہاں مار ماروں لگا۔ ”اور بتا تیرے راج وچ اپنا منیر! میرے بے دوشے پُت نوں دو سال دی سزا“۔ ساریاں نوں روندے ویکھ کے اسیں دونویں وی بڑا روئے۔ پاپا نوں گھر نہیں آؤن دتا۔ اوتھوں ہی جیل لے گئے۔

دودن میں سکول نہیں گئی۔ جد گئی تاں میریاں ساریاں سہیلیاں ہمدردی دکھاؤن لکیاں۔ پر ایہہ ہمدردی بالکل نہیں سی۔ ہمدردی کیہ انج کہہ کی دکھائی جاندی اے، ”ہائے نی، وچاری دے پیو نوں جیل ہو گئی“۔ آپس وچ گھٹے گھٹے موہنہ کہندیاں۔ ”ایہو جیہے وڈے لوک وی چوری کردے نیں؟ تاہیں ٹوہراں کڈھی پھر دی سی آشا جی“۔ میرا جی کردا چیک چیک کے سب نوں دساں کہ پاپا نے کچھ نہیں کیتا۔ بس ایس سے اوہناں دی تقدیر ماڑی اے۔ لیکھ مارے ہون تاں کیہ نہیں ہو جاندا؟ رام چندر جی نے کیہڑی چوری کیتی سی، پھر وی چوداں سال دا بن واس کٹیا کہ نہیں؟ پانڈواں نے کیہ کیتا سی، پھر وی لگدے پھرے کہ نہیں؟ تد؟ جدوں دن ماڑے ہون اودوں راجے نوں وی سبھ کچھ بھوگنا پیندا اے۔ اپنی گوگل ایہہ کیوں نہیں سمجھدیاں؟ اماں نے مینوں سمجھایا کہ اچھے ساڈے ماڑے دن نیں، جو وی ہے چپ چاپ جردے جاؤ، تے میں سمجھ گئی۔ تاں ای تاں اوہناں نوں کچھ نہیں سی آکھدی۔ پر اوہناں نوں کدی سمجھ نہیں آئی۔ شاید ماڑے دن وچ ہی سمجھ ودھدی اے۔

خیر تد کانت ماما آگئے۔ اوہ انگلینڈ توں جیویں ہی آئے، سدھے گھر آگئے سن۔ رنا

بولے سی بابا تے چا چا جی نوں کہ ایہہ سب کد اں ہو گیا؟ اج دے زمانے وچ تاں قصور وار اپنے آپ نوں صاف بچالیندے نیں۔ لکھاں ہضم کر کے چھاں نوں تاء دیندے پھر دے نیں۔ فائلاں دیاں فائلاں غائب کروا دیندے نیں تے اک ایہہ نے کہ بناں کوئی ہیرا پھیری کرے جیل جا بیٹھے نیں۔ بناں قصور کیتے وی بابا مجرماں وانگ چپ چاپ سرسٹی سبھ گجھ سُن دے رہے۔ اوہ وچارے قنون دے پھٹکے پنچے کبہ جان؟ جد نہیں سنیا جاندا تاں رون لگ پیندے۔ اوس سے کانت ماما دا وبار رتا وی چنگا نہیں لگدا، پر کوئی کجھ کہہ تاں نہیں سی سکدا۔ اوہ ہائی کورٹ جی اپیل منظور کراؤن لئی بھیج کھڑے سن۔ انگلینڈ توں آ کے کانت ماما اپنے آپ نوں کجھ بُھتا ای سمجھن لگے، اوہ شاید بہت کجھ بن کے وی آئے سی۔

اوہناں نے سچ جی اپیل منظور کروا دتی۔ پنچھیں دناں بعد پاپا چھٹ کے آگئے۔ میں سوچ رہی سی، اوہناں دے آؤندیاں ہی میں تے موٹو اوہناں دے گل نوں چمڑ جاواں گے۔ پاپا کنناں پیار کرن گے سانوں۔ پنچھیاں دناں توں گھر اندر منحوست چھائی ہوئی اے۔ ایہہ دور ہو جائے گی۔ ساڈے چنگے دن پرت آؤن گے۔ سب لوکاں دے آجان نال تے پاپا دے ٹر جان نال سانوں تاں کوئی چھدا ای نہیں سی۔ پہلاں گھر وچ اسیں ہی اسیں ساں۔ کھانا بنایا جاندا سانوں چھ کے، کتے باہر جان دے تاں ساڈی مرضی مطابق۔ اک دم جیویں اسیں کجھ وی نیں ساں رہے۔ میں پھر وی کجھ سمجھدی سی، پر موٹو کجھ نہیں سمجھدا، کسے وی چیز لئی ضد کرن بہہ جاندا۔ میں اوہنوں سمجھاؤندی، ”ویر، ابے ساڈے ماڑے دن نیں، کسے وی چیز لئی اڑی نہیں کری دی“۔ پر اوہ ماڑے چنگے دن کجھ نہیں سی مندا اتے روئی ای جاندا۔ سوچیا سی، ہُن ساڈے ہنجھو پونچھن والے اتے ساڈی ہر ضد پوری کرن والے پاپا آجان گے تے ساڈے سارے دکھ دور ہو جان گے۔

پراجیہا کجھ وی نہیں ہويا۔ پاپا، مامے دے نال تانگے تے آئے سی۔ سارے جنے دروازے تے کھڑے سن۔ پاپا اترے۔ گل کرنی تاں دُور کسے ول ویکھے بناں، چپ چاپ نیویں پائی اوہ اُتے چلے گئے۔ سارے ہی چتا وچ ڈب گئے۔ کیہو جیسے بن گئے پاپا! کسے چ حوصلہ نہ پیا کہ اُتے جاوے اخیر دادی نے اماں نوں گھلیا۔ اماں تھوڑی دیر بعد ہی مُڑ آئی۔ دروازہ ہی نہیں کھول دے۔ بڑا کھڑکایا تاں ایہو کہیا۔ چلے جاؤ، مینوں ابے پریشان نہ کرو۔

اُنچ گھر والیاں نال روٹی میں روز ہی سی، پراوس دن پہلی وار میرا من رو یا سی، اپنی پوری سمجھ دے نال رو یا سی۔ کیہ ہو یا میرے پاپا نوں؟ کجھی دناں بعد گھر وڑے تے پیار کرنا تاں دور رہیا، ساڈے ول ویکھیا تک نہیں۔ وار وار من کہن لگا۔ ایہہ میرے پاپا نہیں۔ اوہ ایہو جیسے ہوا ای نہیں سکدے۔ جیل والیاں نیں اوہناں نوں بدل دتا۔ اک عجیب جیہا بھے من چ پٹھن لگا کہ ہُن شاید پاپا کدی پیار نہیں کرن گے تے سچ مچ اوس دے بعد مینوں کدی اوہناں دا پیار نہیں ملیا۔ اج تک نہیں۔ ایس کارڈ وچ کیہ اوہ اک سٹروی ساڈے لئی نہیں لکھ سکدے سن؟ اُنچ میں اوہناں دی ایس اُداسی تے رُکھے پن نوں سمجھدی وی ہاں۔ شاید اوہ ہُن کسے نال موہ نہیں رکھنا چاہوندے۔ کدھرے پھر سزا ہو جائے تاں؟

شام نوں سارے جنے اُتے گئے۔ بوہا تاں کھولیاں پاپا نے، پر گل کسے نال نہیں کیتی سی۔ بس سرہانے چ مونہہ دئی پئے رہے سن۔ مینوں لگ رہیا سی جیویں اوہ رو رہے نیں۔ پر سب نوں جھٹ پٹھاں بھیج دتا گیا سی۔ کنا زیادہ غصہ آیا سی اوس ولے! پاپا ساڈے نے تے ایہہ سارے ایس طرح کر رہے نیں جیویں ہو رکوئی ہے ای نہیں۔ پاپا تے پہلا حق میرا ہے تے اوہ وی ساری دنیا چوں مینوں ہی سب توں ودھ پیار کردے نے۔ میں چاہوں لگی سی کہ ایہہ سارے فنا فٹ علی گڑھ چلے جان تاں چنگا ہے۔ تدے شاید پاپا ساڈے نال پہلاں وانگ پیار کرن گے۔ ساریاں دے سامنے شاید اوہناں نوں شرم آؤندی اے۔ شرم والی گل تاں ہے ای۔ سکول وچ مینوں کیہ گھٹ شرم آؤندی سی۔

دو بجے دن ماما جی تے چاچا جی چلے وی گئے۔ دادی تے بابا تاں گھر دے جی ای نیں۔ پر پاپا پھیر وی تھلے نہیں آئے۔ اوس رات اماں سون لئی اُتے گئی۔ اوہ سویرے اُٹھ کے آئی تاں بولی۔ ”ماں موٹو نوں تسیں پنڈ لے جاؤ، اوتھوں دے سکول چ پاد یو۔ اتھے تاں ہُن ایس دی فیس دینی وی اکھی ہووے گی۔ آشا دا تاں ایہہ سال فائل اے، نہیں تاں ایہوں وی اُمیش ویر دے نال بھیج دیندی۔ پٹھاں گھر ہُن خالی کردیواں گے۔“ پھر پتہ نہیں ہو رکیہ کیہ گلاں ہویاں دونہاں وچ، تے پھر دونوں دادی تے اماں بہت رویاں۔ میں کسے نوں وی روندے نوں ویکھدی آں تاں پناں وجہ جانے ای رون لگ پیندی ہاں۔ پھر اوس سسے تاں رون دا بڑا وڈا کارن وی سی۔ موٹو تر جائے گا۔ کیوں رہے گا ایہہ پنڈ وچ۔ اوتھوں دا سکول

وی کوئی سکول اے۔ اتھے اپنے ودھیا سکول وچ پڑھیا۔ پاپا بھانویں سارا دن چپ پئے رہن
پر ایس معاملے وچ کدی چپ نہیں رہن لگے۔

پر پاپا کچھ نہیں بولے۔ شاید اماں پاپا نہیں اکٹھے بہہ کے ہی سارا کچھ طے کیتا سی۔
رودھو کے موٹو وی چلا گیا۔ ہاں، جان ویلے پاپا نے اوہنوں سینے نال گھٹ کے بہت پیار کیتا
سی۔ میں کول ای کھلوتی رہی ساں۔ پاپا دیاں اکھاں چوں ہنجھو کر رہے سن۔ میرا بڑا من کردا
سی میں ہنجھو پونجھ دیاں۔ اوہناں دے دکھ نوں دُور کرن لئی نہیں، پاپا توں پیار لین دے لئی۔
موٹو دُور جا کے وی پاپا دے کئے نیڑے ہو گیا، میں کول رہ کے وی شاید سدا دُور ہی رہواں
گی۔ پر پاپا موٹو نوں تورن پٹھاں نہیں آئے۔ کوئی سٹیشن وی نہیں گیا۔ جاندا وی کون؟ اماں
اکلی تڑدی نہیں تے میں جاندی تے مڑدی کیوں؟

کوئی مہینہ بھر ہچھو پھر ساڈا گھر رہ گیا سی، اوہدے چوں وی موٹو چلا گیا سی۔
موٹو ای کیوں ہفتیاں وچ ای سارا سامان وی چلا گیا سی۔ پٹھلا مکان خالی جو کر دتاسی۔ کھانا
پکاؤنا تے سونا برساتی وچ۔ نال والی چھوٹی جیہی کوٹھڑی صاف کر کے مینوں پڑھن لئی دے
دتی۔

پاپا ہُن کچھ کچھ بولن لگے سن، پر پہلاں درگے پاپا ہُن بالکل نہیں سی رہے۔ بس
سارا دن چپ چاپ پئے رہندے یاں کچھ پڑھدے رہندے۔ کدی کدی گود وچ سر ہانا رکھ
کے کچھ لکھدے وی۔ میرا بڑا دل کردا کہ ویکھاں اوہ کیہ لکھدے نیں۔ پر کدی ہمت ای نہیں
پئی۔ کئی ہی وار پڑھیا سی کہ دکھ وچ حوصلے توں کم لین والے ای سچے یو دھے ہوندے نیں۔
ہسد اہسد اہسد سارے دکھ جر جاوے اوہی وڈا آدمی ہوندا اے۔ میرا دل کردا پاپا نوں ایہہ
گل سمجھاواں۔ پر کیہ پاپا ایہہ سارا کچھ نہیں جاندے؟ پھر؟ ایس طرح تاں مونہہ لگا کے اوہ
پیار ہے جس نے سچ مچ چوری کیتی ہووے۔ پاپا نوں تاں باہر نکلتا چاہیدا۔ گھمنا پھرنا چاہیدا۔
ایس طرح تاں اوہ اپنے آپ نوں دوشی ہی ثابت کر رہے نے۔ پر اوہناں نوں کیوں
سمجھاؤندی؟

اپنی کوٹھڑی وچ ہو ر کوئی اوکھ نہیں سی، پر بھیا نک گرمی دے دن تے پکھا نہیں۔
رات جیویں کیویں چھت اُتے کٹ جاندی پر دوپہرے تاں چھت تے بنے ایہہ کمرے بھٹھی

وانگ تپدے سی۔ چھٹیاں دے دن بیت ای نہیں سن رہے۔ اپنی کسے سہیلی دے جان نوں من نہیں سی کردا، گوانڈھ وچ وی جانا چھڈ دتا سی۔ دکھ وچ کوئی نال نہیں خُردا۔ بس اک گنڈھ دے لئی سی کہ جد تک ایہہ بھیڑے دن ٹل نہیں جاندے اودوں تیک سارا کچھ چُپ کیتے سہنا ایں۔

جولائی وچ بابے دی چٹھی آئی۔ موٹو نوں چھبویں وچ داخل کروا دتا اے تے اوہ خوش ہے۔ اسماں ساریاں وی من لیا سی کہ اوہ خوش ای ہووے گا۔ ایہہ من لین وچ ای ساڈے ساریاں دی خوشی سی۔ نال ہی بابے نے ایہہ وی لکھیا سی کہ شام نوں اوہناں نیں اک دکان وچ حساب کتاب لکھن داکم شروع کر دتا اے۔ پنجھی روپے ملیا کرن گے جیہناں نوں اوہ پاپا نوں گھل دین گے۔ میرے سامنے بابے دا بڈھا سریر، گبا لک تے دُھند نال بھریاں اکھاں گھم گئیاں۔ بڈھے وارے اوہ ہُن پھر نوکری کرن گے؟ اماں نے دسیا کہ ایہنیں پچھتر روپیاں نال ای اوہناں نے گھر چلاؤنا اے۔

میں سکول بس چھڈ دتی۔ تین میل تڑ کے ہی جاندی ساں۔ مینہ ہووے یاں دُھپ چہرے تے کوئی مایوسی نہیں ساں آؤن دیندی۔ کدی کدی سوچدی پاپا نوں سسپنڈ ہوئے دو سال تین مہینے ہوئے، اپنے دناں وچ آخر کتھے خرچہ ہو یا کہ بینک وچ رکھیا سارا پیسہ کڈھا لیا، اماں دے سارے گہنے وک گئے۔۔۔ ہور وی پتہ نہیں کیہ کیہ خُر گیا۔ وکیل شاید وڈے لئیرے ہوندے نیں۔ کدی سوچدی ایدے نالوں تے چنگا سی پاپا سچ مچ ہی دفتر دا پیسہ مار لیندے۔ گھٹو گھٹ موٹو نوں تے اپنے کول رکھدے، تے اک پکٹھا وی رکھ لیندے۔ ایس ہُم وچ تاں چمڑی جیویں اُبل جاندی اے۔ ایمان داری دکھا کے وی کیہڑا وڈا سکھ ملدا پیا۔ اماں نوں پتہ نہیں کیہ ہو گیا سی کہ اندرے اندر سکدی جاندی سی۔ کتھے تاں کچھ نہیں سی کردی کتھے ہُن سارا کم ای ہتھیں کرنا پے گیا۔ پاپا وی اوہدی مدد کردے سن، اوس سے مینوں بڑا چنگا لگدا سی۔ اوہنیں دنیں اماں بڑی چڑی ہو گئی سی۔ اک دن اوہنے مینوں کی جیہی گلوں ماریا۔ اپنی سُر ت وچ میں پہلی وار گٹ کھادی سی تے اوہ وی ایس عمر وچ۔ سریر نالوں ودھ من نوں دکھ پہنچیا۔ سب نالوں بہتا ایس گل دا دکھ سی پئی پاپا بیٹھے ویکھدے رہے، پر کچھ نہیں کہیا۔ نہ اماں نوں روکیا، نہ مینوں ای پیار کیتا۔

اپنی کوٹھڑی چ وڑ کے میں گھنٹیاں بدھی روندی رہی ساں۔ اوہ رتا! سارے دکھ دے پر میرے پاپا نوں پہلے ورگا کردے۔ اوہ پہلاں وانگ ہو جان گے تے میں سبھ کجھ جر جاواں گی، سبھ لواں گی۔

سنوائی دی پہلی تاریخ ای جھے مہینے بعد دی پئی سی۔ کانت مامے نے کوشش تاں بڑی کیتی سی کہ چھیتی چھیتی ساری سنوائی ہو جاوے تے فیصلہ ہو جاوے، پر قنون کانت مامے دی سدھرنال نہیں اپنی ٹور ہی خردا اے۔ وکیلاں دا سارا خرچ ماما ای کردے پئے نے۔ ضرور مامی توں چوری کر رہے ہون گے۔ نہیں تاں اوہ تے اک پیسہ نہ خرچ کرن دے۔ پہلی سنوائی بڑی چنگی ہوئی سی۔ ٹھنڈ وچ ٹھڑکریاں جدوں اسیں ایہہ خبر سنی سی تاں گرمی دی اک روپڑ پٹھ تک پھر گئی سی۔

گھر دی حالت بد توں بدتر ہوندی جا رہی سی، خاص کر کے اماں دی۔ مینوں تہے لگدا سی کہ کوئی اجیتی بیماری اوہنوں لگ گئی اے جیہڑی اندرے اندر اوہنوں کھائی جاندی اے۔ ہانچن وچ بیماری تے اوہدیاں نشانیاں پڑھیاں ہو یاں سن تے مینوں اماں دیاں ساریاں نشانیاں دے دیاں لگدیاں۔ سردی وچ جیوں ٹھنڈ لگ گئی تاں چار مہینے تک کھنگھدی ہی رہی۔

بابے دی چٹھی آئی۔ بڑی بے وی چ اوہناں لکھیا۔ ”حساب وچ کوئی اجیتی غلطی ہوئی کہ اوہ کم جاندا رہیا۔ ہن تاں پنجاہ روپیاں دی پنشن چوں مشکل نال پندرہ روپے ای بھیجے گاں۔ حوصلہ رکھیں پتر، بُرے دن آؤندے نیں تاں ساریاں پاسیاں توں آؤندے نیں۔ پراہمہ دن پھرن گے ضرور۔ رب دے گھر دیر ہے، ہمیر نہیں۔“

دوسری سنوائی اپریل چ ہوئی۔ تاریخاں چھیتی ملدیاں ای نہیں سن۔ پاپا نوں چھٹیاں سال ہو گیا سی تے اچے دو سنوایاں ہور رہندیاں سن۔ ایسے ایسے دناں بعد ای بچے سنوائی ہوئی تاں اک سال ہور لگ جائے گا۔ میرا دل کمبدا سی۔ لگدا سی ہُن ایوں دن نہیں کٹے جاندے۔ موٹو پنڈ چ، پاپا بستر وچ، میں کوٹھڑی وچ تے اماں منجی اُتے۔

کیویں میں میٹرک دا امتحان دتا سی، میں ہی جاندی آں۔ پھیر وی سیکنڈ ڈویژن چ پاس ہو گئی۔ کوئی خوشی مناؤن والا نہیں سی۔ ساریاں دے من ایسے مرچکے سن کہ نہ کسے گل دی

خوشی ہوندى سی، نہ دکھ۔

جولائی وچ نویں مصیبت آئی۔ پنڈ وچ تاں صرف مڈل سکول ای سی۔ موٹو داہن کئیہ بنے گا؟ میرا ہن کئیہ ہووے گا؟ اتھے کالج جان دا تاں سوال پیدا نہیں سی ہوندا۔ مینوں پتہ سی کہ بچیاں نوں پڑھاؤنا تاں دُور دی گل، پیٹھ روپیاں وچ کول رکھ کے کھواؤنا پیاؤنا وی مشکل سی۔ بابے نے موٹو نوں سدھا اُمیش چاچے کول بھیج دتا تے سنبھا گل چھڈیا۔ ایتھوں دی حالت بارے اوہ جاندا ای سی۔ پاپا اوہ خط پڑھ کے تڑف اُٹھے، اماں بہت روئی۔ ”میں پُت نوں ان پڑھ ای رکھ لیندی، او تھے کیوں بھیج دتا؟ اک وار اوہنوں مینوں ملا تاں دیندے۔ لیلدا سبھا کون نہیں جاندا؟ میرا بچہ سہم نال ای مر جاؤ۔“ دودن بعد اوہ بولی۔ ”میں سوچدی آں، آشنا نوں وی بھیج دیئے۔ او تھے کالج جان لگ پئے گی۔“ میں سمجھ ای نہیں سکی اماں برڑا رہی اے یاں۔۔۔ پر اگلے بول نے ساری گل صاف کر دتی۔ ”لیلدا دا سُہا تاں تسیں جاندا ای ہو۔ آشنا موٹو دے کول رہے گی تاں اوہنوں حوصلہ تاں رہوے گا۔ سون لئی اک گود تاں اوہ دے کول رہے گی۔“ تے اماں وَلک وَلک کے رون لگی سی۔ ”اُمیش بھانوں لکھ دیو، جو وی اوہ خرچہ کرے، ساڈے تے قرض ای سمجھے۔ میں اوہناں دی پائی پائی موڑ دیاں گی۔ پر ماتما کدے ساڈے دن وی پھیرے گا ای، نہیں خود نوں وچ کے اوہناں دا قرض لا ہواں گی۔ پر میرے بچیاں تے تھوڑا رحم کرن۔ ایہہ دکھیا رے اینویں ای یتیم بن رہے نیں، تھوڑا پیار ایہناں نوں وی دینا، تھوڑا جیہا لیلدا نوں وی سمجھا دین۔“

کانت ماما اپنے ای کسے کم دلی آئے سن۔ مُردے ہوئے علی گڑھ وی اُترے۔ اماں نے اوہناں دے نال ہی مینوں وی الہ آباد بھیج دتا سی۔ کانت ماما نے اک وار آکھیا ضرور سی، ”کلکتہ بھیج دیو، او تھے پڑھ لوے گی۔“ پر کئیہ میں پڑھن جا رہی ساں؟ پڑھن دا تاں بس ناں ای سی۔ میں تاں موٹو نوں حوصلہ دینا سی۔ اوہ رووے تاں اوہنوں اپنی گود وچ لے کے رواؤنا سی۔ تے اوس دن میں سچ مچ وڈی ہو گئی سی۔ اماں وانگ وڈی۔ پر جان ویلے سارے وڈ پِن دے باوجود میں پھس پئی ساں۔ اماں دی حالت ول دیکھدیاں گھر دا بہت کم میں سنبھالیا ہویا سی۔ ہُن کئیہ ہووے گا؟ ایس حال وچ اماں کیویں سارے کم کرے گی؟ روز چڑھدے تاپ نے اوہنوں ہڈیاں دی مُٹھ بنا دتا سی۔ پر اماں نوں تے تسلی

دین والے پاپا کول نے۔ رون لئی پاپا دا موڈ ھا اے۔ موٹو تاں او تھے اکلا اے۔ ایسے لئی میری سبھ توں ودھ لوڑ موٹو نوں ای ہے۔

رستے وچ کانت مامے نے مینوں پچھیا سی۔ شاردانوں روز تاپ چڑھدائے، کسے ڈاکٹر نوں دکھایا یاں نہیں؟“

”نہیں؟“ تے مینوں رونا آ گیا۔

”رونا نہیں پڑی، ہُن بہت چھیتی ای سب ٹھیک ہو جانا تے۔“

”پاپا نے تاں کئی وار آکھیا سی پئی وکھاؤ پرائتاں مندی ای نہیں۔ کہندی اے ڈاکٹر جنگے بھلے نوں وہم وچ پادیندے نیں۔“

ماما چپ ہو گیا سی۔ ماما کیہ سمجھدے نہیں؟ اماں ایس لئی نہیں وکھاؤندی کہ ڈاکٹر تے دوائی دا خرچ کتھوں آئے گا۔ اوہ تاں ٹانک، دودھ تے پھل دس دین گے۔ آرام کرن تے خوش رہن نوں کہن گے۔ دسواہیہ سارا کچھ ہو سکے گا پیٹھ روپیاں وچ؟ مینوں پچھو میں ابھیں دینیں گھر چلایا ہے۔ اک اک چیز گوا سکدی سی، پر اوہناں نوں کیہ آکھدی! وکیلاں دا سارا خرچ تاں اوہ کر ہی رہے نے، تے وکیلاں اُتے رُکنا خرچ ہوندا اے، کیہ مینوں نہیں پتہ؟

موٹو مینوں ویکھدیاں ای چمڑ گیا سی تے روپیا سی۔ میرا وی رونا نکل گیا سی۔ چاچی نے کچھ کہیا ضروری، پر اپنے رون دھون وچ اسیں سُٹیا نہیں۔ موٹو نوں گل نال لا کے مینوں کیویں لگ رہیا سی میں نہیں دس سکدی۔ اپنا ضرور لگا کہ اوہنوں پتہ چُج کسے گود دی لوڑ سی۔ کسے سہارے دی۔ میں چاچی نال گلاں کر رہی ساں بظاہر، پر میں کیہڑا اپنی مرضی نال آئی ساں۔ موٹو دا رنگ چوکھا سانولا پے گیا سی۔ چہرہ سُنک کے مڑجھا گیا سی تے اکٹھاں سہمیاں سہمیاں لگ رہیاں سن۔ چاپیا، بڑا ڈر کے، سہم کے رہندا اے شاید او تھے۔ گھر وچ رُکنا اُدھم کردا سی۔ کیویں ایہنے اپنے آپ نوں بدلایا ہووے گا، روکیا ہووے گا؟ ویکھیا اوہدا کم سی سال کو دے پُٹو نوں کھڈاؤنا۔ سارا دن اوہ اوہنوں کچھڑ چکی کھڑی لت رہندا۔ کدو اوہ پڑھدا ہووے گا، کد اوہ ہوم درک کردا ہووے گا!

رات اوہ جد سون لئی میرے کول آیا تاں ہولی جیہی بولیا، ”دیدی، کل مینوں بڈھی مائی دا جھانکھوائیں۔ ٹلو تے چپی روز کھاندے نیں۔ اک دن ٹلو مینوں چڑا کے کھا رہیا سی،

میں اوبدے وال پُٹ دتے۔ اوہنے چاچی کول شکایت لا دتی۔ چاچی نے مینوں بڑا ماریا۔
 چاچی بڑے زور نال ماردی اے۔“ تے پھر ڈسکن لگا۔ میں اوہنوں پیار کیتا تے کہیا۔ ”میں
 اپنے ویرے نوں جھاٹا کھواواں گی،“ پر میرا من ولک اُٹھیا اسیں وڈے ہاں، اسیں سب
 سمجھدے ہاں تے سہہ سکدے ہاں۔ پراہیہ وچارا کیویں سمجھے! سمجھتاں گیا ای ہووے گا پر
 سہارے کیویں؟

پہلی رات نوں ہی میں فیصلہ کر لیا، میں کالج نہیں جاواں گی۔ گھر دا سارا کم میں
 کراں گی جس کر کے چاچی نوں پورا آرام ملے تے اوہا غصہ ٹھنڈا رہوے۔
 چاچی کچھ دی کہوے اوبدے اگے چوں نہیں کرنی۔ اوہ خوش رہے گی تاں موٹو بچیا
 رہے گا۔ موٹو نوں رات نوں بہہ کے پڑھاواں کراں گی۔

میں چاچی نالوں دی پہلاں اُٹھ کے ساریاں لئی چاہ بنا دیندی۔ پھر جھٹ پٹ ٹلو
 تے پی پی نوں تیار کر دیندی۔ ناشتے دی پلیٹ دیکھن چاچی ضرور آؤندی۔ شاید اوہنوں ایہہ
 بھرم رہندا کہ میں موٹو نوں کتے وڈھیاں ودھیا نہ کھوا دیواں۔ چاچا جی تعریف کردے ”توں
 تاں بڑی ہوشیار ایں آشا، اینا کم کردی ایں۔“ چاچی جھبڈے بولدی، ”میں جدوں اپنی وڈی
 ساں تاں بارھاں جنیاں دے ٹیر نوں سمجھدی ساں۔ اڈھا اڈھا من دا نیاں دا جتہن کردی
 ہوندی ساں۔“ چُپ سُندی رہندی سی میں تاں۔ دونواں ویلیاں دا کھانا پکانا وی میں اپنے
 ذمے لے لیا ہویا سی۔

راتیں سون جاندی تاں میرے پیر تپدے سن۔ کدی کدی موٹو نوں اپنے پیراں
 تے کھڑا کر لیندی۔ اوبدے نال پیراں نوں چین آجاندا سی۔ پر من؟ اماں کدی کدی پنڈ کم
 کراؤندی سی تاں پاپا لڑدے سن، میں اپنی آشنا نوں ڈاکٹر بناؤنا ایں، باہر دے ملک بھیجاں گا،
 ایہہ بھٹیہا رپنا کرا کے میں کوئی اپنی دھی دی زندگی برباد کرنی ایں!“ ایہو بول ہوا وچ تردے
 کمرے وچ گھمدے رہندے۔ گونجندے رہندے۔ ہولی ہولی عادت پے گئی تاں پیراں دا
 درد بند ہو گیا تے من دی سُن ہوندا چلا گیا۔

میں اماں نوں نہیں لکھیا کہ میں کالج وچ نہیں پڑھدی ہاں۔ لکھن لئی چاچی جی نے
 مینوں چار پوسٹ کارڈ دتے سن تے دسیا سی کہ ہر مہینے چار کارڈ ملن گے۔ اوہناں نوں میں

اپنی راضی خوشی لکھ دیندی سی، بس۔

رات دن میں کم کر کر کے چاچی دے کر ودھ نول قابو کر رکھدی۔ سُکھ مانندی اوہ میرے تے کچھ کچھ خوش وی ہوگئی، پراوس دا ہتھ کدے کدائیں ورھ ہی جایا کردا۔ اپنے چچیاں تے موٹو اُتے وی۔ اوہ دے بچے کھجے ہوئے سی، اوہ گٹ کھا کے وی ہسدے تے دوڑ جانڈے۔ پھر اوہ مارکھانڈے سی تاں پیار وی لیندے۔ پر موٹو سہم جاندا سی۔ اندرے اندر سسکدا، دُسلدا۔ بڑی دکھ وائی نظر نال اوہ میرے دل ویکھدا۔ پر اندروں ٹٹ کے وی میں اجیہے موقعے تے کچھ نہ بولدی۔ سوچدی انج مارکھا کھا کے موٹو یاں تاں بہت ڈھیٹ ہو جائے گا یاں سُن۔ پاپا تے اماں تاں کدی ہتھ وی نہیں سی لاؤندے سانوں۔ اگلے ہوندے تاں میں اونوں پیار کر دی۔ سمجھاؤندی، ”تھوڑے دنوں دی گل ہو رے ویرے، پھر اسیں اپنے گھر چلے جانا ایں۔“ پر میرا من سب توں ودھ اودوں دکھی ہوندا جدوں چاچی غصے وچ کہندی، ”آفس دے ویہہ ہزار روپے غائب کر کے دب لئے تے ساڈا لہو پیندے آ۔ ایہہ ساڈے وڈے نیں! لعنت ایہو جیسے وڈ پِن تے۔“ میں سوچدی کیہ چاچی جی سچ سچ ایہی خیال کردے نے کہ پاپا نے روپے ہڑپ کیتے نے؟ جے اج اوہناں کول پیسہ ہوندا تاں کیہ سانوں انج چھڈ دیندے؟ تے اپنے سارے پتے دن اکھاں اگے گھم جانڈے۔ کنا پیار کر دے سی پاپا۔۔۔ کنا! میں بھانویں کچھ وی لکھاں، پر اوہ کدھرے جانڈے نہیں کہ ساڈے تے کیہ گزر رہی اے؟

31 اگست نوں چاچا جی نے چاچی دے ہتھ تے تنخواہ رکھی تاں چاچی نے کہیا، ”ہُن بھائی صاحب نوں لکھ دیو پئی پنجاہ روپے نہیں بھیجے جانے۔ ایس مہنگائی دے زمانے وچ دونوں سانہنا ای بڑا مہنگا پے رہیا، پھر ساڈے اپنے وی تاں بچے ہے نیں۔ اتھتھے کیہڑا کھان پُندے آں۔“ گل وی ٹھیک سی، پر دھرا ندر کمب گیا۔ چاچا جی نے پیسے نہ بھیجے تاں کیہ بنے گا؟ پندراں روپیاں نال مہینہ کیوں لگھے گا؟ اینا تاں کمرے دا کرایا ای دینا ہوندا۔

روندی ہوئی ماں تے بے سدھ پاپا مینوں ساری رات نظر آؤندے رہے۔ میں وی اوہناں دے نال بہت روئی۔

اماں دا کوئی خط نہیں آیا، بہت دنوں تک۔ اٹھدیاں پٹھدیاں اکو چنتا سی مینوں۔

اماں نے پیسیاں بناں کیویں ساریا ہووے گا؟ کانت مامے داوی کوئی خط نہیں آیا۔ پتہ نہیں
کیہ حال ہے اودھر۔

پورا اگست بیت گیا۔ میں اپنے چاروں کارڈ پادتے، پر کوئی جواب نہیں آیا۔ کیہ ہو
گیا اماں نوں، لکھدی کیوں نہیں؟ ستمبر وچ کانت مامے دا خط آیا، ”شاردا دی صحت ٹھیک نہیں
سی، میں اوہناں اتھے لے آیا۔ اتھے اوہدا علاج ہو رہیا اے۔ دیش جی نے کمر ابدل لیا اے،
اوہناں دا پتہ ہے۔۔۔ قسمت توں بناں کیہ کہواں پئی تاریخ چھیتی نہیں ملدی۔ تنجی تاریخ
ایسے مہینے دے آخر دی پئی اے۔ سُنوائی تے جاواں گا۔ توں گھبراؤنا نہیں پُڑی۔ پر ماتما سب
ٹھیک کرے گا۔ گرمیاں تک کچھ نہ کچھ ضرور ہو جائے گا۔“

تاں پاپا اکلے رہ گئے۔ اماں تے اماں دی گود وی جاندی لگی جتھے اوہ روتاں
سکدے سی۔ پاپا دا ایہہ پتہ؟ علی گڑھ دی گلی گلی مینوں پتہ سی۔ ایہہ تاں مزدوراں دی دُستی
اے۔ ہنیریاں سل نال بھریاں گلیاں۔۔۔ کولوں وگدے نالے۔ پاپا دی روٹی کون پکاؤندا
ہووے گا؟ اوہناں نے تاں کدی ایس طرح کم نہیں کیتا۔ کدی اگیٹھی دی بالدے تاں اماں
روک دیندی سی۔ تد اوہ ایہو آکھدے۔ ”شاردا، کس نوں پتہ پئی ایس وار چھٹ ای جاواں
گا۔ سزا ہوگئی تاں پتہ نہیں کیہ کرنا پئے گا۔“

اماں وچوں جھروک دیندی، ”ایہو جیہی گل کوں مونہوں کڈھدے او؟ رب دے
گھر دیر اے، ہنیر نہیں۔“ ایہہ بول اماں نے بابے کولوں سکھیا سی تے منتر وانگ گنڈھ مارلی
سی۔

تے میں رب کولوں ایہو منگدی کہ اے بھگوان اوہناں نوں سزا نہ ہووے۔ پاپا دی
تپسیا دا پھل اوہناں نوں ملے۔ جو کچھ اوہ جر رہے نے، اوہ کیہ تپسیا توں گھٹ اے؟ سل بھری
ہنیری کوٹھڑی ج ساریاں توں مونہہ لُکا کے رہنا! بچے کتے، تیویں کتے، ہُن تے ترس کھاؤ۔
ہُن اوہناں نوں ہو سزا نہ دینی۔

موٹو تے ٹلو اپنا اپنا رزلٹ لے کے آئے۔ ٹلو سب کتاباں وچوں پاس سی تے موٹو
اک وچ فیل ہو کے اگلی جماعت چڑھیا سی۔ چا چا جی نے ٹلو نوں پیار کیتا۔ مونو کول کھلوتا
اتھرواں نال بھریاں اکھاں نال ہٹر ہٹر دیکھدا رہیا۔ چاچی نے آکھیا، ”فیل ہو گیا نا؟ پڑھن

لکھن ول من لاؤ موٹو صاب، پھیر ٹلو وانگ پاس ہوو گے۔ سارا دن بیٹھے بیٹھے ہنچھو و ہاؤن نال پاس نہیں ہو یا جاندا۔ اکھاں بچ اٹکے ہنچھو گکھاں تے ڈھلک آئے۔ تمیض دی بانہہ نال اوہناں نوں پونجھدا ہو یا اوہ اندر جان لگا تاں ٹلو چڑاؤن لگا، ”فیلو رام۔۔۔ فیلو رام!“ اوس دن پہلی وار میرے لئی اپنے آپ تے قابو پانا اوکھا ہو گیا سی۔ چت کیتا کہہ دیاں، اوہنوں پڑھن لئی ویلھ ای کتھے ملدا اے؟ سارا دن تاں بٹونوں کھڈاؤندا اے۔ کئی چکر بازار دے لواندے او۔ پردر ڈٹ لئی۔

جانندیاں جانندیاں موٹو نے اک وار چڑا رہے ٹلون ضرور لوہندیاں اکھاں چوں دیکھیا سی۔ جاپیا تھ چکے گاتے ٹھاہ مارے گا، پر نہ اوہ مڑیا نہ کچھ بولیا سی۔ کیوں بن گیا اے موٹو اینا جرن جوگ؟ چپ چاپ سہن داسبتق اوہنوں میں ای دیندی ہوندی ساں۔ پر ہُن اوہ انجسہہ جاندا اے تاں سب توں ودھ دکھ مینوں ای ہوندا اے۔ پر کوئی اُپاء دی تاں نہیں سی۔ موٹونوں پھٹیاں ہو گئیاں۔ سوچدی ساں شاید کانت ماماں امان دا کوئی خط آئے گا کہ تسیں آ جاؤ، پر کسے نے کچھ نہیں لکھیا۔ پاپا تاں کدے کچھ لکھدے ای نہیں، امان کدی کدی دوسطراں لکھ گھلدی، ”میں ہولی ہولی ٹھیک ہو رہی ہاں، توں چنتا نہیں کرنی۔ لیلیا نوں آشیرواتے بچیاں نوں پیار۔ چاچی نال دجے کم کرواؤنا، تنگ نہیں کرنا،“ مینوں ہر وار لگدا سی، کئی جھوٹی چٹھی لکھدی ہے امان!

پر صبر دی، پر کھ دی گھڑی ودھدی ودھدی سال بھر تک اپڑ گئی۔ پچھلے مارچ وچ سنوائی ہوئی سی تے ہُن ایس سال دا اپریل اے۔

ہُن تاں مینوں جاپن لگا سی کہ جیویں پوری زندگی اسیں ایسے طرح رہنا ہے، بس ایسے حال۔ ہُن میں کدی کالج پڑھن نہیں جاواں گی۔ موٹو ہر سال اک کتاب وچ فیل ہو کے جیویں کیویں پروموٹ ہو یا کرے گا۔ امان شاید ہمیشہ بیمار ہو کے مامے ہوراں کول اوتھے علاج کراؤندی رہے گی۔ پاپا اینویں ای سل بھری بوماردی کوٹھری بچ اپنی روٹی آپ سیکدے رہن گے۔۔۔!

تے تدے اج پاپا دی چٹھی آئی، اوہناں دے ہتھ دی لکھی پہلی چٹھی۔ میں ہزار وار اوہنوں دیکھیا، پڑھیا، چھوہیا، جیویں اوس کارڈ نوں چھوہ کے پاپا دے حال توں جانو ہو

جاواں گی۔

پاپا نے سانوں بلایا نہیں۔ آکھئے تاں چا چا جی لے جان گے؟ پر ایس وار جاواں
گے ضرور، چاہے کجھ وی ہو جائے۔ کانت مامے نوں لکھاں اوہ لے جان گے؟
کل سویرے دس وے فیصلہ اے۔ اسیں دونوں کانت مامے دے نال آگئے۔
دھرم شالا وچ چھڈ کے ماما جی اماں نوں لین ٹر گئے۔ پوری امید سی کہ ایس وار اوہ ضرور آوے
گی پر اوہ نہیں آئی۔ مامے نے آکے اپنا ای آکھیا، ”اوہدی حالت لیاون والی نہیں سی۔ فیصلہ ہو
جائے تاں تسیں اوہ تھے ای چلنا۔“ پتہ نہیں اماں کیہڑے حال اے۔ دل وار وار کنب اٹھدا
اے۔ ماما جی کجھ لکا رہے نیں۔ میں وی اماں کولوں کنا کجھ لکا رکھیا اے۔ اج کون کیہدے
بارے صحیح گل جاندا اے؟ دوسرے نوں ہولا رکھن لئی سارے اپنے اپنے دکھ نال بھارے ہو
رہے نیں۔

پاپا آئے تاں میں تے موٹو اوہناں نوں چمبڑ گئے۔ پاپا! شاید پاپا نوں وی اسیں
ایویں ہی لگ رہے ہوئے۔ کئے سارے اتھرو دیہہ گئے ساڈے تہاں دے۔ کانت ماما وی
روپے۔

شام نوں دادی بابا وی آگئے۔ رات نوں موٹو دادی نوں پچھ رہیا سی۔ ”دادی ہُن
تاں اسیں پاپا دے کول ای رہواں گے نا؟ توں اپنی پوجا کردی ایں، اپنے بھگوان نوں آکھ
ساڈے پاپا نوں چھڈ دیوے۔“
”ہاں پتر، ہُن توں پاپا دے کول ای رہویں گا۔ رات دن بھگوان نوں ایہی تاں
کہندی آں۔“

”چاچی دے کول تاں ہُن کدی نہیں جاواں گا۔ ٹلو اپنے آپ نوں سمجھدا کیہ اے؟
میں اپنے پاپا دے کول رہواں تے پھر اوہ آجائے۔ ہر چیز وچ پچھاڑ سکدا ہاں۔ پڑھن وچ وی،
گھلن وچ وی۔ پہلاں فسٹ وی آیا ہاں اک وار کلاس وچوں۔۔۔ کیوں دیدی آیا سی نا؟“
میریاں اکھیاں بھر آیاں۔ کئے دناں بعد موٹو نوں اوہدے اصلی روپ وچ ویکھ
رہی ہاں۔ ٹلو نے ایس نوں چڑایا سی تاں ایہنے کجھ نہیں کہیا سی۔ چپ کیتے اندر وڑ کے رولیا
سی۔ شاید جاندا سی کہ ٹلو نوں کہن دا مطلب اے چاچی دی گٹ۔ پر مینوں کنا بھیڑا لگا سی
اوس دن! کتھے چلی گئی موٹو دی ایانیاں والی ایرکھاتے پڑھائی وچ اگے ودھن دی لاسا! کیہ اپنی

کوٹمرچ اسیں سارا کچھ سہن لئی ہی بنے ہاں۔
 موٹو دادی دی منجی تے ای سوں گیا۔ مینوں بالکل نیندر نہیں آئی۔ کل فیصلہ اے۔
 ساڈیاں ساریاں دی قسمت دا فیصلہ۔ کانت ماما بڑے آس وند نے پر پاپا دے چہرے تے کوئی
 تاثر نہیں۔

فیصلہ ہو گیا۔ میں وی کچہری گئی ساں۔ ایس وار کسے نے روکیا وی نہیں۔ او تھے
 خاص بھٹڑ نہیں سی۔ پاپا وچ گھر والیاں توں بناں کس نوں دلچسپی ہو سکدی سی؟ پاپا کٹہرے وچ
 کھڑے سن۔ اسیں گُریاں تے بیٹھے جج صاحب دے آؤن دا اڈیک کر رہے ساں۔ جج
 صاحب آئے تاں بابے نے اکٹھاں میٹ لئیاں۔ دادی داسر جھکیا ہو یا سی۔ اوہ ضرور من ہی
 من وچ ارداس کر رہی ہووے گی۔ موٹو دا ہتھ میں گھٹ کے پھڑی بیٹھی سی تے مینوں جا پدا
 سی کہ ہُن جے ہور دیر ہوئی تاں میرا ساہ گھٹیا جائے گا۔

قونی بولی وچ جج صاحب نے کیہ کیہ آکھیا، مینوں کچھ سمجھ نہیں آئی، پر آخری بول
 سمجھ آ گیا: ”مجرم نوں رہا کیتا جاندا اے۔۔۔“ میں موٹو دا ہتھ ہوا وچ اُچھال کے اک طرح
 چیک جیہی ماری: ”موٹو پاپا رہا ہو گئے۔۔۔ رہا ہو گئے۔“ پر ایکا ایکی دادی تے بابا دھائیں رو
 پے۔ میں خوف نال کمب گئی، کتے میں غلط تاں نہیں سُن لیا۔ کچھلی وار وی تاں ایہہ انج ہی
 روندے ہوئے گھر وڑے سن۔ پر بابے دا ایہہ بول: ”میں کہندا نہیں ساں پُت بھگوان دے
 گھر دیر ہے پر ہنیر نہیں۔۔۔ دیکھیا۔۔۔“

پر پاپا نوں کیہ ہو یا؟ اوہ خوش کیوں نہیں ہو رہے۔ اوہناں دا ہناں تاثر توں چہرہ،
 اندرون دھسیاں ہو یاں نکھیاں جیہیاں بے جان اکٹھاں وچ خوشی دی چمک کیوں نہیں آ رہی؟
 اوہ اجیہیاں پتھرائیاں اکٹھاں چوں بابے نوں ویکھ رہے نے، جیویں اوہناں نوں بابے دی گل
 ہی سمجھ نہیں آ رہی۔

میں دوڑ کے پاپا نال چمڑ گئی، ”پاپا تسیں بری ہو گئے۔ سُن دے ہو، تہا نوں سزا نہیں
 ہوئی۔۔۔ سزا نہیں ہوئی تہا نوں۔“ تہا نوں سزا نہیں ہوئی۔۔۔ سزا نہیں ہوئی تہا نوں۔“ پر پاپا
 پھروی اونویں ای رہے، جیویں اوہناں نوں یقین نہیں آؤندا کہ اوہناں نوں سزا نہیں ہوئی۔

پنجابی: خالد فرہاد دھاریوال

غزلاں

ڈاکٹر عادل صدیقی
تجل کلیم
صابر علی صابر
صغیر تبسم

سہی ہوندا ہے کہ اخیر ی پل مرزا نہ پورا عاشق ہے نہ پورا راٹھ۔ بھراواں ٹوں ڈھال نہ
 بناون داہر کھ اوس ٹوں پورا عاشق نہیں رہن دیندا تے ناکلیوں گوی کدھن دی بھل
 اوس ٹوں پورا راٹھ نہیں بن دیندی۔ پر چیتے رکھے کہ مرزے دی وجودی بہتر دی دوہر
 تے دوہر دا اندر لا تناء ای انسانی پا تر دا تاریخی سچرا پن ہے جیہڑا بدلے ہوئے سماجی
 حالات دی لگھوں نکلیا ہے۔ مرزے دی شکل وچ نواں انسان پُرانے تے نویں دے
 ٹکراء وچوں بھٹی بے یقینی دا پرت دار زو پ ہے جس دا اگلا نقش اچو کا انسان ہے
 (مشتاق صوفی)

غزل

چیتوں و سرے چیتے چیتے اوندے نیں
سفنیاں ورگے منظر چیتے اوندے نیں

اپنے آپ توں دُوری وچ جو گزرے سن
سانوں اوہ دن اکثر چیتے اوندے نیں

جیڑے پتھر بندے رہے سن رستے دے
عشق دے اوہ وی پاتر چیتے اوندے نیں

واواں ہتھ سنیہڑے کیوں نہیں گھلدا اوہ
اوہنوں ساڈے جے کر چیتے اوندے نیں

یاد آوے جد سانوں عہد جوانی دا
اپنے دل دے جوہر چیتے اوندے نیں

رزق دی بھال اچ چھڈ دتا سی جہناں نوں
اچ اوہ کندھاں تے در چیتے اوندے نیں

جد سینے دے رازاں بارے سوچنا وال
عمروں ڈونگھے ساگر چیتے اوندے نیں

سچائی دی منزل دا مُل پے جاندا
جد رستے دے پتھر چیتے اوندے نیں

عادلّ معنے کھلدے فیر وچھوڑے دے
جس دم وچھڑے دلبر چیتے اوندے نیں

غزل

دوہراں، کھیس، سرہانے ونڈدی پھردی سی
اوہ نیندر نوں کھانے ونڈدی پھردی سی

کل تے شاہ وی دکھ پچھے نیں لوکاں دے
کل تے بھکھ وی دانے ونڈدی پھردی سی

کانی ونڈ دا دھڑکُو تے فر رہنا سی
رُت اُمرود جو کانے ونڈدی پھردی سی

راتیں اوہ ہسیا تے کلیاں کھڑ پیاں
فیر تے رات مکھانے ونڈدی پھردی سی

سوچ کلیم دی ایسے بُرے تاڑی گئی
کلی حرف سیانے ونڈدی پھردی سی

غزل

ایناں رج کے تکیا بھٹکھاں مر گئیاں
اج اک صورت ویکھ کے اکھاں ٹھر گئیاں

جد اک سُفنا کچی نیندر توڑ گیا
کیہ دساں فر یاداں کیہڑی کر گئیاں

اینا خوف لُچن دا سی ذہناں وچ
چکھے آؤندے ویرتوں بھیناں ڈر گئیاں

سُچے رشتے وی ہُن گُوڑے لگدے نیں
ماداں جو رُوڑی تے بچے دھر گئیاں

یار، کلیما مُر آیا تے انج لگا
دھراں دُہیاں ہوئیاں رقماں تر گئیاں

غزل

ایویں ہا سے ہا سے وچ
لکھ رہیا نہیں کاسے وچ

بڑیاں چوبھاں لگیاں نیں
اوہدے اک دلا سے وچ

اصلوں حدّاں ٹپ گئے آں
تولہ کھوٹ اے ماسے وچ

زہر عشق دا کھا ہدا اے
رکھ کے حُسن پتا سے وچ

مینوں پھول کے دیکھو تے
گھوہ اے اک پیاسے وچ

غزل

یاں تُوں سانوں جانوں چک لے
نہیں تے دُکھ جہانوں چک لے

یاں دھرتی توں رات مُکا دے
یاں سورج اسمانوں چک لے

مٹی نوں بس رہن دے مٹی
سارا زہر انسانوں چک لے

کندھاں سبھ برابر کر دے
اُکا فرق مکانوں چک لے

میرے لُوں لُوں پڑاں بھر دے
سارا درد جہانوں چک لے

جیہڑے پیار دے سینے وِجَن
ایسے تیر کمانوں چک لے

یاں ہن میری سُن لے ربا
یاں فر حرف زبانوں چک لے

بار رنگ

مهر ریاض
جاوید سکندر گلغام
ملک شفقت عباس شفقت
مزل حسین ناطق
قاسم شاه
طالب حسین طالب

سو بر خور داری صاحبانِ نویں سماجی باہر دا نچی اندر ہے تے نویں نچی اندر دا سماجی باہر۔
نویں اندر تے باہر نؤں سیندی پاڑ دی صاحبانِ عورت ہوند دا نواں تہہ دار روپ ہے
جیہڑا اوس نؤں پرانی عشقِ ریت وچ رکھ دیاں دوجیاں عاشقاں توں وکھرا ندا ہے تے
اس نؤں صنعتی تے صنعت مگر لی وسوں دا اگیتز نقش بنانا ہے۔
(مشتاق صوفی)

تینوں چھوڑ وُجھن دے بے دردا منصوبے ڈھیر بنا بہناں
 نہ بولنائے نہ ملنائے میں سے سے قسماں چا بہناں
 ملوم نہیں دل کے تھیندائے ہر آہٹ تے کن لا بہناں
 جداں نہیں بھدی بھاویں کچھ آکھو وِہلے روسے ریاض بنا بہناں
☆.....

دُکھ آندے رہندن ٹلدے رہندن جھٹ حوصلے نال کھیندائے
 توڑے جتنی کالی رات ہووے ہر حال سویرا تھیندائے
 گھبرا نہیں مُول شریکاں توں دل گردہ یار رکھیندائے
 جینوں کھوہ چ ریاض شریک سٹن اوہنوں مصر دا تخت دُھیندائے

○ جاوید سکندر گلفام

تُسیں بھل گئے اوسانوں وِسرے نہیں اوہ پیار پریت دے ویلے
 لُگ چھپ کھیند اوہ کالیاں راتاں اوہ ڈبھ اوہ کانہہ اوہ نیلے
 اوہ چھاں پپلاں دی رُسن مینوں اوہ چُگ چُگ کھاؤن دُہیلے
 گلفام میں رب دا شکر کریاں اللہ سگوسِ بجن جے میلے
☆.....

حق بجن دے بلی بلیاں نوں اوکھ اچ کدن چھڈیندن
 لُج پال تے راٹھ غریب بجن نوں بختاں دیاں ٹیکاں دیندن
 گلفام حلالی خون ہمیشاں لکیاں نوں توڑ چڑھیندن
 بدنسلے بھیر اچ بختاں دے متھے لُکن گناہ سمجھیندن

○ ملک شفقت عباس شفقت

میری ساندل بار سُہاگن دی شب نور سحر توں گھٹ نہیں
باہاں مار کے نیلے اچ لٹک کے ٹردی ٹیار وی حور توں گھٹ نہیں
ایہدی کاہاں دی مہک گلاب حنا مروا دے بور توں گھٹ نہیں
بنے شفقت قبر استھائیں شالا مینوں جھنگ کوہ طور توں گھٹ نہیں

.....☆.....

کیڈی گل ہا بجن منی پمدا چھڈ ویندیاں پوک جدائیاں
مینوں میلکھ توں ودھ کے پیار کریندا نہ سُن دا ڈھول پرائیاں
جیہڑے دینہہ مسکین تے توہیں چاڑھن کدی انج وی چاڑھن سائیاں
ہاسے شفقت راٹھ زمانے دے کنڈاں توہیں چا ڈھول لواٹیاں

○ مزمل حسین ناطق

ساڈی ناطق ڈیگرائے زندگی تے شہنائی دے راگ نوں کیہ کرناں
جیہندا ہور جہان بچ دینہہ چڑھیا اوس رات سُہاگ نوں کیہ کرناں
اج مرگیاں قبر تے زلف دی چھاں اساں ایس وراگ نوں کیہ کرناں
تیرے ساہاں دا سیک نصیب نہیں فردوس دے باگ نوں کیہ کرناں

.....☆.....

اللہ واسطے ناطق شکل دکھا میری اکھ بے نور ہوگئی ہئی
تیتھوں نکھر کے چنگی بھلی وسدی دنیا میرے کان تندور ہوگئی ہئی
تیرے وانگ تیری تصویر وی اجکل میتھوں سو کوہ دور ہوگئی ہئی
ساری رات رویندی اے بولدی کائی نہیں اُکا انج مغرور ہوگئی ہئی

تیرے نال سلام دعا رکھ بیٹھاں کسے موڑ تے لادھ کرائیں نہیں
اکھیاں دے تخت ہزارے وچ کوئی رنگ پور ہوو سجائیں نہیں
ہجر دے تھل اچ او جھڑ گھت کے ونج کہیں دا کچھ وسائیں نہیں
کدی سک دے تار چہاں اچ قاسم سنگت دی موت دکھائیں نہیں

.....☆.....

کسے دور اچ ناگ لتاڑ کے ملناں ٹساں چیر کے بیلے کاہاں دے
نہ ڈرنا کالیاں راتاں توں ہائے عادی سُجیاں راہاں دے
پیا ذری ہک فرق دیہاڑیاں نوں گئے بدل مزاج ٹساہاں دے
اچ چٹے دینہ نہ سنجیندے بندے انج تاں ناہن چھہاں دے

○ طالب حسین طالب

لکھاں سجن بنا پر ویکھیا کر کوئی چیز معیار وی ہوندائی
ڈھلی دیگر حسن دی نگری دا کدی بند بازار وی ہوندائی
چنگے سجن کھڑا کے جیندیاں وتناں کجھ کجھ دشوار وی ہوندائی
جیڈا طالب کوئی مجبور ہووی او توں ودھ خوددار وی ہوندائی

.....☆.....

اودوں کوئی نہوں تخت طاؤس ڈھیا مینوں نت سنیدا رہندائے
میرے امن دا عادی نکی نکی گل توں اودے نت جھڑکیندا رہندائے
تیتھے نت بے جا پابندیاں سُن کے میرا جگر چریندا رہندائے
بندے دسیدن طالب مہنیاں وچ تیرا پیار پُنیندا رہندائے

ایس توں اگانہہ رُدا بر خوردار سے وِچ بنے ایہناں جوڑاں دے سبھاؤں ٹھوس ڈھنگ
 نال کھوجدا ہے تے اپنی کھوج راہوں آ پسے جوڑاں دی بنیاد وِچ پئی مُڈھلی خرابی ئوں بناردا
 ہے۔ مُڈھلی خرابی ایہہ ہے کہ جی، خاندان، وسوں تے قدرت دا آپسی رشتہ ایسا نہیں رہیا
 کہ جیون دیاں رنگورنگ دکھالیاں ئوں اک وڈی جُڑویں اکائی دی شکل وِچ سہار کے چلا
 سکے۔ سو جیون دی بنیاد کھنڈ گئی ہے۔ کھنڈ ویں حالت دی کایا پلٹی لئی بر خوردار مرد تے
 عورت دی نویں جُوت دا خاب بُندا ہے جیہڑا پرانی رسم ریت دے ورتارے توں ازاد،
 سحرے جی، سحرے خاندان تے سحری وسوں دی بنیاد رکھ سکے تے قدرت نال قدرتی تال
 میل بنا سکے۔

(مشتاق صوفی)

توارخ

منظور اعجاز
لال سنگھ گیانی

سوال ہو سکدا اے کہ جو کیہ قصے نوں پرکھن دی کسوٹی ٹھوس حیاتی ہے یا خاص حالات
 وچ بنی کوئی اچھی وچار دھارا؟ کسے وی وچار دھارا دے تلتیوں قصے دی پرکھ پرچول ہو
 سکدی ہے پراجہی پرچول سمجھن جانن دی اک اگلی بنیاد نہیں بن سکدی کہ حیاتی دا گل
 کدی وی کسے اک سوچ ڈھنگ یا وچار دھارے دی دور بین وچوں پورا نظر نہیں آ
 سکدا۔ صوفی تے انقلابی وچار دھارا دے ڈھلے مٹھے ولدے دے باوجود بر خوردار دا قصہ
 ہُن تاں ساڈی انسانی ترنگ دی زوردار لُک ہے۔

(مشتاق صوفی)

توتے بولن بار دے تے ونیں جھنگارن مور

دھاڑوی تے بستی وادی کسے وی دھرتی دے مہاندرے تے ماحول داناس مار سکدے ہن۔ کئی کھوجاں نے ایہہ نتاریا ہے پئی کیویں یورپی بستی وادیاں نے امریکا دے نوں انگلینڈ وچ آؤن تے اوتھے دے ماحول تے فطرتی دیہاراں نوں بدلیا۔ ماڑے بھاگ، جے پنجاب تے ایہو جیہی کھوج ہوئی وی ہے تے اوہا حالے تیکر کھرا نہیں لہدا۔ ہور کجھ نہیں تے گھٹو گھٹ انسانی بدھوتی تے ہوند دے ایس اہم موضوع تے کجھ نہ کجھ پرکھ پڑچول ہونی چاہیدی ہے۔ ہر رکھ، جھاڑی یاں بوٹے دے نال فطرت تے بندے دے ورتاء دا پورا پچھوکڑ جو یا ہو یا ہے۔

پنجاب دی دھرتی بارے اپنی ہنڈھی ورتی توں شروع کراں تے بستی واد دے زمانے توں نیڑے تیرے 35 ورہے مگروں 1950-60 دے دہاکیاں وچ وی واہی نیجی والی بھونیں دے وچ وچ کدھرے ایہو جیہے بھونیں دے ٹوٹے وی سن جیہڑے اپنی اصلی ہوند دی دس پاؤندے سن۔ یاں فیر گھٹو گھٹ پنڈاں تھاواں دے باہر پیلیاں تے پنڈ دے وچلی و تھ تے وی بستی وادی زمانے توں پہلاں دے رکھ تے جھاڑیاں اُگیاں ہوئیاں سن۔ کئی پنڈاں وچوں دی لنگھدا جدوں میں اپنے مربے یاں سکول جاندا سی تے بستی وادیاں دے لائے رکھاں دے نال نال اوس دھرتی دے اپنے اُگائے رکھ وی نظر آؤندے سن۔

جیویں ای میں اپنی گلی دی ٹکڑ مڑدا سی، اک اک دا بوٹا متھے لگدا سی جیہدے بارے بڑیاں عجیب کہانیاں بنیاں ہوئیاں سن۔ بستی وادی زمانے وچ وسے پنڈاں وچ پیلیاں تے پنڈ دے وچکار سکھنی بھونیں انگریزاں نے ایس لئی چھڈی ہوندی سی پئی جے پنڈ وچ

وادھے دی لوڑ پوے تے اوہنوں ورتیا جاسکے تے ایس بھونیں اُتے ایسھوں دے مقامی رُکھ جیو پں کرمی (کریر) ککر تے جنڈ اُگے ہوندے سن۔ اک تے کریر تے بڑے سوہنے نکلے نکلے پھل لگدے سن۔ ایس توں آل دوالے ہور وی نکلیاں نکلیاں جھاڑیاں تے بُوٹے ہوندے سن۔ ایہناں پرانے رُکھاں وچ وَن، پیلو، بوہڑ تے پتل ہوندے سن۔

پیلیاں وچ اُکا ای ہور طرحاں دے ٹاہلی، ٹوت، شہتوت، نم، دھریک تے ہور کئی دوجے رُکھ ہوندے سن۔ میرے گھر دے پچھواڑے جتھے مجھاں گائیاں دا واڑا سی، شریہہ دے دووڈے وڈے رُکھ سن تے ایہناں دے نال پتل، لسوڑا تے لکرسن۔ ایس تھاں جیہوں ڈیرہ آکھیا جانداسی، تے چھتری وانگوں رُکھاں نے چھاں کیتی ہوئی سی۔ میرے پیو نے پانی دی تلاء دے نیڑے گلاب تے ہور دوجے پھل اُگائے ہوئے سن۔ فیراک کئی جیہی بچھی سی جیہدے وچ امب، نمبو، جامن، مٹھے تے کھٹیاں دے بُوٹے سن۔ ساڈی بھونیں تے ککر تے بیراں توں اڈایہہ سارے بُوٹے ای اوپرے سن۔ ایہہ بستی وادیاں اتے اوہناں دیاں نہراں دے پانی نال اتھے آئے سن۔

ایہہ نویں رُکھ اونا چرای جیوندے سن جتنا چرایہناں نوں برابر پانی ملدا رہندا جدوں کہ ایس دھرتی دے اپنے رُکھ لے سوکے یاں تے وچ وی لما چر جیوندے ہن۔ مینوں ڈر ہے پئی جے کدے سوکا آ جاوے یاں دریاواں دا پانی ڈکيا جاوے تے کال پئے جاوے گاتے علاقہ ریتڑ بن جاوے گا۔ تاریخ، اچیچا سندھ وادی دی تاریخ نوں ویکھدیاں اسیں آکھ سکدے ہاں پئی جدوں وی دریاواں نے پاسہ ماریا، واہی نیچی والے ساوے علاقے بخر ہو گئے۔ ایس بھونیں تے بڑی بھرویں کھیتی ہوندی رہی ہوئی اے تے اتھے دالاں، کپاہ تے دوجیاں فصلاں ہوندیاں رہیاں ہن۔ ایہدے توں دس پیندی ہے پئی یاں تے اتھے دانہری نظام بڑا ودھیا رہیا ہے یاں فیر گھنے جنگلاں پاروں مینہ بھرواں پیندا رہیا ہے۔ سکندر بادشاہ جیہدی دنیا نوں فتح کرن دی مہم پنجاب وچ ای مکی سی نے وی اتھے کپاہ دی فصل ہون دی دس پائی ہے۔

رگ وید موجب سرسوتی دریا ستلج تے جمنا دے وچکار وگداسی۔ کھوجی راجستھان تے پاکستان دے علاقے تھروچ ایس دے وگن دے نشان بھالدے پئے ہن۔ تھردیپ ناں

دی اک این جی اونے تھر دے وچکار پانی دی ہوند دی کھوج کیتی ہے تے وچار ہے پئی ایہہ
 اوہوای پرانے سرسوتی دریا دی رہند کھوہند ہے جیہڑا ایس ریتڑ دے وچکار آکے سک گیا سی۔
 جدوں میں اوس تھاں تے گیا سی، تھر دیپ دے وڈے افسر مینوں دسیا پئی اتھے دی مقامی
 لوکاں نوں بڑا پک ہے پئی اتھے کدی پانی دا بھرواں ذخیرہ رہیا اے۔ خورے ایس گواچے
 دریا دیاں یاداں ایہدے آل دوالے رہندے لوکاں دے چیتے دا اک انگ بن گئیاں۔

بھورا کاہل نال بے اگانہہ ودھینے تے اوس تھاں اپڑیئے جتھوں مسلماناں دا پنجاب
 وچ آؤن دا زمانہ شروع ہوندا اے تے اسیں اپنیاں ایہناں لکھتاں وچ اوس دی ہی گل کر
 رہے ہاں، ایس علاقے دے ماحول بارے کوئی ٹھکویں جانکاری نہیں لہدی۔ ایس لئی سانوں
 ول ولا کے دو بے وسیلیاں جیویں لکھتاں، تاریخ، یاداں تے ہتھلی معاشی جانکاری دا لڑ پھڑ
 کے ای ٹرنا پوے گا۔

بارھویں صدی عیسوی وچ پاکپتن وچ گزرے صوفی شاعر بابا فرید نے اپنی شاعری
 وچ ون دے رکھ دا کئی واری ناں لیا ہے تے نال ای گندلاں، ہنگ، کتھوری، شکر، کھنڈ، گڑ،
 ماہی، ماجھا دُده، ڈھڈ (بھڑا) کنڈا، داکھ، ککر، اُن تے پٹ دی وی گل کیتی ہے۔ اک شعر
 وچ اوہ آکھدے نیں پئی ویلے دے حاکم کھنڈ، شہد تے مجھاں دا دُده ورتدے نیں۔

خواجہ نظام الدین اولیاء اپنے چیتے نوں پھر ولدے ہوئے لکھدے نیں پئی بابا فرید
 دی درگاہ تے بہتا ڈیلے اُبال کے ٹیر، پڑھیاراں، درویشاں تے دو بے پروہنیاں نوں کھوائے
 جاندے سن۔ ڈیلے بار دے ایس گھنے وچ واہوا ہوندے سن۔ خواجہ نظام الدین دی لکھت توں
 ایہہ نتر دا ہے اجودھن (پاکپتن) ورگا شہرانج دے رکھاں تے جھاڑیاں وچ گھریا ہو یا سی تے
 عام لوکاں کی سوکھیاں ای او تھے اپڑوی جاندی سی۔ ایہدے توں ایہہ وی دس پیندی ہے پئی جنگل
 اوس ویلے دھاڑویاں نے جنگلاں دی وڈھ ٹگ وی نہیں کیتی سی جیہدے پاروں مقامی لوکاں
 بھیڑے ویلیاں وچ دی قدرتی پھلاں نال ڈنگ ٹپالیندی سی۔

جاپدا ہے پئی دکھن توں کئی نسلاں دے دھاڑویاں تے اُبھے توں راجپوتاں تے
 ہور ناں دے دھاڑیاں توں پہلاں لہندے پنجاب دے کجھ حصیاں وچ مقامی لوکاں دی
 گذران بہتا قدرتی وسیلیاں تے شکار تے ای ہوندی سی۔ چڑھدے وچ وائی بیجی حیاتی

لنگھاؤن لئی وڈا وسیلہ سی جتھے بھوئیں زرخیزی۔ بھوئیں پٹھاں پانی بہتا ڈونگھا نہیں سی تے مینہ وی بھروں پیندے سن۔ ضیاء الدین برنی نے اپنی چودھویں صدی دی 'تاریخ فیروز شاہی' وچ اوہ مل وی دسے ہین جیہناں تے دالاں، کھنڈ تے لون لہورتے آگرہ دیاں منڈیاں وچ وکدا سی۔ ایہدے وچ اوہنے غلاماں دے مل وی دسے ہین: اک چنگے نسلی گھوڑے بدلے گھرو کی کم کرن والیاں 20 زانائیاں، 5 لونڈیاں یاں سوہنے نڈھے، 10 کاریگر غلام تے 12 عام غلام بندے خریدے جاسکدے سن۔

ایہہ تے پکی گل اے پئی ہندوستانی تے دکھن ولوں آئے دھاڑ ویاں نے دراوڑی بولن والے مقامی تے قدیمی لوکاں نوں غلام بنا لیا تے جنگلاں اتے وسیہلی بھوئیں تے مل مار لئی۔ ایہناں نویں حاکماں وچ جیہناں نوں وارث شاہ دے کہن موجب جٹلے آکھیا جاسکدا اے، جٹ، راجپوت، کچھ ارائیں، سید تے قریشی سن۔ نویں مل ماراں نے کچھ علاقیاں وچ ڈنگراں دی چروالی تے کچھ وچ واہی نیچی سانجھ لئی۔ مثال دے طور تے وارث شاہ دے قصے 'ہیر رانجھا' وچ رانجھا واہی نیچی سماج داسی تے ہیر چروالاں دے قبیلے دی سی۔

مقامی لوک یاں تے غلام بن گئے یاں فیر کئی طرحاں دے پکھی واس۔ اوہناں وچوں کچھ نیں لوکاں نوں پرچاؤن دے پیشے پھڑ لئے جیویں بازی گری، کھڈونے بناؤنا، تھیٹر، سنگیت، شجرے سانجھن، تاریخ سناؤن تے وڈیریاں دے قصیدے پڑھنا وغیرہ۔ کچھ قبیلے پُری واس سداؤن لگ پئے تے صدیاں توں تھیں تھیں پھر دے تے منگ پڑن کے یاں چوریاں کر کے گذران کردے۔ کچھ اک نے مُردار کھانا شروع کر دتا جیہدا کارن ہندو جٹاں ولوں شکار اتے ڈنگراں نوں مارن دی منائی ہوسکدا ہے۔ ڈنگر چوری دا پیشہ دھاڑ ویاں ولوں قدیمی لوکاں نوں اوہناں دیاں تھاہراں توں وانجھا کر کے کڈھن پاروں ہوند وچ آیا جا پیدا اے۔ کچھ وسیہیاں وچ جتھے بند تے کاریگری نال چوری کرنا مان دی گل سمجھیا جاندا اے۔ ایہدا کارن مقامی لوکاں دی بھوئیں کھس جان پاروں اوہناں وچ کرودھ ہوسکدا ہے۔ ایہہ اک وکھری گل اے پئی چوراں دے جتھیاں نوں طاقتور جاگیرداراں دا تھا پڑا ہوندا سی تے اوہناں نوں 'رسہ گیر' آکھیا جاندا سی۔ پچھلے ورھے بار دے اک مشہور رسہ گیر 'پناہ رجوکا' نے 'وچار ڈاٹ کام' نوں اک انٹرویو دتا سی (ایہہ انٹرویو ایس لنک تے پڑھیا جاسکدا ہے) جیہدے وچ

اوبدے کولوں وچار ڈاٹ کام نے سوال پچھیا سی پئی لوکی اوبدے رسہ گیری دے پٹیشے نوں
کیوں ویکھدے نیں؟ اوبدا آکھنسی پئی 'ساڈے لوکاں لئی رسہ گیری ودھیا کم ہے تے
دوجیاں لئی بھیڑا کم ہے۔'

ایہہ وی حیرانی جوگ گل ہے پئی مگر لے قدیمی لوکاں نے جاگیر داری زمانے وچ
وی کلاء تے سوجھ دے کماں وچ پٹھلے میل وچ رہندیاں ہوياں بھرواں سیر پایا۔ پاکستان
دے مشہور سنگیت کاراں تے کلاکاراں وچوں بہتے ایس میل وچوں ای ہن۔ اچھا پیند و نوک
تھیڑ تے دوجے دل پرچاؤن دے پیشیاں تے دراوڑی بولن والیاں دی سرداری ہے۔ پنجاب
دے جاگیر داری اتے دھاڑوی وسیب دے مقابلے وچ ایہناں قدیمی لوکاں دی ایس انوکھی
سوجھ اتے کلاکاری دا کارن لکھن لئی بھرویں کھوج لوڑیندی ہے۔

مقامی لوکاں اتے اوبدی بھوئیں تے مل ماری نے ایہہ سماجی ماحول بدلایا ہونا اے۔
پرلہندے پنجاب دی دھرتی جیہوں باردا علاقہ آکھیا جاندا ہے، وچ انگریز بستی واددے زمانے
تیکر کوئی مڈھلی بدلی نہیں سی آئی۔ لوک سوکے تے ہور مندے حالاں وچ وی بتا سار لیندے سن
کیوں جوڑکھ تے جھاڑیاں جیوں جوگا کھا باتے دیندے ای سن۔ ایس توں اڈ باردا علاقہ
شکاری کچھواں تے ڈنگراں نال بھریا ہويا سی۔ وارث شاہ نے ہیر تے اوبدیاں سکھیاں نوں
'ہریناں دی ڈار' نال رلایا ہے۔ اُنیویں صدی وچ میاں محمد بخش دے زمانے وچ پنجاب وچ
ہرناں دی گنتی بڑی بھرویں سی تاہیوں اوہناں لکھیا 'مگر شکاری کرے تیاری بار چریندیا
ہرناں'۔ ایسے طرحاں ای مرزا صاحبان دا قصہ جوڑن والے عظیم شاعر پیلو نے بار دے موراس
تے توئیاں بارے لکھیا ہے، 'توتے بولن بار دے تے ونیں جھنگارن مور'۔ بار دے کچھلی اک
صدی وچ مک مکا گئے کچھواں، ڈنگراں تے درندیاں بارے لکھن لئی تے کاغذاں دے تھبے
دے تھبے لوڑیندے نیں۔

کئی ورھے پہلاں اک انگریز ڈاکٹر جے ایل سٹیوارٹ جیہنے پنجاب دے جنگلاں
دی سانجھ لکیتی، نے 270 صفحیاں دی اک کتاب لکھی سی جیہداسرناواں ہے "پنجاب وچ اُگن
والے وڈ ملے رکھ جھاڑیاں تے جڑی بوٹیاں"۔ اوہنے 57 صفحیاں دا پنجابی وچ اک ویراوی
دتا ہے جیہدے وچ اوہ ہزاراں رکھ نیں جیہڑے پنجاب وچ اوہنے اکھیں ویکھے سن۔ ہزاراں

رُکھ اوہدی لکھت وچوں رہ وی گئے ہوون گے کیوں جو اوہ تے وڈ ملے رُکھاں دی ہی گنتی کر
رہیاسی۔

پنجاب دے ماحولیاتی نظام داناس تے انگریز توں بہت پہلاں ای وجنا شروع ہو
گیا سی پرستی واد نے ایہنوں اپنی چھیتی برباد کیتا پئی بابا فرید یاں خواجہ نظام الدین اولیاء نوں
اج اوہدا اک تیل وی نہیں لیکھے گا۔ ہرکھ دی گل ہے پئی پچھلے چار دہاکیاں توں انھے واہ معاشی
ترقی نے پنجاب نوں لوہے جری دا جنگل بنا چھڈیا ہے جتھے ماحول دی بربادی نے بھوکس دا
مہاندرہ وگاڑ دتا ہے۔

(وچار ڈاٹ کام دے شکریے نال)

ون تے جنڈ کریر دی گئی مُک حیاتی
حکم ہويا قلام دا ویکھ قدرت ذاتی
روون ڈھاہیں مار کے اوہ دینہہ تے راتی
کیوں سر ساڈے آ گئی ایہہ کاتی
گہیاں اتے گہاڑیاں آ پائی جھاتی
تیر کیچے رُکدا ورم وچ چھاتی
کنیں ول باجھ خُدا دے لکھ پایے پاتی
اگئیں لا کے ساڈ دے کر دین چواتی
سگری ڈیہلے پیل دی گل گئی گواتی
(غلام مرتضیٰ شاہ)

سورم گتی دی ریت

ویدی عہد

پراچین (پرانے پنجاب) دے سماجی تے ثقافتی کھلا راتے لوکاں دے جیون بارے
 جانکاری دین والی سبھ توں پہلی کتاب ”رگ وید“ ہے، جو پنجاب وچ ہی رچی گئی سی۔ بھاویں
 ایہدے وچ دتے سماچار پراچین عہد دے ہن، پر مورخاں دا خیال ہے کہ ایہناں نوں لکھتی
 روپ دو ہزار قبل مسیح وچ ملیا، جیس کر کے اوس سہ دے صحیح جیون دا روپ پیش کر دے ہن۔
 ”رگ وید“ دے تجزیے توں جا پدا ہے کہ اوس ویلے انتہائی ترقی یافتہ شہری ثقافت پینڈو ثقافت
 دیاں سٹاں پٹھ دم توڑ رہی سی۔ ویلا پاکے ودھیرے مہذب شہری لوک جابر ہو گئے سن تے
 اوہناں نے پینڈواں دی لٹ کھسٹ شروع کر دتی سی۔ جد ایہہ زور ظلم اسہہ ہو گیا، تاں پینڈو
 لوک اُتر ول دے پہاڑی لوکاں دی مدد نال شہریاں دی جابر گھٹ گنتی دے وردھی اٹھ
 کھڑے ہوئے تے اوہناں نے ایہناں دا خاتمہ کر دتا۔ ”رگ وید“ وچ شہریاں تے پینڈواں
 دی ایسے مٹھ بھیڑ داتے پینڈواں دی جت دا ورنن ہے۔ ایہہ سارا سماج دھاں تے ویرتا دا سما
 ہے، جیہدے وچوں جوانی دے جوش، مردانگی، درڑھتا تے شکتی دی بھلک پیندی ہے۔
 بھاویں ایہدے وچ بہتا کر کے سُرگ لوک دے دیوی دیوتیاں اندر، وایو، مروت وغیرہ دا
 ورنن ہے، پر دیوتیاں نوں وی مات لوک دے سُر بیراں دا رنگ روپ دتا گیا ہے، جو رتھاں
 تے چڑھ کے رن بھومی وچ بتر دے تے اتھاہ جوش نال تیراں دی ورکھا کر دے ہن۔ ایہناں
 دیوتیاں دے ورنن توں ہی اسیں پنجاب دے بہادر جواناں دا نکھ شکھ تے چہرا موہرا ویکھ
 سکدے ہاں۔

”رگ وید“ وچ اندرونوں دیوتیاں وچوں شرومنی تے اوہناں داراجا دسیا گیا ہے۔
 اوہ اک جماندرو جودھا ہے تے بڑا بلوان اتے پھرتیلا ہے۔ اوس دا سریر رشت پُشت تے
 بھارا ہے اتے سارے انگ گٹھے ہوئے ہن۔ تیرکمان تے سخت دھات دے پتھر ورگے
 کرڑے وجر اوس دے شستہ ہن۔ وایو دیوتا اوس دا رتھوان ہے، پر آپ وی بڑا پُسن رتھ
 واہی ہے۔ اوس دے حملے دھرتی نوں کمباندے، پہاڑاں نوں ہلا دیندے تے قلعیاں نوں
 پُور پُور کر دیندے ہن۔ اوہ سوم رس (شراب) دا رسیا تے انتاں دا بھوگ ولاتی ہے۔ اوس
 دے کول گٹواں، مہیاں گھوڑے تے بے انت دھن ہے، جیسیں نوں اوہ دوہیں دوہیں
 ہتھیں اپنے شردھالواں وچ وٹدا ہے۔

اندرتوں بناں ہور دیوتے وی ایسے طرح دے جودھے تے لڑاکے وکھائے گئے
 ہن۔ دیوتیاں دے ایس بیان توں اسیں اوس سہ دے پنجاب دے ویر سماج دی پوری تصویر
 کھچ سکدے ہاں۔ ایس سماج دی واگ ڈور گٹھے ہوئے انگاں تے ہٹے کٹے سریراں والے
 سہیلے تے سندر جودھیاں دے ہتھ وچ سی۔ اوہناں دے سر اُتے کیس تے مُونہ اُتے داڑھی
 چھاں سن۔ اوہناں دے سریر چمکیلیاں زراں نال ڈھکے ہوئے ہوندے سن تے اوہ سر اُتے
 لوہ ٹوپ پاوندے سن۔ ایس توں چھٹ اوہناں نے سونے دیاں ہار ہمیلیاں، جھانجراں تے
 ہور گہنیاں نال سریر سجاون دا شوق سی۔ اوہ بڑے شاندار رتھاں وچ چڑھدے جاں گھوڑیاں
 دی سواری کردے سن تے لڑائی وچ تیرکمان، لٹھاں، گنڈاسے، برچھے نیزے تے وجر وغیرہ
 شستہ ورتدے سن۔ اوہ کھان پین دے بڑے دھنی سن تے بھاری ماترا وچ شراب، ماس،
 دودھ تے اناج وغیرہ چٹم کر جاندے سن۔ اوہ جیون نوں راج کے مانن اتے کھاؤ پیو موج
 اُڈاؤ، دی وچار دھارا وچ یقین رکھدے سن۔ رتھاں دی دوڑ، گھوڑ دوڑ تے سنگیت اوہناں
 دے مکھ پرچاؤے سن۔ بھیانک تے دلیر جودھے ہون دے نال نال اوہ ہتھ دے کھلے،
 سکھی، دانی، دیاوان تے چنگے پراہون چاروی سن۔ اوہناں دا مکھ کرتا شہراں اُتے قبضہ کرنا،
 اوہناں دے وسنیکاں نوں لُٹنا تے قتل کرنا، مال ڈنگر پُرانا تے ایہناں نوں اپنے پھلگاں تے
 ساتھیاں وچ وٹنا سی۔ اوہ اپنے ڈھاڈھیاں، مداحیاں تے ہور سوالیاں نوں رجواں دان
 دیندے سن۔ لچڑ پئے تے شوم پئے، سودخوری تے دھن جوڑن نال اوہناں نوں بہت زیادہ چڑ

سی، ایس لئی اوہ حساب کتاب تے گنتیاں مہتیاں وچ نہیں پیندے سن۔ اوہ سدا چڑھدیاں کلاں وچ رہ کے ایس جیون دے سکھاں تے خوشیاں نوں رج کے ماندے سن۔ اوس سے دے پنجابی دُنیاوی کماں دے نال اپنے مذہبی کرم دھرم وی آپ پورے کر لیندے سن۔ ایس لئی اوہناں وچ سپاہیاں، چُجاریاں کوپیاں تے سنگیت کاراں وغیرہ دا کوئی وکرانہ نہیں سی۔

ویدی کال دا سماج قبیلیاں وچ وٹھیا ہویا سی۔ قبیلے دے وڈیرے جاں سردار نوں راجن کہندے سن۔ راجناں دی اگوائی پٹھ قبیلے آپو وچ لگا تار لڑدے رہندے سن۔ سماپا کے کئی بلوان قبیلے وڈے وڈے راجاں وچ بدل گئے تے شاستر دھاری لڑاکیاں دا اک وکھرا گروہ کشتری جم پیا۔ پر ایس دا مطلب ایہہ نہیں کہ کشتریاں توں بناں ہور طبقے جُددھ وچ حصہ نہیں لیندے سن۔ سگوں برہمن، ویشاں تے شودراں دیاں وی کئی فوجی وستیاں سن اتے لوڑ پٹن اُتے ساری دی ساری قوم جنگ وچ کد پیندی۔ اصل وچ اوس سارے سماج اُتے لڑائیاں جھگڑیاں، مارگٹ تے کٹ وڈھ دا ماحول بنیا ہویا سی۔ لوکاں دے کناں تے ہر ویلے رتھاں دے چلن دی کھڑکھڑاہٹ تے گھوڑیاں دی ہنہناہٹ گونجی رہندی سی تے ایہہ اوہناں نوں ویرتا دے سچے وچ ڈھال دی سی۔

ویرتا دے اُتلے پچھو کڑ بارے ویداں وچوں ہی سانوں اک ہور گل پتہ لگدی ہے۔ کئی وید منتراں توں ایہہ جا پدا ہے کہ پنجابی سورما چواہاں پاسیاں توں بلوان دُشمنناں نال گھریا ہویا ہے۔ اوہدے سارے کارج وچار ویریاں دا بی ناس کرن اُتے مرکوز نیں۔ اوہ دُشمنناں دا گھراکھوج مٹاؤن لئی دیوتیاں کولوں ور۔ دان منگدا دسدہا ہے۔ جا پدا ہے کہ کئی ہزار سال بعد مغل راج دے سسے پنجابیاں لئی اوہو جیہے حالات پیدا ہو گئے سن۔ ایس لئی گورو گوبند سنگھ جی نے اکال پُرکھ توں ایسے طرح دا ور۔ دان منگیا۔

ہم رے دُشٹ سبھ تُم گھاوہ
آپ ہاتھ دے موہ بچاوہ

سبھ بیرن کو آج سنگھریے
چُن چُن ستر ہمارے ماری ایہہ

اوس سے عام طور تے فوج دے دو ہی طبقے سن ___ اک پیادے تے دوجے
 رتھاں والے ___ ہاں، کتے گھوڑ سواری دا وی حوالہ ملدا ہے۔ کیگی (Kaegi) نے ویدی کال
 لڑائی دی وِرش ایوں بیان کیتی ہے:

”جد دُشمن آریہ دیاں سرحدیں دے نیڑے پہنچدا ہے، تاں اگے مٹی
 دیاں کندھاں کھڑیاں کردتیاں جاندیاں ہن، لکڑی دے تختیاں نال
 مورچہ بندی کیتی جاندی ہے تے کہہ دے الگھ پُشتے بندھ دتے جاندے
 ہن۔ ایس توں چھٹ دیوتیاں توں مدد لین لئی اوہناں دے اگے بلی
 دتی جاندی ہے۔ پھیر فوج اُچی اُچی جنگی گیت گاوندی جھولدے نشان
 لے کے سوندھیاں تے بلاگاں دی گھنگھور وچ اگے ودھدی ہے۔ جو
 دھارتھ دے کبے پاسے رتھوان دے کول کھلوندا ہے۔ اوس نے پتل
 دی زرہ تے لوہا ٹوپ پایا ہوندا ہے۔ اوہ اپنی کمان وچوں سنگ جاں
 دھات دیاں زہریلیاں نوکاں والے تیر چھڈدا ہے تے پھیر نیزہ،
 برچھا، گنڈا سائے گلیل پھڑکے اگے ودھدا ہے۔ پیادے نیڑے
 نیڑے پنڈ وار جاں قبیلے وار قطاراں وچ کھڑے ہوندے ہن۔ جت
 ہون دی صورت وچ سوندھیاں دی گھنگھور وچ خوشیاں منائیاں
 جاندیاں ہن تے شکرانے وجھوں دیوتیاں نوں بلی دتی جاندی ہے۔“

ویر کال تے بھاگوت گیتا

ویدی عہد دیاں لگاتار مٹھ بھیراں، ٹکراں تے مہماں توں بعد پنجاب وچ جیس ویر
 سماج نے جنم لیا، اوس دی گجھ جھلک اسیں اوس سے وچ لکھے گئے عظیم رزمیہ ”مہا بھارت“ وچوں
 ویکھ سکدے ہاں۔ پنجاب دے جمیاں نوں نت مہماں والی گل ایس عہد وچ وی اوئی ہی ٹھیک سی
 جنی ویدی جگ وچ۔ ایہہ ساسد یوی لڑائیاں بھڑائیاں دا جگ جا پدا ہے، جیہدے وچ ویر جوان
 لڑائیاں مل لیندے ہن۔ ٹاکرے دے موقعے بھال دے ہن تے وودھیاں نال دودھ تھ کرن
 لئی اُتاو لے ہن۔ ایس عہد وچ سورے دا آدرش جت جاں موت ہے۔ اوس دے خیال وچ جت

نال ایس دُنیا وچ شہرت، جس تے سکھ ملدا ہے تے مرگ دی حالت وچ سُرگ وچ سد یوی سکھ دی پراپتی ہوندی ہے۔ ایس عہد دے جودھے رن بھومی وچ ہوئی موت نوں ودھائی یوگ تے بسترے وچ ہوئی موت نوں گھور پاپ سمجھدے ہن۔ دُر جودھن تاں ایہتوں تک کہہ دیندا ہے کہ جو پُرش روگ گرسٹ ہو کے مردا ہے، اوہ منکھ ہی نہیں۔

قدرتی طور تے ایس سماج وچ برہمن پجاری کچھ رہ گئے سن تے کشتری سورمیاں دی مانتا ودھ گئی سی۔ جودھیاں دا بول بالا ہو گیا سی تے اوہ برہمنوں دا گھمنڈی وتیرہ برداشت نہیں کر دے سن، جیویں راجا یا پاتی دی کشتری رانی اپنی برہمن سوکن دیوانی نوں کہندی ہے، ”تہاڈا برہمنوں دا کم تاں راجیاں دی تعریف کرنا ہی رہ گیا ہے۔“ پر ایس جگ وچ طبقیات دے بندھن ایسے کر ڈے نہیں سن تے ہر طبقے دے لوک وار وار اپنا کتا بدل دے رہندے سن۔ صرف برہمن ہی کھتری جاں کھتری ہی اپنا کتا بدل کے برہمن نہیں بن سکد اسی سگوں ویش وی برہمن جاں کھتری بن سکدے سن۔ ”مہا بھارت“ وچ تاں برہمنوں دا شودر بن جانا وی ممکن منیا گیا ہے۔ برہمن اوہ ہے جو سکھی، دانی، سچیا تے ماف کرن والا ہے۔ اتے جنم دے شودر وچ وی ایہہ گن ہن تاں اوہ وی برہمن ہے۔ ایہو جیہا لک دار سماجی ڈھانچہ ویرکال دیاں لوڑاں دے عین مطابق سی۔ جد کہ لڑنا بھڑنا لوکاں دا منکھ کتا سی تے جد ہ وچ نپٹنا کسے پُرش نوں وڈنتا دے اہل بنا دیندی سی۔

ایس عہد وچ انفرادی بہادری نوں ودھیرے مانتا پراپت سی۔ سُرے اپنی جت وچ اہل نشیما رکھ کے منے پرمنے سورمیاں نوں لڑائی لئی ونگار دے سن تے اپنے نالوں نیویں جاں کمزور نال لڑنا ہتک سمجھدے سن۔ ”مہا بھارت“ دی لمی لڑائی وچ جیہدا ویرا اسیں اگے دیواں گے، بہتا حصہ انفرادی مقابلیاں دا ہے۔ ایس عہد دے سُرے بھاویں اموڑ، اکھڑ کھاند تے ہلڑ باز سن، پر عام طور تے جد ہ دے منے پرمنے اصولاں تے ضابطیاں دا پالن کر دے سن۔ ”مہا بھارت“ وچوں پتہ لگدا ہے:

”جد ہ شروع ہون توں پہلاں یڈھشٹر تے اوس دے ساتھی بناں
کسے شستر جاں زرہ دے ننگے پیریں چل کے بھیشم پتاما دے تمبو وچ
گئے۔ اوہناں نے آوندیاں ہی اوس دے چرنیں ہتھ لایا تے اوہدے

کولوں اشیر واد مٹکی۔“

ویر کال وچ پنجاب دے جواناں دا مُڈھلا کتا جُده کرنا سی، ایس لئی اوہناں نوں بچپن توں ہی جنگ دی سکھلائی دتی جاندی سی۔ جنگلاں وچ ریشیاں منیاں دے آشرم، سیاسی، مذہبی تے دُنیا داری دی سکھیا دین توں چھٹ فوجی اکادمیاں وی سن، جیہناں وچ نوجوان لڑکے جنگی کرتب، گھوڑ سواری، تیز اندازی اتے تلوار تے گرز وغیرہ چلان دی جارج سکھدے سن۔ ایہہ اکادمیاں جان نوں جوکھوں وچ پاؤن دے چاہوان، جت نشیا رکھن والے، ہٹھی، بلی تے دلیر جودھے پیدا کردیاں سن۔ جوجدھاں تے مقابلیاں لئی ہمیشاں تیار برتیاں رہندے سن۔

”بھاگوت گیتا“ وچ جو ”مہا بھارت“ دا اک حصہ ہے، سورم گتی دے وچاری بہت سندر وضاحت کیتی گئی ہے۔ ایہدے وچ پہلی گل ایہہ دسی گئی ہے کہ بہادر بندہ اپنے پروار، قبیلے جاں ذات برادری دے تنگ تے نیویں پدھرتوں اُچا اُٹھ کے سچے سماج دی بھلائی دا خیال رکھے تے سماج لئی اپنا فرض پورا کرن ویلے جان وارن توں وی سٹک وچ نہ کرے۔ خاص طور تے جد لڑائی دھرم تے سچائیاں دی خاطر لڑی جا رہی ہووے تاں جودھے نوں کچھے کدی وی نہیں ہٹنا چاہیدا۔ دوجی گل، گیتا، ایہہ دسدی ہے کہ کم کرنا منکھ دے سُکھا وچ ہے۔ چاہے کوئی چنگا کم کرے تے چاہے مندا۔ بھاویں سریر کر کے کوئی منکھ نکرمی ہون دا دعویٰ کرے، پر من کر کے اوہ نکرمی نہیں ہو سکدا۔ سو منکھ نوں چاہیدا ہے نکرمی ہون دا پکھنڈ چھڈ کے پوری لگن نال اپنے کتے دا کم کرے تے نتجیاں ولوں بے پرواہ ہو جاوے۔ جو آدمی جت تے ہارنوں اکو جیہا سمجھدا ہے، جت وچ ابھیمان نہیں کردا تے ہار وچ دل نہیں چھڈدا تے ایویں دوہاں حالتاں وچ اک رس رہ کے من دی شاننی قائم رکھدا ہے، اوہی سچا یوگی ہے۔ سو ”گیتا“ وچ کرم دا مطلب ’کر گزرتا‘ جاں گجھ کروکھان اُتے زور دیندی ہے اتے دسدی ہے کہ نتجیاں دا خیال کیتے بغیر کرم کرن والا منکھ کرم کردا ہو یا وی نکرمی ہوندا ہے۔

سورم گتی دے راہ وچ دو وڈیاں رکاوٹاں ہن۔ اک موت دا ڈر تے دوجا سمبندھیاں دا پیار۔ ”گیتا“ منکھ نوں ایہناں دوہاں توں مُکت کردی ہے۔ ایہہ دسدی ہے کہ جنم تے مران ایشور دے ہتھ وچ ہے، منکھ دا ایہدے وچ کوئی دخل نہیں۔ جُده وچ اسیں کسے نوں نہیں مار دے کیونکہ مرنا تاں ربی رضا ہے تے مارن والا صرف نمت ماتر جاں ربی

رضا ہے۔ جدھ کسے اڑک تے اٹل سستی دے کارن ہوندے ہن تے جو دھے داکرتو بناں کسے اٹکن، جھجک جاں جت ہار دے خیال توں اوہدے وچ حصہ لینا ہے۔ ایہہ گھج کردیاں اوس نوں پرواری تے متر چاری دے سمبندھاں نوں وی لاہے رکھ دینا چاہیدا ہے۔

اُتلے وچارتوں ایوں جا پدا ہے کہ ”گیتا“ صرف جدھ تے ویرتا دی پریرنا دین والا گرنٹھ ہے، پر اصلیت ایہہ ہے کہ ویرتا دے نال نال ایہہ شانتی تے اہنسا دا اُپدیش وی دیندی ہے۔ ایہہ دس دی ہے کہ اہنسا، شانتی، تیگ، سچائی، دیا (خیرات)، پوترتا، کھماں تے نمرتا وغیرہ گناں دا دھارنی بندہ ہی مُکّتی پراپت کر سکدا ہے۔ سوال پیدا ہوندا ہے کہ رن بھومی وچ سینکڑیاں آدمیاں دا گھات کرن والا بندہ اہنسا وادی کیویں ہو سکدا ہے؟ ”گیتا“ نے ایس گنجھل دا حل دو طرح نال دتا ہے۔ پہلی گل ایہہ کہ کرم دا چنگا جاں مندرا ہونا نیت اُتے زبھر ہے۔ اک سوریر جی لڑائی وچ صرف ایس وچارتوں حصہ لیندا ہے کہ لڑنا اوہدا دھرم ہے۔ اوہدے دل وچ نہ اپنے ورودھیاں لئی کوئی مند بھاونہ جاں ویر بھاونہ ہے تے نہ اپنے ساتھیاں لئی کوئی طرف داری جاں لحاظ ملاحظہ۔ اوہ اپنے کرم ولوں پورن طور تے بے عیب ہوندا ہے اتے اوس نوں ایس کرم دے پھل جاں سٹے دی چتا نہیں ہوندی۔ ”گیتا“ دس دی ہے کہ ایس طرح دے بے عیب جی نوں مارن دا پاپ نہیں لگدا، نہ اوہدے اُتے کسے بُرائی دا اثر ہوندا ہے۔ اہنسا اک اجیہا گن ہے، جیس دا بھاسٹ پھیٹ توں سنکوچ کرنا نہیں، سگوں ویر بھاونہ تے گھرنادی ان ہوند ہے۔

”گیتا“ نے دو جی گل ایہہ دسی ہے کہ دھرم جدھ تے ادھرم جدھ وچ فرق ہے۔ جیہڑی لڑائی انیاں نوں دور کرن اتے سچ دی حمایت وچ اوس ویلے لڑی جاندی ہے، جدھو رسبھ حیلے بیکار ہو جاندا ہے ہن اتے جو ویر بھاونہ توں بناں لڑائی دے منے پر منے اصولاں مطابق لڑی جاندی ہے، اوہ دھرم جدھ ہے۔ ایس دا مطلب سماج دا بھلا کرنا تے نیکی ہے۔ ایہو جیہا جدھ حقی ہوندا ہے تے آتم سکھ ہوندا ہے۔ جد ڈاکٹر کسے روگی دے انگ نوں چیرا دیندا ہے تاں اوس دی نیت اوس نوں راضی کرن دی ہوندی ہے، بھانویں اپریشن کردیاں روگی نوں تکلیف ہوندی ہے تے کئی وار اوس دی موت وی ہو جاندی ہے۔ ایسے طرح جد کوئی جج کسے دوشی نوں موت دی سزا دیندا ہے تاں اوس دا مطلب سماج دا بھلا ہوندا ہے۔ جج نوں قتل دے دوش دا

حمایتی نہیں کہیا جاسکدا۔ ایسے طرح جد کوئی جو دھا سماج وچوں روز ظلم، دھکے جاں انیاں وغیرہ برائی نوں دور کرن لئی لڑائی وچ اپنا لہو ویندا جاں کسے دا خون کردا ہے، تاں اوہ اک قابل تعریف کم کردا ہے۔ اوس دا مقصد پوتر ہوندا ہے، بھائیوں ایہدے نال کئی بندیاں دی جان جاندی ہے، جیہناں وچوں کئی اکا زردوش ہوندے ہن۔ سورا مجدھ کردیاں تے لوکاں نوں ماردیاں وی اپنی اہنسا دا سُہا قائم رکھدا ہے، ایس لئی ہنسا دے پاپ دا بھگتی نہیں بندا۔ ایوں اہنسا تے جدھ اک دوجے دے وروڈھی نہیں سگوں پورک (پورا کرن والا) ہن۔

”بھاگوت گیتا“ وچ ویرتا دی اوس عالمی فلاسفی دی تشریح کیتی گئی ہے، جو ویر کال دے پراچین پنجاب وچ پرچلت سی۔ ایہدے وچ لڑائی دے کتے نوں بہوں اُچا درسایا گیا ہے تے جو دھے نوں سماج وچ وڈا ستکار یوگ مقام دتا گیا ہے۔ ”گیتا“ سورا بیر جی نوں ایہہ درڑھ کراندی ہے کہ سماج دے کلیان واسطے اتے سماج وچ دھرم، نیاں تے سچ دا بول بالا کرن واسطے اوہدا مجدھ وچ جو جھنا نہایت ضروری ہے۔ ایس طرح ایہہ جو دھے دے سامنے اک اُچا آدرش رکھدی ہے، جیس دی پراپتی لئی اوہ اپنا سبھ کجھ داء تے لا دیندا ہے تے بھیا تک مُشکلاں دا سامنا کردا ہو یا نہ تھڑکدا ہے، نہ پچھے ہٹدا ہے۔ ایس سکھیا دے پر بھاو پیٹھ ویر کال دے پنجابیاں نے ویدی جگ وچ دیاں بہادری دیاں ریتاں نوں اگے ودھایا تے بہادری دے اوہ پورے پائے، جیہناں نے ساری دُنیا نوں دنگ کردتا۔ پروفیسر جے۔ این بینر جی لکھدے ہن:

”پورس دی فوج اپنے اگے کرشن مہاراج دی تصویر رکھدی سی
تے ”گیتا“ وچ دتی سکھیا مطابق عمل کردی سی۔“

سچ تاں ایہہ ہے کہ پورس دی فوج نے ہی نہیں سگوں پنجاب دے سورا بیراں دیاں کئی پُٹھناں نے ”گیتا“ دی سکھیا توں لڑن مرن دا چاہ تے حوصلہ پراپت کیتا۔

آپ سنواریں میں ملیں، میں ملیاں سکھ ہوئے
فریدا جے توں میرا ہوئے رہیں، سبھ جگ تیرا ہوئے

.....☆.....

کٹک گونجاں، چیت دُونہ، ساون بجلیاں
سیالے سوہندیاں پر گل باڑیاں
بابا فریدؒ

سانجھ دیاں کتاباں

320 روپے	مرتب: ممتاز بلوچ	ہودے بیت
350 روپے	امرتا پریتم	کاغذ تے کینوس
140 روپے	مشتاق صوفی	پیٹھ وگے دریا
160 روپے	مشتاق صوفی	تاء
100 روپے	مشتاق صوفی	مٹی داماس
120 روپے	غلام حسین ساجد	سرسوتی توں راوی تاںیں
160 روپے	غلام حسین ساجد	کسے سُفے دے نال
120 روپے	غلام حسین ساجد	نیندر بھنی رات
240 روپے	ریاض احمد شاد	کھلارا
140 روپے	نسرین انجم بھٹی	اٹھے پہر ترہ
200 روپے	محمد منشا یاد	وگدا پانی
200 روپے	سعید بھٹا	کمال کہانی
140 روپے	سعید بھٹا	نابر کہانی
300 روپے	سعید بھٹا	بار کہانی
36 روپے	سعید بھٹا	نہ جھنگ چھٹیا نہ کن پائے
300 روپے	فضل فرید لالیکا	چھ پتر
80 روپے	1857 دی جنگ آزادی وچ وٹواں دا حصہ/ظہیر وٹو	
130 روپے	محمد آصف خاں/فیاض مگھیا نہ	ساجھی پیڑ
260 روپے	ممتاز بلوچ	چچ دے دو ہڑے
130 روپے	وسیم گردیزی	رنگ رس
120 روپے	جسوندر سنگھ	گھر دا جی
200 روپے	فضل احمد خسرو	وفاواں عشق دیاں

